

UIMHREACHA

Daonáireamh á Fhógairt

1 Labhair an Tiarna le Maois i bhfásach Shíonái, i mBoth na Teagmhála, ar an gcéad lá den dara mí sa dara bliain tar éis dóibh teacht amach as tír na hÉigipte agus dúirt:
²“Déanaigí daonáireamh ar chomhthionól uile chlann Iosrael de réir chlann agus fine athartha, ag cur ainm gach fireannaigh, ceann ar cheann, san áireamh. ³Gach fear in Iosrael os cionn fiche bliain agus é ar a chumas airm a iompar, déansa agus Árón iad a áireamh agus a ainmniú do láthair chatha. ⁴Agus bíodh duine as gach treibh, ceann a fhine athartha, ag cabhrú libh sa ghnó seo.

Feidhmeannaigh an Daonáirimh

- ⁵“Seo iad ainmneacha bhur lucht cúnta:
Do Reúbaen, Eilíozúr mac Shidéúr.
⁶Do Shímeon, Sealuimíéil mac Zúiríseadáí.
⁷Do Iúdá, Nachson mac Amaíneádáb.
⁸Do Íosácár, Natanael mac Zúár.
⁹Do Zabúlun, Eilíáb mac Haelon.



¹⁰ Do mhic Iósaef: do Eafraím, Eilíseámá mac Aimíohúd; agus do Mhanaise, Gamailíeil mac Phadázúr.

¹¹ Do Bhiniáimin, Aibíodan mac Ghideoiní.

¹² Do Dhán, Aichíeizir mac Aimíseadáí.

¹³ Do Áiséar, Paigíeil mac Ocrán.

¹⁴ Do Ghád, Eiliásáf mac Dheúael.

¹⁵ Do Naftáilí, Aichíora mac Aenán.”

¹⁶ Oirearca an chomhthionóil iadsan, ceannairí a dtreibheanna dúchais, treoraithe shluaite Iosrael.

¹⁷ Rug Maois agus Árón na daoine seo, ar luadh a n-ainmneacha, leo ¹⁸ agus ar an gcéad lá den dara mí thionóladar an comhthionól go léir. Rinne clann Iosrael go léir a ngingealach a chur isteach de réir fine agus clainne, agus áiríodh ainm gach fir fiche bliain nó breis, ceann ar cheann. ¹⁹ Rinne Maois daonáireamh orthu i bhfásach Shíonáí mar a d’ordaigh an Tiarna dó.

An Daonáireamh

²⁰ Nuair a bhí ginealach mhuintir Reúbaen, céadghin Iosrael, curtha isteach de réir fine agus clainne, áiríodh ainm gach fir fiche bliain d’aois nó breis, ceann ar cheann, a raibh ar a gcumas airm a iompar. ²¹ Ba é a líon siúd ar threibh Reúbaen daichead sé mhíle cúig céad.



²²Nuair a bhí ginealach mhuintir Shímeon curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh ar a gcumas airm a iompar. ²³Ba é a líon siúd ar threibh Shímeon caoga naoi míle trí chéad.

²⁴Nuair a bhí ginealach mhuintir Ghád curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh ar a gcumas airm a iompar. ²⁵Ba é a líon siúd ar threibh Ghád daichead cúig mhíle sé chéad agus a caoga.

²⁶Nuair a bhí ginealach mhuintir Iúdá curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ²⁷Ba é a líon siúd ar threibh Iúdá, seachtó ceathair míle sé chéad.

²⁸Nuair a bhí ginealach mhuintir Íosácár curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ²⁹Ba é a líon siúd ar threibh Íosácár, caoga ceathair míle ceithre chéad.

³⁰Nuair a bhí ginealach mhuintir Zabúlun curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ³¹Ba é a líon siúd ar threibh Zabúlun caoga seacht míle ceithre chéad.

³²Maidir le clann Íosaef: Nuair a bhí ginealach mhuintir Eafráim curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ³³Ba é a líon siúd ar threibh Eafráim daichead míle cúig chéad.

³⁴Nuair a bhí ginealach mhuintir Mhanaise curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ³⁵Ba é a líon siúd ar threibh Mhanaise tríocha dó míle dhá chéad.



³⁶Nuair a bhí ginealach mhuintir Bhiniáimin curtha isteach de réir fine agus clainne, áiríodh ceann ar cheann ainm gach fir fiche bliain nó breis a raibh sé ar a gcumas airm a iompar. ³⁷Ba é a líon siúd ar threibh Bhiniáimin tríocha cúig mhíle ceithre chéad.

³⁸Nuair a bhí ginealach mhuintir Dhán curtha isteach de réir fine agus clainne, áiríodh ceann ar cheann ainm gach fir fiche bliain d'aois nó breis a raibh sé ar a gcumas airm a iompar. ³⁹Ba é a líon siúd ar threibh Dhán, seasca dó míle seacht gcéad.

⁴⁰Nuair a bhí ginealach mhuintir Áiséar curtha isteach de réir fine agus clainne, áiríodh ceann ar cheann ainm gach fir fiche bliain nó breis a raibh sé ar a gcumas airm a iompar.

⁴¹Ba é a líon siúd ar threibh Áiséar daichead a haon mhíle cúig céad.

⁴²Nuair a bhí ginealach mhuintir Naftáilí curtha isteach de réir fine agus clainne, áiríodh ceann ar cheann ainm gach fir fiche bliain nó breis a raibh sé ar a gcumas airm a iompar. ⁴³Ba é a líon siúd ar threibh Naftáilí caoga trí mhíle ceithre chéad.

⁴⁴Sin iad na fir a áiríodh ag Maois agus ag Árón agus ag ceannairí Iosrael, dáréag díobh, gach duine díobh ag seasamh do theaghlach a shinsear. ⁴⁵Áiríodh de réir fine agus clainne gach fear de chlann Iosrael a bhí fiche bliain nó breis agus é ar a chumas airm a iompar. ⁴⁶Ba é an líon iomlán sé chead agus a trí mhíle cúig céad agus caoga. ⁴⁷Ach níor cuireadh na Léivítigh agus a dtreibh shinsearachta san áireamh.

Reacht na Léivíteach

⁴⁸Labhair an Tiarna le Maois agus dúirt: ⁴⁹“Ná háirimh treibh Léiví ámh, agus ná déan daonáireamh orthu i measc phobal Iosrael. ⁵⁰Cuir na Léivítigh i mbun taibearnacal na



Fianaise chun aire a thabhairt dá ghréithe agus do gach a mbaineann leis. Déanaidís an taibearnacal agus a ghréithe go léir a iompar, agus fónamh dó, agus a gcampa a chur suas ina thimpeall. ⁵¹Nuair a bhíonn an taibearnacal le gluaiseacht, is iad na Léivítigh a chaithfidh é a bhaint óna chéile agus nuair a bhíonn sé le cur suas arís, is iad na Léivítigh a chaithfidh é chur suas. Aon duine eile a thagann ina ghaire, cuirtear chun báis é. ⁵²Déanadh clann Iosrael a mbothanna a chur suas de réir eagair, gach duine ina champa féin, agus gach duine faoina bhratach féin. ⁵³Ach déanadh na Léivítigh a mbothanna a chur suas timpeall taibearnacal na Fianaise, i dtreo nach dtitfidh fraoch na feirge ar chomhthionól uile chlann Iosrael. Bíodh na Léivítigh i bhfeighil thaibearnacal na Fianaise.” ⁵⁴Rinne clann Iosrael díreach mar a d’ordaigh an Tiarna do Mhaois. Rinneadar rud air.

Eagar na dTreibheanna

2 Labhair an Tiarna le Maois agus le hÁrón agus dúirt: ²“Déanadh clann Iosrael a mbothanna a chur suas de réir eagair, gach duine ag a bhrat féin, faoi bhratach theaghlach a shinsearachta. Cuiridís suas a mbothanna mórthimpeall thaibearnacal na Fianaise fad áirithe uaidh amach. ³Maidir leo siúd atá lena mbothanna a chur lastoir: i dtreo éirí gréine, bratach champa Iúdá, faoi chóiriú catha; mar cheann ar chlann Iúdá: Nachsón mac Amaíneádáb, ⁴agus seachtó ceathair míle sé chéad fear ar a ríomh, faoina cheannas. ⁵Le campáil taobh leis: treibh Íosácár. Mar cheann ar chlann Íosácár: Natanael mac Zúár, ⁶agus caoga ceathair míle ceithre chéad fear, ar a ríomh, faoina cheannas.



⁷Treibh Zabúlun. Mar cheann ar chlann Zabúlun: Eilíáb mac Haelon, ⁸ agus caoga seacht míle ceithre chéad ar a ríomh faoina cheannas. ⁹Is é líon tionóil iomlán champa Iúdá ar a ríomh, céad ochtó sé mhíle ceithre chéad. Siad atá le bheith ar tosach ag scor campa.

¹⁰“Ar an taobh theas: bratach champa Reúbaen faoi chóiriú catha; mar cheann ar chlann Reúbaen: Eilíozúr mac Shidéur, ¹¹ agus daichead sé mhíle cúig céad fear, ar a ríomh, faoina cheannas. ¹²Le campáil taobh leis: treibh Shímeon. Mar cheann ar chlann Shímeon, Sealuimíéil mac Zúiriseadáí, ¹³ agus caoga naoi míle trí chéad fear, ar a ríomh, faoina cheannas. ¹⁴Treibh Ghád. Mar cheann ar chlann Ghád: Eiliásáf mac Dheúael, ¹⁵ agus daichead cúig mhíle sé chéad agus caoga fear, ar a ríomh, faoina cheannas. ¹⁶Is é líon tionóil iomlán champa Reúbaen ar a ríomh, céad agus caoga haon mhíle ceithre chéad agus a caoga. Siad atá le bheith sa dara háit ag scor campa.

¹⁷“Ansin gluaiseadh Both na Teagmhála agus campa na Léivíteach i lár na gcampaí eile. Bíodh eagar a ngluaiste ar aon dul le heagar a gcampála, gach duine in ord faoina bhrat féin.

¹⁸“Ar an taobh thiar: Bratach champa Eafráim faoi chóiriú catha. Mar cheann ar chlann Eafráim: Eilíseámá mac Aimíohud, ¹⁹ agus daichead míle cúig céad fear ar a ríomh, faoina cheannas. ²⁰Le campáil taobh leis: treibh Mhanaise. Mar cheann ar chlann Mhanaise: Gamailíéil mac Phadázúr, ²¹ agus tríocha dó míle dhá chéad fear, ar a ríomh, faoina cheannas. ²²Treibh Bhiniáimin. Mar cheann ar chlann Bhiniáimin: Aibíodan mac Ghideoiní, ²³ agus tríocha cúig mhíle ceithre chéad fear, ar a ríomh, faoina cheannas. ²⁴Is é líon tionóil iomlán Eafráim, ar a ríomh, céad agus a hocht míle agus céad. Siad atá le bheith sa tríú háit ag scor campa.



²⁵“Ar an taobh thuaidh: bratach champa Dhán faoi chóiriú catha. Mar cheann ar chlann Dhán: Aichíeizir mac Aimíseadáí, ²⁶ agus seasca dó míle seacht gcéad fear ar a ríomh, faoina cheannas. ²⁷ Lé campáil taobh leis: treibh Áiséar. Mar cheann ar threibh Áiséar: Paigiéil mac Ocrán, ²⁸ agus daichead a haon mhíle fear, ar a ríomh, faoina cheannas. ²⁹ Ansin treibh Naftáilí: mar cheann ar chlann Naftáilí: Aichíora mac Aenán, ³⁰ agus caoga trí mhíle ceithre chéad fear faoina cheannas. ³¹ Is é líon tionóil iomlán champa Dhán, ar a ríomh, céad caoga seacht míle sé chéad. Siad a bheidh ar deireadh ag scor campa, brat ar bhrat.”

³² Ba é sin líon chlann Iosrael nuair a rinneadh an daonáireamh de réir teaghlach sinsearachta. Ba é líon iomlán an champa uile, cóirithe ina gceannasaíochtaí faoi leith, sé chéad agus a trí mhíle cúig céad agus a caoga fear. ³³ Ach níor áiríodh na Léivítigh i measc chlann Iosrael de réir mar a d’ordaigh an Tiarna do Mhaois.

³⁴ Rinne clann Iosrael de réir mar a d’ordaigh an Tiarna do Mhaois; sin mar a shuíodar a gcampa, faoi eagar a mbrat. Sin mar scoireadar campa, gach duine lena mhuintir féin de réir fine.

Treibh Léiví

3 Seo iad sliocht Árón agus Mhaois nuair a labhair an Tiarna le Maois ar Shliabh Shíonáí. ² Seo iad ainmneacha chlann Árón: Nádáb an chéadghin agus Aibíchiú, Eileázár agus Ítéamár. ³ Sin iad ainmneacha chlann Árón, na sagairt unghtha a d’oirnigh sé le fónamh i mbun dualgais na sagartachta. ⁴ Ach fuair Nádáb agus Aibíchiú bás i láthair an



Tiarna nuair a d’ofráladar tine mhídhleathach i láthair an Tiarna i bhfásach Shíonáí. Níor fhágadar sliocht. Dá bhrí sin fágadh faoi Eileázár agus Íteámár fónamh mar shagairt faoina n-athair Áróin.

⁵Labhair an Tiarna le Maois agus dúirt: ⁶“Tionól treibh Léiví agus cuir ar fáil iad do Áróin an sagart, le freastal air. ⁷Comhlíonaidís na dualgais atá dlite de agus dlite den chomhthionól go léir os comhair Bhoth na Teagmhála ina seirbhís don taibearnacal.

⁸Bíodh gréithe uile Bhoth na Teagmhála ina gcúram, agus déanaidís na dualgais go léir atá dlite de chlann Iosrael ina seirbhís don taibearnacal a ghabháil chucu féin. ⁹Tabhair na Léivítigh d’Áróin agus dá mhic mar thoirbheartaigh; tugadh clann Iosrael dó iad.

¹⁰Cláraigh Áróin agus a chlann mhac agus déanaidís a ndualgais sagairt a chomhlíonadh; ach má thagann aon duine eile i ngar, cuirtear chun báis é.”

¹¹Labhair an Tiarna le Maois agus dúirt: ¹²“Roghnaigh mé féin na Léivítigh as clann Iosrael in áit gach céadghin a osclaíonn an bhroinn i measc chlann Iosrael; liomsa na Léivítigh dá bhrí sin. ¹³Óir is liomsa gach céadghin. An lá a mharaigh mé gach céadghin i dtalamh na hÉigipte, rinne mé gach céadghin in Iosrael idir dhuine agus ainmhí a choisreacan dom féin; is liomsa iad. Mise an Tiarna.”

Daonáireamh na Léivíteach

¹⁴Labhair an Tiarna le Maois i bhfásach Shíonáí agus dúirt: ¹⁵“Déan clann Léiví a áireamh de réir teaghlaigh shinsearachta agus de réir fine; ní foláir gach fireannach míosa nó breis a chomhaireamh.” ¹⁶Rinne Maois iad a áireamh mar a dúirt an Tiarna ag



déanamh de réir a orduithe. ¹⁷Seo iad ainmneacha chlann Léiví: Géirseon, Cohát agus Maráraí. ¹⁸Seo iad ainmneacha shliocht Ghéirseon de réir fine: Libní agus Simí. ¹⁹Clann Chohát de réir fine: Amrám agus Izeár, Heabrón agus Uizíeil. ²⁰Clann Mharáraí de réir fine: Mailí agus Múisí. Sin iad sleachta Léiví de réir a dteaghlaigh shinsireachta.

²¹Ó Ghéirseon shíolraigh sleachta na Libníoch agus na Simíoch; sin iad sleachta Ghéirseon. ²²Ba é a líon iomlán, ag cur na bhfireannach go léir mí d’aois nó breis san áireamh, seacht míle cúig céad. ²³Shuigh sleachta Ghéirseon a gcampa ar chúl an taibearnacail laistiar. ²⁴Ba é Eiliásáf mac Láeil ceann theaghlach Ghéirseon. ²⁵Sé cúram a bhí ar chlann Ghéirseon i mBoth na Teagmhála, an taibearnacal, an Bhoth lena brait, an chliath do dhoras Bhoth na Teagmhála, ²⁶na brait ag crochadh timpeall na faiche, an chliath do dhoras na faiche atá timpeall an taibearnacail agus na haltóra, agus na téada go léir ba ghá don ghnó seo.

²⁷Ó Chohát shíolraigh sleachta na nAmrámach, sleachta na nIzeárach, sleachta na Heabrónach, agus sleachta na nUizíéalach. Sin iad sleachta na gCohátach. ²⁸Ba é a líon iomlán, ag cur na bhfireannach go léir mí d’aois nó breis san áireamh, ocht míle sé chéad. Bhí siadsan i bhfeighil an tsanctóra. ²⁹Shuigh sleachta Chohát a gcampa ar an taobh theas den taibearnacal. ³⁰Ba é Ealzáfán mac Uizíeil ceann teaghlaigh chlanna Chohát. ³¹Sé cúram a bhí orthu, an áirc, an bord, an coinneoir, na haltóirí, soithí beannaithe an tsanctóra lena ndéanann na sagairt seirbhís, agus an chliath le gach a ngabhann léi.

³²Ba é Eileázár, mac Árón an sagart, taoiseach cheannairí na Léivíteach. Bhí sé i gceannas orthu siúd go léir a bhí i bhfeighil an tsanctóra.



³³Ó Mharáraí shíolraigh sleachta na Mailíoch agus na Múisíoch; sin iad sleachta Mharáraí. ³⁴Ba é a líon iomlán, ag cur na bhfireannach go léir mí d’aois nó breis san áireamh, sé mhíle dhá chéad. ³⁵Ba é Zúiríéil mac Aibíocháil ceann teaghlaigh chlanna Mharáraí, agus shuíodar a gcampa ar an taobh thuaidh den taibearnacal. ³⁶Bhí clann Mharáraí i bhfeighil chreat an taibearnacail, na bataí, na cuaillí, na ceapa agus a ghréithe go léir agus a ngabhann leo, ³⁷agus cuaillí na faiche mórthimpeall lena gceapa agus a bpionnaí agus a dtéada.

³⁸Siad a shuigh a gcampa ar an taobh thoir, os comhair an taibearnacail agus Bhoth na Teagmhála, i dtreo éirí gréine, Maois agus Árón agus a chlann mhac a bhí i bhfeighil ghnásanna an tsanctóra thar ceann chlann Iosrael. Aon duine eile a thiocthadh i ngar, bhí sé le cur chun báis. ³⁹Ba é líon iomlán na Léivíteach mí d’aois nó breis, a d’áirigh Maois agus Árón de réir fine mar a d’ordaigh an Tiarna dhá mhíle agus fiche.

Na Léivítigh agus Fuascailt na gCéadghinte

⁴⁰Dúirt an Tiarna le Maois: “Déan daonáireamh ar gach céadghin fir ar chlann Iosrael mí d’aois agus breis á n-áireamh ó ainm. ⁴¹Ansin déan na Léivítigh a thoirbhirt domsa, mise an Tiarna, in áit gach céadghine de chlann Iosrael; ar an gcaoi chéanna tabharfaidh tú a n-eallach in áit gach céadghin eallaigh le chlann Iosrael.” ⁴²Rinne Maois dá bhrí sin daonáireamh ar gach céadghin mhic ar chlann Iosrael mar a d’ordaigh an Tiarna. ⁴³Ba é líon iomlán na gcéadghinte mí d’aois agus breis, fiche dó míle dhá chéad agus seachtó trí. ⁴⁴Ansin labhair an Tiarna le Maois agus dúirt: ⁴⁵“Tóg na Léivítigh in áit gach céadghine



ar chlann Iosrael, agus eallach na Léivíteach in áit a n-eallaigh. Liomsa féin na Léivítigh; mise an Tiarna.

⁴⁶Mar fhuascailt ar son an dá chéad agus seachtó trí céadghin ar chlann Iosrael atá de bhreis ar líon na Léivíteach, ⁴⁷tóg cúig sheicil an ceann, de réir sheicil an tsanctóra, fiche geará sa seicil. ⁴⁸Tabhair an t-airgead seo d'Árón agus dá mhic mar dhíolaíocht as fuascailt an líon breise seo.”

⁴⁹Thóg Maois an t-airgead fuascailte seo thar ceann na breise nár fhuascail na Léivítigh. ⁵⁰Thóg sé airgead céadghin chlann Iosrael, míle trí chéad agus seasca cúig sheicil, de réir sheicil an tsanctóra. ⁵¹Thug Maois an t-airgead fuascailte d'Árón agus dá mhic de réir órdú an Tiarna mar a d'ordaigh an Tiarna do Mhaois.

Finí na Léivíteach

4 Labhair an Tiarna le Maois agus le hÁrón agus dúirt: ²“Déan daonáireamh ar na Léivítigh sin atá de shliocht Chohát de réir fine agus clainne; ³áirigh na fir go léir idir tríocha agus leathchéad bliain a d'fhéadfadh airm a iompar, iad siúd lena mbaineann seirbhís i mBoth na Teagmhála. ⁴Seo iad dualgais chlann Chohát i mBoth na Teagmhála: tá na nithe sárnaofa ina gcúram. ⁵Nuair a scoirtear campa téadh Árón agus a chlann mhac isteach agus togaidís anuas fial an scáthláin, agus clúdaidís áirc na Fianaise leis. ⁶Cuiridís brat de leathar mín anuas air seo agus leathaidís éadach lánchorcra ar an iomlán. Ansin cuiridís na cuailí i ngreim san áirc. ⁷Leathaidís brat corcra ar bhord arán na láithreachta agus leagaidís air na miasa, na túisteáin, na cuacha agus crúscaí na n-íobairtí dí; leagtar



arán na sírofrála air chomh maith. ⁸Leathaidís brat craorag anuas orthu sin agus clúdaídís an t-iomlán faoi leathar mín. Ansin cuiridís na cuaillí i ngreim sa bhord.

⁹“Ansin tógaidís éadach corcra agus clúdaídís an coinnleoir solais lena lampaí agus a smóladáin agus a shileadáin agus na crúscaí ola a ghabhann leis. ¹⁰Cuiridís é féin agus a ghréithe go léir faoi chlúdach de leathar mín agus leagaidís é ar an mbarra.

¹¹“Leathaidís éadach corcra ar an altóir óir agus leagaidís clúdach de leathar mín air sin. Cuiridís na cuaillí i ngreim ann ansin. ¹²Tógaidís na gréithe eile go léir a úsáidtear i seirbhís an tsanctóra, agus leagaidís ar éadach corcra iad go léir agus clúdaídís iad le brat de leathar mín agus cuiridís lena chéile ar an mbarra iad.

¹³“Tógaidís an luaitheach den altóir agus leathaidís éadach corcra uirthi, ¹⁴agus leagaidís air sin gréithe uile na haltóra, a úsáidtear sa tseirbhís liotúirge, mar atá na miasa tine, na gabhla, na liacha, na báisíní agus soithí uile na haltóra. Leathaidís brat de leathar mín ar an méid sin go léir agus cuiridís na cuaillí i ngreim ann. ¹⁵Nuair a bheidh deireadh ag Áróin agus ag a chlann ag clúdach nithe naofa uile an tsanctóra agus a ngréithe uile agus an campa á scor, tagadh clann Chohát chun an t-ualach a iompar ach gan baint leis na nithe naofa le heagla go bhfaighidís bás. Sin iad na nithe i mBoth na Teagmhála atá le hiompar ag clann Chohát.

¹⁶“Agus Eileázár mac Áróin an sagart, bíodh sé i bhfeighil na hola don solas, na túise cumhra, na habhlainne síoraí, agus an chriosma; tugadh sé aire don taibearnacal uile agus do gach a bhfuil ann, don sanctóir agus dá mbaineann leis.”

¹⁷Labhair an Tiarna le Maois agus le hÁróin agus dúirt: ¹⁸“Na gearraigí amach treabhchas sliocht Chohát ó líon na Léivíteach. ¹⁹Ach déanaigí mar seo leo i dtreo go



mairidís agus go dtiocfaidís slán ón mbás nuair a rachaidh siad i ngar do na nithe sárnaofa: téadh Árón agus a chlann mhac isteach agus leagaidís a ghnó agus a shaothar ar gach duine díobh. ²⁰ Ar an gcaoi sin ní miste dóibh dul isteach ach gan súil a leagan fiú ar feadh nóiméid ar na nithe naofa le heagla go bhfaighidís bás.”

²¹ Labhair an Tiarna le Maois agus dúirt: ²² “Déan daonáireamh chomh maith ar chlann Ghéirseon de réir fine agus clainne; ²³ áirigh na fir go léir idir tríocha agus leathchéad bliain d’aois a d’fhéadfadh airm a iompar, iad siúd lena mbaineann seirbhís i mBoth na Teagmhála. ²⁴ Seo iad dualgais sleachta Ghéirseon, a bhfeidhmeanna agus a n-ualaí.

²⁵ Iompraídís brait an taibearnacail, Both na Teagmhála lena dhíon agus an clúdach de leathar mín a théann air, an chliath do dhoras Bhoth na Teagmhála, ²⁶ brait na faiche agus an chliath don doras chun na faiche timpeall an taibearnacail agus na haltóra, na téada agus a mbaineann leo, agus gach rud atá riachtanach. Bíodh an méid sin go léir faoina gcúram. ²⁷ Dualgais uile chlann Ghéirseon – a n-ualaí agus a gcúraimí – déantar iad a chomhlíonadh faoi threoir Árón agus a mhac; féachaigí chuige nach ndéanann siad faillí ina bhfuil le hiompar acu. ²⁸ Sin iad na cúraimí a bheidh ar chlanna shliocht na nGéirseonach i mBoth na Teagmhála. Beidh Íteámár mac Árón an sagart ag riaradh a gcúraimí.

²⁹ “Déan daonáireamh chomh maith ar chlann Mharáraí de réir fine agus clainne; ³⁰ áirigh na fir go léir idir tríocha agus leathchéad bliain d’aois a d’fhéadfadh airm a iompar, iad siúd lena mbaineann seirbhís i mBoth na Teagmhála. ³¹ Seo iad an t-ualach agus na cúraimí go léir atá le comhlíonadh acu i mBoth na Teagmhála: creat an taibearnacail lena mhaidí snaidhme, a phollaí agus a cheapa; ³² na pollaí timpeall na faiche



lena gceapa, a bpionnaí, a dtéada, agus gach a ngabhann leo. Déanaigí liosta dá n-ainmneacha leis na hualaí a chaithfidh gach duine a iompar. ³³Sin iad na cúraimí a bheidh ar chlanna shliocht Mharáraí. Beidh Íteámár mac Árón an sagart ag riaradh a gcúraimí go léir i mBoth na Teagmhála.”

³⁴Rinne Maois agus Árón agus ceannairí an chomhthionóil daonáireamh ar chlann Chohát de réir clainne agus fine; ³⁵áiríodh gach fear idir tríocha agus leathchéad bliain d’aois a d’fhéadfadh airm a iompar agus lenar bhain sé seirbhís a thabhairt i mBoth na Teagmhála. ³⁶Ba é líon a dtreabhchas dhá mhíle seacht gcéad agus a caoga fear. ³⁷Ba é sin líon treabhchais Chohát, iad siúd ar bhain seirbhís i mBoth na Teagmhála leo, agus a d’áirigh Maois agus Árón ar ordú an Tiarna trí Mhaois.

³⁸Rinneadh daonáireamh ar chlann Ghéirseon de réir clainne agus fine; ³⁹áiríodh gach fear idir tríocha agus leathchéad bliain d’aois a d’fhéadfadh airm a iompar agus lenar bhain sé seirbhís a thabhairt i mBoth na Teagmhála. ⁴⁰Ba é líon a gclann agus a bhfiní dhá mhíle sé chéad agus a tríocha fear. ⁴¹Ba é sin líon treabhchais Ghéirseon, iad siúd ar bhain seirbhís i mBoth na Teagmhála leo agus a d’áirigh Maois agus Árón ar ordú an Tiarna.

⁴²Rinneadh daonáireamh ar fhiní chlann Mharáraí de réir fine agus clainne: ⁴³áiríodh gach fear idir tríocha agus leathchéad bliain d’aois a d’fhéadfadh airm a iompar agus lenar bhain sé seirbhís a thabhairt i mBoth na Teagmhála. ⁴⁴Ba é líon a bhfiní trí mhíle dhá chéad fear. ⁴⁵Ba é sin líon treabhchais Mharáraí a d’áirigh Maois agus Árón ar ordú an Tiarna trí Mhaois. ⁴⁶Ba é líon iomlán na Léivíteach a d’áirigh Maois agus Árón agus ceannairí Iosrael – ⁴⁷na fir go léir idir tríocha agus leathchéad a d’fhéadfadh airm a



iompar agus lenar bhain sé seirbhís a thabhairt nó ualaí a iompar i mBoth na Teagmhála –
⁴⁸ocht míle cúig chéad agus a hochtó fear. ⁴⁹Ar ordú an Tiarna trí Mhaois, rinneadh an daonáireamh ag leagan a dhualgais agus a ualaigh ar gach fear; áiríodh iad mar a d’ordaigh an Tiarna do Mhaois.

Dlíthe ar Leith

5 Labhair an Tiarna le Maois agus dúirt: ²“Ordaigh do chlann Iosrael gach lobhar agus gach duine óna bhfuil sileadh, nó atá truaillithe trí bhaint le corpán, a chur as an gcampa amach. ³Cuirigí as an gcampa amach iad idir fhir agus mhná, agus coinnigí ón gcampa iad, i dtreo nach dtruaillíodh clann Iosrael ar an gcaoi sin an campa ina mairim ina measc.” ⁴Rinne clann Iosrael amhlaidh; chuireadar as an gcampa amach iad. Rinne clann Iosrael mar a d’ordaigh an Tiarna do Mhaois.

⁵Labhair an Tiarna le Maois agus dúirt: ⁶“Abair le clann Iosrael:

Má dhéanann fear nó bean aon cheann de na peacaí trína bhfeallann duine ar an Tiarna, tá an duine sin ciontach. ⁷Déanadh sé an peaca a rinne sé a admháil agus an tsuim iomlán dá bhfuil sé freagrach a aisíoc, agus cúigiú de bhreis léi; déanadh sé an t-aisíoc leis an té ar a ndearna sé an éagoir. ⁸Ach mura mbíonn gaol ag an duine lena bhféadfaí an t-aisíoc san éagoir seo a dhéanamh, filleann an t-aisíoc atá ag dul don Tiarna ar an sagart, de bhreis ar an reithe leorghnímh lena ndéanann an sagart leorghníomh ar son an chiontaigh. ⁹Óir de gach rud a choisriceann clann Iosrael agus a thugtar chun an tsagairt,



tá ceart aige chun na coda a chuirtear ar leithrigh. ¹⁰ Cibé rud a choisriceann duine is leis féin é; cibé rud a thugann duine don sagart, is leis an sagart é.”

¹¹ Labhair an Tiarna le Maois agus dúirt: ¹² “Labhair le clann Iosrael agus abair:

“Má théann bean duine ar fán agus go mbíonn sí mídhílis dó, ¹³ má luíonn fear eile léi gan fhios dá céile, agus má thruaillíonn sí í féin gan fhios ar an gcuma seo, gan aon fhinné ina coinne, agus nach mbeirtear uirthi sa ghníomh, ¹⁴ agus ansin taom éada a theacht ar an gcéile agus go dtagann éad air faoina bhean a thruailligh í féin: nó arís má bhuaileann taom éada é agus go dtagann éad air faoina bhean fiú amháin agus gan í tar éis a truailithe, ¹⁵ ní foláir don fhear a bhean a thabhairt os comhair an tsagairt, agus ofráil deachú éafá min eorna a dhéanamh. Ná doirteadh sé ola uirthi, agus ná cuireadh sé túis chumhra uirthi, óir is ‘abhlann éada’ í seo, abhlann chuimhneacháin i gcuimhne ar locht.

¹⁶ Tugadh an sagart an bhean i láthair ansin, agus cuireadh sé i láthair an Tiarna í.

¹⁷ Tógadh sé uisce coisricthe ansin i soitheach cré agus cuireadh sé san uisce roinnt smúite a thógfaidh sé d’urlár an taibearnacail. ¹⁸ Tar éis don sagart an bhean a chur i láthair an Tiarna, scaoileadh sé le folt a cinn agus cuireadh sé an abhlann chuimhneacháin (an abhlann éada is é sin) ina lámha. Bíodh uisce an tseirfin, an sás mallachta, ina láimh féin. ¹⁹ Cuireadh sé an bhean ansin faoi bhrí na mionn. Abradh sé léi: ‘Mura fíor gur luigh fear leat agus go ndeachaigh tú ar fán agus gur thruailligh tú thú féin agus tú faoi údarás d’fhear céile, ansin ná déanadh uisce seo an tseirfin, sás na mallachta, aon dochar duit.

²⁰ Ach más fíor go ndeachaigh tú ar fán agus tú faoi údarás d’fhear céile, agus gur thruailligh tú thú féin ag roinnt do leapa le fear seachas do chéile’ – ²¹ ag an bpointe seo cuireadh an sagart faoi deara don bhean mionn na mallachta a thabhairt agus abradh sé léi



– ‘go ndéana an Tiarna mallú agus mionn díot i measc an phobail ag seargadh do shliasta agus ag at do bhoilg. ²²Go dté uisce seo na mallachta isteach i do chliabhach, go n-ata sé do bholg agus go searga sé do shliasaid!’ Freagraíodh an bhean: ‘Amen, Amen!’

²³Breacadh an sagart na mallachtaí seo i leabhar agus níodh sé glan iad in uisce an tseirfin. ²⁴Cuireadh sé faoi deara don bhean ansin uisce an tseirfin agus na mallachta a ól agus rachaidh an t-uisce mallachta isteach inti agus beidh sé searbh istigh inti. ²⁵Tógadh an sagart abhlann an éada as láimh na mná agus cuireadh sé i láthair an Tiarna í le comharthaí sóirt ofrála, agus tugadh sé chun na haltóra í. ²⁶Tógadh sé dorn den abhlann mar chuid chuimhneachán agus dódh sé ar an altóir é. Ansin cuireadh sé faoi deara don bhean an t-uisce a ól. ²⁷Tar éis dó é a chur d’iallach uirthi é a ól, más fíor gur thruailligh sí í féin agus gur fheall sí ar a fear, ansin beidh an t-uisce mallachta a théann inti searbh go cinnte; atfaidh a bolg agus seargfaidh a sliasaid agus beidh sí ina hábhar gránach i measc a muintire. ²⁸Ach murar thruailligh sí í féin agus go bhfuil sí glan, ansin rachaidh sí slán agus beidh clann uirthi.

²⁹Sin é an gnás i gcásanna éada, nuair a théann bean ar fán agus í féin a thruailliú agus í faoi údarás a fir, ³⁰nó nuair a bhuaileann taom éada fear agus go dtagann éad air faoina bhean. Nuair a thugann fear bean mar sin i láthair an Tiarna, cuireadh an sagart an gnás seo i bhfeidhm uirthi go hiomlán. ³¹Beidh an fear gan chiontacht, ach, ní foláir don bhean pionós a peaca a iompar.”



An Naizíreach

6 Labhair an Tiarna le Maois agus dúirt: ²“Abair le clann Iosrael: Más mian le fear nó le bean móid a thabhairt, móid an naizírich, is é sin, trína gcuirtear duine ar leith don Tiarna, ³diúltaíodh sé d’fhíon agus do dheoch chrua, ná hóladh sé fínéagar fíona ná dí crua, ná hóladh sé súlach fíniúna, agus ná hitheadh sé caora fíniúna, úr ná triomaithe. ⁴Fad a mhaireann a mhóid ná caitheadh sé aon ní a thagann ón bhfíniúin, fiú an glas-súlach nó an deascadh. ⁵Fad a bhíonn sé faoi cheangal na móide ná baineadh rásúr lena cheann; nó go mbíonn ré a choisricthe don Tiarna slánaithe, bíodh sé naofa agus ligeadh sé dá chuid gruaige bheith ag fás léi ar a cheann. ⁶Fad a bhíonn sé coisricthe don Tiarna ná téadh sé i ngar do chorpán. ⁷Ná déanadh sé é féin neamhghlan ar son athar ná máthar, ar son dearthár na deirféar, má chailltear iad; tá a choisreacan dá Dhia ar a cheann aige. ⁸Ó thús deireadh a naizíreachta is duine é atá coisricthe don Tiarna.

⁹Má thiteann an t-anam as duine go tobann ina láthair agus go bhfághtar neamhghlan a cheann coisricthe ní foláir dó a cheann a bherradh lá a ghlinta; bearradh sé a cheann ar an seachtú lá. ¹⁰Ar an ochtú lá tugadh sé dhá cholm nó dhá ghearrcach colúir chun an tsagairt ag doras Bhoth na Teagmhála. ¹¹Ofráladh an sagart ceann díobh mar íobairt pheaca agus an ceann eile mar íobairt loiscthe, agus comhlíonadh sé ansin gnás an leorghnímh ar son na truaillitheachta a luigh air de bharr an chorpáin. Déanadh sé a cheann a choisreacan an lá céanna; ¹²agus déanadh sé é féin a choisreacan don Tiarna i gcaitheamh a naizíreachta ar fad, agus tugadh sé uan fireann bliana mar íobairt



leorghnímh. Ní chuirfear an t-am caite cheana san áireamh, mar gur truaillíodh a naizíreacht.

¹³Seo é an gnás atá le leanúint ag naizíreach nuair a bheidh tréimhse a naizíreachta comhlíonta. Tugtar é go doras Bhoth na Teagmhála ¹⁴agus déanadh sé a ofráil don Tiarna: mar íobairt loiscthe uan fireann bliana gan mháchail; mar íobairt chomaoineach, reithe gan mháchail, ¹⁵agus cliabh de bhuilíní slimaráin de phlúr mín fuinte le hola agus de chácaí gan ghabháile le hola leata orthu, mar aon leis na habhlanna agus na híobairtí doirte a ghabhann leo. ¹⁶Cuireadh an sagart na nithe sin i láthair an Tiarna agus ofráladh sé an íobairt pheaca agus an íobairt loiscthe dó. ¹⁷Ofráladh an naizíreach an íobairt chomaoineach leis an reithe agus leis an slimarán sa chliabh, agus ofráladh an sagart an abhlann agus an íobairt dhoirte mar an gcéanna. ¹⁸Ansin bearradh an naizíreach a cheann coisricthe ag doras Bhoth na Teagmhála, agus tógadh sé gruaig a chinn choisricthe agus leagadh í ar an tine atá faoin íobairt chomaoineach. ¹⁹Ansin tógadh an sagart slinneán an reithe, nuair a bhíonn sé bruite, agus builín slimaráin ón gcliabh, agus cáca gan ghabháile, agus leagadh sé ar lámha an naizírich iad tar éis dó a ghruaig choisricthe a bharradh. ²⁰Déanadh sé an chuid sin a ofráil don Tiarna mar dhleacht ar leith; is cuid naofa don sagart í, mar aon leis an mbrollach a ofráladh agus leis an gceathrú a cuireadh i leataobh. Ní miste don naizíreach fíon a ól ina dhiaidh sin.

²¹Sin é an gnás don naizíreach a thug móid. Má mhóidigh sé, seachas [a cheann gruaige], ofráil phearsanta don Tiarna – seachas cibé rud eile a bheadh ar a acmhainn – ní foláir dó an mhóid a thug sé a chomhlíonadh de bhreis ar cibé rud a éilíonn an gnás ar son a ghruaige.”



An Bheannacht

²²Labhair an Tiarna le Maois agus dúirt: ²³“Abair le hÁrón agus lena chlann mhac: ‘Seo mar a bheannóidh sibh clann Iosrael. Abraigí leo: ²⁴Go mbeannaí an Tiarna thú agus go gcumhdaí sé thú. ²⁵Go dtaitní gnúis an Tiarna ort agus go raibh sé caoin leat. ²⁶Go nochta an Tiarna a ghnúis duit agus go dtuga sé síocháin duit.’ ²⁷Sin mar atá m’ainm le gairm ar chlann Iosrael acu, agus cuirfidh mé mo bheannacht orthu.”

Ofralácha na gCeannairí

7An lá a bhí deireadh ag Maois ag cur an taibearnacail suas, rinne sé é a ungradh agus a choisreacan agus a thoscán go léir chomh maith, mar aon leis an altóir agus a gréithe. Nuair a bhí sé go léir ungha agus coisricthe aige ²rinne ceannairí Iosrael ofráil; ba iadsan ceann na dteaghlach sinsearachta, ceannairí na dtreibheanna a bhí i gceannas an daonáirimh. ³Thugadar a n-ofralácha i láthair an Tiarna, sé charbad iata agus dhá dhamh déag – carbad do gach dhá cheannaire agus damh an duine. D’ofráladar iad os comhair an taibearnacail. ⁴Dúirt an Tiarna ansin le Maois: ⁵“Glac iad seo uathu agus cuirtear ar leithrigh iad do sheirbhís Bhoth na Teagmhála. Tabhair do na Léivítigh iad, do gach duine do réir mar a éileoidh a dhualgais.” ⁶Ghlac Maois na carbaid dá bhrí sin agus na daimh agus thug do na Léivítigh iad. ⁷Thug sé dhá charbad agus ceithre dhamh do chlann Ghéirseon i gcomhair na ndualgas a bhí le comhlíonadh acu. ⁸Agus do chlann Mharáraí, ceithre charbad agus ocht ndamh i gcomhair na ndualgas a bhí le comhlíonadh acu faoi



threoir Íteámár mac Áróin an sagart. ⁹ Ach do chlann Chohát níor thug sé oiread agus ceann, mar na nithe naofa a cuireadh faoina gcúram is ar a nguailí a bhí siad le hiompar.

An Ofráil Tíolactha

¹⁰ Ansin rinne na ceannairí ofráil do thíolacadh na haltóra an lá a unghadh í; d’ofráil na ceannairí a n-ofráil os comhair na haltóra. ¹¹ Dúirt an Tiarna le Maois: “Ofráladís a n-ofrálacha, ceannaire díobh gach lá i ndiaidh a chéile, do thíolacadh na haltóra.”

¹² Ar an gcéad lá sé Nachsón mac Amaíneádáb de threibh Iúdá a thug an ofráil; ¹³ sí ofráil a rinne sé: pláta airgid de mheáchan céad agus a tríocha seicil, báisín airgid de mheachan seachtó seicil airgid – seicil an tsanctóra is é sin – agus iad seo araon lán de phlúr mín measctha le hola don abhlann; ¹⁴ mias óir deich seicil lán de thúis; ¹⁵ tarbh óg, reithe, agus uan fireann bliana don íobairt loiscthe; ¹⁶ pocán gabhair don íobairt pheaca, ¹⁷ agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Nachsón mac Amaíneádáb.

¹⁸ Ar an dara lá sé Natanael mac Zúár ceann Íosácár a thug an ofráil; ¹⁹ sí ofráil a rinne sé: pláta airgid de mheáchan céad agus a tríocha seicil, báisín seachtó seicil airgid – seicil an tsanctóra is é sin – agus iad seo araon lán de phlúr mín measctha le hola don abhlann; ²⁰ mias óir deich seicil lán de thúis; ²¹ tarbh óg, reithe agus uan fireann bliana don íobairt loiscthe; ²² pocán gabhair don íobairt pheaca, ²³ agus, don íobairt chomaoineach, dhá dhamh, cúig reithe, cúig mheannán agus cúig uan bliana fireanna. Ba í sin ofráil Natanael mac Zúár.



²⁴Ar an tríú lá sé Eilíáb mac Haelon ceann chlann Zabúlun a thug an ofráil; ²⁵sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad seo araon lán de phlúr mín measctha le hola don abhlann; ²⁶mias óir deich seicil lán de thúis; ²⁷tarbh óg, reithe agus uan fireann bliana don íobairt loiscthe; ²⁸pocán gabhair don íobairt pheaca, ²⁹agus, don íobairt chomaoineach, dhá dhamh, cúig reithe, cúig mheannán agus cúig uan bliana fireanna. Ba í sin ofráil Eilíáb mac Haelon.

³⁰Ar an gceathrú lá sé Eilíozúr mac Shidéúr ceann chlann Reúbaen a thug an ofráil; ³¹sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad seo araon lán de phlúr mín measctha le hola don abhlann; ³²mias óir deich seicil lán de thúis; ³³tarbh óg, reithe agus uan fireann bliana don íobairt loiscthe; ³⁴pocán gabhair don íobairt pheaca, ³⁵agus, don íobairt chomaoineach, dhá dhamh, cúig reithe, cúig mheannán agus cúig uan bliana fireanna. Ba í sin ofráil Eilíozúr mac Shidéúr.

³⁶Ar an gcúigiú lá sé Sealuimíeil mac Zúiríseadáí ceann chlann Shímeon a thug an ofráil; ³⁷sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad araon lán de phlúr mín measctha le hola don abhlann; ³⁸mias óir deich seicil lán de thúis; ³⁹tarbh óg, reithe, agus uan fireann bliana don íobairt loiscthe; ⁴⁰pocán gabhair don íobairt pheaca, ⁴¹agus, don íobairt chomaoineach, dhá dhamh, cúig reithe, cúig mheannán agus cúig uan bliana fireanna. Ba í sin ofráil Shealuimíeil mac Zúiríseadáí.



⁴²Ar an séú lá sé Eiliásáf mac Dheúael, ceann chlann Ghád a thug an ofráil; ⁴³sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad araon lán de phlúr mín meastha le hola don abhlann; ⁴⁴mias óir deich seicil lán de thúis; ⁴⁵tarbh óg, reithe agus uan fireann bliana don íobairt loiscthe; ⁴⁶pocán gabhair don íobairt pheaca, ⁴⁷agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Eiliásáf mac Dheúael.

⁴⁸Ar an seachtú lá sé Eilíseámá mac Aimíohúd ceann chlann Eafráim, a thug an ofráil; ⁴⁹sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad araon lán de phlúr mín meastha le hola don abhlann; ⁵⁰mias óir deich seicil lán de thúis; ⁵¹tarbh óg, reithe, agus uan fireann bliana don íobairt loiscthe; ⁵²pocán gabhair don íobairt pheaca, ⁵³agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Eilíseámá mac Aimíohúd.

⁵⁴Ar an ochtú lá sé Gamailiéil mac Phadázúr ceann chlann Mhanaise a thug an ofráil; ⁵⁵sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad araon lán de phlúr mín meastha le hola don abhlann; ⁵⁶mias óir deich seicil lán de thúis; ⁵⁷tarbh óg, reithe agus uan fireann bliana don íobairt loiscthe; ⁵⁸pocán gabhair don íobairt pheaca, ⁵⁹agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Ghamailiéil mac Phadázúr.



⁶⁰Ar an naoú lá sé Aibíodan mac Ghideoiní ceann chlann Bhiniáimin a thug an ofráil; ⁶¹sí ofráil a rinne sé: pláta airgid de mheáchan céad agus a tríocha seicil airgid, báisín seachtó seicil airgid – seicil an tsanctóra is é sin – agus iad araon lán de phlúr mín measctha le hola don abhlann; ⁶²mias óir deich seicil lan de thúis; ⁶³tarbh óg, reithe, agus uan fireann bliana don íobairt loiscthe; ⁶⁴pocán gabhair don íobairt pheaca, ⁶⁵agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Aibíodan mac Ghideoiní.

⁶⁶Ar an deichiú lá sé Aichíeizir mac Aimíseadáí ceann chlann Dhán a thug an ofráil; ⁶⁷sí ofráil a rinne sé: pláta airgid de mheáchan céad agus a tríocha seicil airgid, báisín airgid seachtó seicil airgid – seicil an tsanctóra is é sin – agus iad araon lán de phlúr mín measctha le hola don abhlann; ⁶⁸mias óir deich seicil lán de thúis; ⁶⁹tarbh óg, reithe agus uan fireann bliana don íobairt loiscthe; ⁷⁰pocán gabhair don íobairt pheaca, ⁷¹agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Aichíeizir mac Aimíseadáí.

⁷²Ar an aonú lá déag sé Paigíéil mac Ocrán a rinne an ofráil; ⁷³sí ofráil a rinne sé: pláta airgid de mheáchan céad agus a tríocha seicil airgid, báisín airgid seachtó seicil airgid – seicil an tsanctóra is é sin – agus iad araon lán de phlúr mín measctha le hola don abhlann; ⁷⁴mias óir deich seicil lan de thúis; ⁷⁵tarbh óg, reithe agus uan fireann bliana don íobairt loiscthe; ⁷⁶pocán gabhair don íobairt pheaca, ⁷⁷agus, don íobairt chomaoineach, dhá dhamh, cúig reithe, cúig mheannán; agus cúig uan bliana fireanna. Ba í sin ofráil Phaigíéil mac Ocrán.



⁷⁸Ar an dara lá déag sé Aichíora mac Aenán ceann chlann Naftáilí a rinne an íobairt; ⁷⁹sí ofráil a rinne sé: pláta airgid de mheáchan céad agus a tríocha seicil airgid, báisín airgid seachtó seicil airgid – seicil an tsanctóra is é sin – agus iad araon lán de phlúr mín meastha le hola don abhlann; ⁸⁰mias óir deich seicil lán de thúis; ⁸¹tarbh óg reithe agus uan fireann bliana don íobairt loiscthe; ⁸²pocán gabhair don íobairt pheaca, ⁸³agus, don íobairt chomaoineach, dhá dhamh, cúig reithe, cúig mheannán, agus cúig uan bliana fireanna. Ba í sin ofráil Aichíora mac Aenán.

⁸⁴Ba iad seo na hofráilacha a rinne ceannairí Iosrael do thíolacadh na haltóra an lá a ungradh í: dhá phláta déag airgid, dhá bháisín déag airgid, dhá mhias déag óir; ⁸⁵mheáigh gach pláta airgid céad agus a tríocha seicil, agus gach báisín seachtó seicil; agus bhí dhá mhíle ceithre chéad seicil – seicil an tsanctóra – d’airgead sna soithí sin ar fad. ⁸⁶Mheáigh an dá mhias déag óir lán de thúis deich seicil – seicil an tsanctóra – an ceann, agus bhí céad agus a fiche seicil d’ór sna báisíní sin ar fad.

⁸⁷Seo é líon iomlán na n-ainmhithe don uileloscadh: dhá tharbh déag, dhá reithe dhéag, dhá uan fireanna bliana, lena n-abhlanna; dhá phocán déag d’íobairt pheaca. ⁸⁸Agus líon iomlán na n-ainmhithe don íobairt chomaoineach: ceithre tharbh fichead, trí fichid reithe, trí fichid pocán gabhair, trí fichid uan bliana fireann. Ba iadsan na hofráilacha do thíolacadh na haltóra tar éis í a ungradh.

⁸⁹Nuair a chuaigh Maois isteach i mBoth na Teagmhála chun labhairt leis, chuala sé an guth a labhair leis ó lastuas de chathaoir na trócaire a bhí ar áirc na Fianaise ó idir an dá cheiribín. Ansin is ea a labhair sé leis.



Na Lampaí don Choinnleoir

8 Labhair an Tiarna le Maois agus dúirt: ²“Abair le hÁrón: ‘Nuair a dhéanfaidh tú na lampaí a chóiriú, ní foláir do na seacht lampaí a solas a chaitheamh amach os comhair an choinnleora.’” ³Rinne Árón amhlaidh. Chóirigh sé na lampaí le solas a chaitheamh os comhair an choinnleora mar a d’ordaigh an Tiarna do Mhaois. ⁴Ba d’ór buailte an coinnleoir, idir chrann agus bheangáin – ba d’ór buailte iadsan chomh maith. Rinneadh an coinnleoir de réir an phatrúin a thaispeáin an Tiarna do Mhaois.

Na Léivítigh á dTíolacadh

⁵Labhair an Tiarna le Maois agus dúirt: ⁶“Scar na Léivítigh ó chlann Iosrael agus íonaigh iad. ⁷Seo mar atá siad le híonú agat: Croith íonuisce orthu, agus bearraidís a gcorp ar fad agus nídís a gcuid éadaigh. Beidh siad glan ansin. ⁸Faighidís tarbh óg ansin leis an abhlann de phlúr mín meastha le hola a ghabhann leis, agus faigh-se tarbh óg eile d’íobairt pheaca. ⁹Ansin tabhair na Léivítigh os comhair Bhoth na Teagmhála, agus gair le chéile comhthionól uile chlann Iosrael. ¹⁰Nuair a bhéarfaidh tú na Léivítigh i láthair an Tiarna, leagadh clann Iosrael a lámha orthu. ¹¹Ofráladh Árón na Léivítigh ansin mar dhleacht ar leith i láthair an Tiarna thar ceann chlann Iosrael. As sin amach beidh siad tíolactha do sheirbhís an Tiarna.

¹²“Leagadh na Léivítigh ansin a lámha ar cheann na dtarbh, agus déan-sa ceann acu a ofráil mar íobairt pheaca, agus an ceann eile mar íobairt loiscthe don Tiarna. Sin mar atá



an gnás leorghnímh ar son na Léivíteach le comhlíonadh. ¹³Tar éis duit na Léivítigh a chur faoi bhráid Áron agus a chlann mhac, ofráil don Tiarna iad mar dhleacht ar leith.

¹⁴Sin mar atá na Léivítigh le cur i leataobh ón gcuid eile de chlann Iosrael i dtreo go mba liomsa iad. ¹⁵Tosóidh na Léivítigh ansin ar a seirbhís i mBoth na Teagmhála.

“Ní foláir duit iad a ghlanadh agus a ofráil mar dhleacht ar leith, ¹⁶óir tugadh dom go hiomlán mar thoirbheartaigh iad ó i measc chlann Iosrael, agus tá siad le bheith ina n-áit siúd a d’oscail an bhroinn, na céadghinte; rinne mé mo chuid féin díobh as clann Iosrael go léir. ¹⁷Óir is liomsa gach céadghin ar chlann Iosrael, idir fhear agus ainmhí; an lá a mharaigh mé gach céadghin i dtír na hÉigipte, rinne mé iad a choisreacan dom féin, ¹⁸agus anois thóg mé na Léivítigh in áit gach céadghin ar chlann Iosrael. ¹⁹Thug mé na Léivítigh d’Áron agus dá mhaca mar thoirbheartaigh de chlann Iosrael; déanfaidh siad seirbhís i mBoth na Teagmhála thar ceann chlann Iosrael, agus comhlíonfaidh siad gnás an leorghnímh ar son chlann Iosrael i dtreo nach mbuailfeadh aon phlá iadsan má rachadh aon chuid de chlann Iosrael i ngar don sanctóir.”

²⁰Sin mar a rinne Maois agus Áron agus comhthionól uile chlann Iosrael leis na Léivítigh, go cruinn beacht mar a d’ordaigh an Tiarna do Mhaois i dtaobh na Léivíteach; sin mar a rinne clann Iosrael leo. ²¹Ghlan na Léivítigh iad féin ó pheaca, agus nigh siad a gcuid éadaigh; d’ofráil Áron iad mar dhleacht ar leith i láthair an Tiarna. Ansin chomhlíon Áron gnás an leorghnímh thar a gceann á nglanadh. ²²Ansin ghabh na Léivítigh isteach chun a seirbhís a dhéanamh i mBoth na Teagmhála ag fónamh d’Áron agus dá mhaca. Rinneadh leis na Léivítigh de réir mar a d’ordaigh an Tiarna do Mhaois ina dtaobh.



²³Labhair an Tiarna le Maois agus dúirt: ²⁴“Baineann sé seo leis na Léivítigh. Ó aois a cúig fichead amach, ní foláir do na Léivítigh dul isteach chun a gcúram a chomhlíonadh ag freastal i mBoth na Teagmhála. ²⁵Ó aois leathchéad amach níl aon cheangal ar Léivíteach freastal agus ná déanadh sé freastal a thuilleadh, ²⁶ach déanadh sé fónamh dá bhráithre i mBoth na Teagmhála, chun an tseirbhís a chinntiú; ach ná déanadh sé féin áon seirbhís a thuilleadh. Féach chuige gurb í sin an riail do sheirbhís na Léivíteach.”

An Cháisc

9Labhair an Tiarna le Maois i bhfásach Shíonái an chéad mhí den dara bliain tar éis dóibh teacht amach as tír na hÉigipte agus dúirt: ²“Coimeádadh clann Iosrael an Cháisc san am atá ceaptha di. ³An ceathrú lá déag den mhí seo, idir dhá sholas tráthnóna, an t-am atá ceaptha daoibh í a choimeád. Ní foláir daoibh í a cheiliúradh de réir gach dlí agus gnás a bhaineann léi.” ⁴D’ordaigh Maois do chlann Iosrael dá bhrí sin an Cháisc a choimeád. ⁵Cheiliúradar an Cháisc i bhfásach Shíonái, ar an gcéad mhí, ar an gceathrú lá déag den mhí sin, idir dhá sholas tráthnóna. Rinne clann Iosrael go cruinn beacht mar a d’ordaigh an Tiarna dóibh.

⁶Bhí fir áirithe a bhí neamhghlan mar gur bhaineadar le corpán agus nárbh fhéidir dóibh an Cháisc a cheiliúradh an lá sin. Thángadar go Maois agus go hÁrón an lá sin féin, ⁷agus dúirt siad leis: “Táimid fágtha neamhghlan mar gur bhaineamar le corpán; cén fáth a bhfuiltear a chosc orainne oifráil a dhéanamh don Tiarna ag an am cuí in éineacht



leis an gcuid eile de chlann Iosrael?” ⁸D’fhreagair Maois iad: “Fanaigí mar a bhfuil sibh go gcluine mé cad é an t-ordú a thabharfaidh an Tiarna fúibh.”

⁹Labhair an Tiarna le Maois agus dúirt: ¹⁰“Abair le clann Iosrael: ‘Má bhíonn aon duine agaibhse nó de bhur sliocht neamhghlan mar gur bhain sé le corpán, nó má bhíonn sé ar aistear i gcéin, is féidir dó Cáisc a choimeád don Tiarna mar sin féin. ¹¹Coimeádaidís í ar an dara mí, ar an gceathrú lá déag, idir dhá sholas tráthnóna; caithidís an t-uan le harán slim agus le luibheanna searbha; ¹²ná fágтар aon chuid de go maidin, agus ná bristear aon chnámh ann; coimeádaidís an Cháisc seo ar aon dul díreach le gnás na Cásca. ¹³Ach an té atá glan agus nach bhfuil ar aistear, ach nach gcoimeádann an Cháisc san am céanna, gearrtar an duine sin amach óna phobal, mar nár ofráil sé ofráil an Tiarna ag an am a bhí ceaptha; bíodh ualach a pheaca ar an té sin. ¹⁴Má bhíonn coimhthíoch ag cur faoi in bhur measc agus go gcoimeádann an Cháisc don Tiarna, ní foláir dó í a choimeád de réir reacht agus gnás na Cásca. Bíodh an t-aon reacht amháin in bhur measc do dheoraí agus do dhúchasach mar an gcéanna.’”

An Néal

¹⁵An lá a cuireadh suas an taibearnacal, chlúdaigh an néal an taibearnacal agus both na Fianaise. Ó thráthnóna go maidin luigh sé ar an taibearnacal faoi chló tine. ¹⁶D’fholaigh an néal é gan stad dá réir sin, agus é faoi chló tine san oíche. ¹⁷Nuair a d’ardaíodh an néal ón mboth, chuireadh clann Iosrael chun siúil; cibé áit ina luíodh an néal, ansiúd a shuíodh clann Iosrael a gcampa. ¹⁸Faoi ordú an Tiarna a chuireadh clann Iosrael chun bóthair



agus faoi ordú uaidh a shuídís campa. Fad a luigh an néal ar an taibearnacal, d’fhanadar sa champa. ¹⁹Má luíodh an néal tamall fada de laethanta ar an taibearnacal, ghéilleadh clann Iosrael do threoir an Tiarna agus ní scoiridís campa. ²⁰Ach sa chás nach luíodh an néal ach beagán laethanta os cionn an taibearnacail, shuídís campa faoi ordú an Tiarna agus scoiridís campa faoi ordú an Tiarna. ²¹Nuair nach luíodh an néal ach thar oíche go maidin, chuiridís chun siúil nuair a d’ardaíodh sé lá arna mhárach. Nó, nuair a d’fhanadh sé lá agus oíche iomlán, ní bhogaidís go dtí go n-ardaíodh sé. ²²Ar uaire luíodh sé ar feadh dhá lá, nó mí, nó níos faide; dá fhad a d’fhanadh an néal os cionn an taibearnacail, d’fhanadh clann Iosrael sa champa san áit chéanna agus nuair a d’ardaíodh sé chuiridís chun siúil. ²³Faoi ordú an Tiarna shuídís campa, faoi ordú an Tiarna a scoiridís campa. Choinnidís aithne an Tiarna de réir ordú an Tiarna trí Mhaois.

Na Trumpaí

10 Labhair an Tiarna le Maois: ²“Déan dhá thrumpa, déan d’airgead buailte iad. Bain feidhm astu ag gairm an chomhthionóil agus ag scor an champa. ³Nuair a sheídfeair iad araon cruinníodh an comhthionól chugat ag doras Bhoth na Teagmhála. ⁴Nuair nach séidfeair ach ceann, ansin ná cruinníodh i do thimpeall ach an lucht ceannais, ceannairí threibheanna Iosrael. ⁵Nuair a ghabhann gáir chatha leis an séideadh, cuireadh na campaí lastoir chun siúil. ⁶Nuair a dhéanfar an dara séideadh agus go mbíonn gáir chatha leis, cuireadh na campaí laistear chun siúil. Chun an campa a scor, ní foláir gáir chatha a dhul leis an séideadh; ⁷ach chun an comhthionól a chruinniú, déantar an trumpa



a shéideadh gan gháir chatha. ⁸Siad na sagairt, clann Árón, a shéidfidh na trumpaí; dlí síoraí é seo daoibh féin agus do bhur sliocht.

⁹“Nuair a rachaidh sibh chun cogaidh in bhur dtír féin in aghaidh namhad a bhíonn ag déanamh leatroidh oraibh, ní foláir daoibh an trumpa a shéideadh leis an ngáir chatha: ‘Cuimhneofar oraibh i láthair an Tiarna bhur nDia, agus déanfar sibh a fhuascailt ó bhur naimhde!’ ¹⁰In bhur bhféilte chomh maith, in bhur sollúna cinnte agus in bhur bhféilte ré nua, déanfaidh sibh bhur dtrumpaí a shéideadh le linn bhur n-íobairtí loiscthe agus bhur n-íobairtí comaoineach; beidh siadsan mar shás cuimhnithe oraibh i láthair bhur nDÉ. Mise an Tiarna bhur nDia.”

Cuirtear chun Bealaigh

¹¹Sa dara bliain, sa dara mí, ar an bhfichiú lá den mhí sin, d’ardaigh an néal ó thairbearnacal na Fianaise. ¹²Chuir clann Iosrael chun siúil faoi eagar aistir, ó fhásach Shíonáí. Luigh an néal i bhfásach Phárán. ¹³Seo iad an mhuintir a chuir chun bealaigh ar dtús faoi ordú an Tiarna trí bhéal Mhaois: ¹⁴ar tosach bhí bratach champa chlann Iúdá faoi chóiriú catha. I gceannas ar a slua bhí Nachsón mac Amaíneádáb; ¹⁵i gceannas ar threibh chlann Íosácár faoi chóiriú catha bhí Natanael mac Zúár; ¹⁶i gceannas ar threibh chlann Zabúlun faoi chóiriú catha bhí Eilíáb mac Haelon. ¹⁷Nuair a tógadh anuas an tairbearnacal, chuir clann Ghéirseon agus clann Mharáraí chun bealaigh ag iompar an tairbearnacail. ¹⁸Ansin chuir bratach champa chlann Reúbaen chun bealaigh faoi chóiriú catha; i gceannas ar shlua Reúbaen bhí Eilíozúr mac Shidéúr; ¹⁹i gceannas threibh chlann



Shímeon faoi chóiriú catha bhí Sealuimíéil mac Zúiríseadáí; ²⁰i gceannas threibh chlann Ghád faoi chóiriú catha bhí Eiliásáf mac Dheúael.

²¹Ansín chuir clann Chohát chun bealaigh agus na nithe naofa ar iompar acu (bhí an taibearnacal curtha suas roimh iad a theacht). ²²Ansín tháinig bratach champa chlann Eafraím faoi chóiriú catha; i gceannas ar a slua bhí Eilíseámá mac Aimíohúd; ²³i gceannas ar shlua threibh chlann Mhanaise bhí Gamailíéil mac Phadázúr; ²⁴i gceannas ar shlua threibh chlann Bhiniáimin bhí Aibíodan mac Ghideoiní. ²⁵Ar deireadh, thiar, mar chúlgharda ar an gcampa uile, chuir bratach champa chlann Dhán chun bealaigh, faoi chóiriú catha; i gceannas ar a slua bhí Aichéizir mac Aimíseadáí; ²⁶i gceannas ar threibh chlann Áiséar faoi chóiriú catha bhí Paigíéil mac Ocrán; ²⁷i gceannas ar threibh chlann Naftáilí faoi chóiriú catha, bhí Aichíora mac Aenán. ²⁸Ba é sin eagar máirseála chlann Iosrael faoi chóiriú catha. Chuireadar chun bóthair dá bhrí sin.

²⁹Dúirt Maois le Hobáb mac Reúael, an Midiánach, athair a chéile: “Táimid ag cur chun bóthair go dtí an tír a ndúirt an Tiarna faoi: ‘tabharfaidh mé daoibh é’. Tar linn agus déanfaimid do leas, óir gheall an Tiarna sonas do chlann Iosrael.” ³⁰“Ní rachaidh mé faraibh,” ar sé, “imeoidh mé chun mo tíre agus mo mhuintire féin.” ³¹“Ná himigh uainn,” arsa Maois, “mar tá a fhios agat cár féidir dúinn ár gcampa a shuíomh san fhásach; agus beidh tú mar shúile againn. ³²Má thagann tú inár gcoimhdeacht, beidh tú páirteach i ngach beannacht sonais lena mbeannóidh an Tiarna sinn.”

³³Chuir siad chun siúil ó shliabh an Tiarna agus rinne siad taisteal trí lá. Ghabh áirc chonradh an Tiarna ar an aistear trí lá seo ag lorg áit lonnaithe dóibh. ³⁴Agus bhí néal an



Tiarna os a gcionn sa lá cibé uair a d'fhágadar an campa. ³⁵Nuair a chuireadh an áirc chun bóthair deireadh Mhaois:

“Éirigh, a Thiarna, agus go raibh scaipeadh ar do naimhde!
 Agus an dream a bhfuil fuath acu duit,
 Go dteithidís lena n-anam romhat.”

³⁶Agus nuair a stopadh sí, deireadh sé:

“Fill, a Thiarna,
 Ar na mílte ar mhílte d'Iosraelaigh.”

Cnáimhseán

1 Bhí an pobal ag cnáimhseán i dtaobh a gcruatan faoi éisteacht an Tiarna, agus arna gclos don Tiarna d'adhain a fhearg agus las lasair an Tiarna ina measc agus loisc sé imeall den champa. ²Ansin rinne an pobal achainí ar Mhaois agus ghuigh sé chun an Tiarna agus chuaigh an tine in éag. ³Tugadh Tabaerá ar an áit mar gur loisc lasair an Tiarna ina measc. ⁴An daoscarshlua a bhí i measc an phobail, bhuail miangas iad, agus chrom clann Iosrael chomh maith ar lógóireacht arís: “Cé thabharfaidh feoil le hithe dúinn?” ar siad. ⁵“Cad é iasc, mar is cuimhin linn, a d'ithimís in aisce san Éigipt! – agus cúcamair, agus mealbhacáin, agus cainninn, agus oinniúin, agus gairleoga. ⁶Ach anois níl géarú goile againn agus gan ach manna os comhair ár súl againn.” ⁷Anois bhí an manna mar shíol coiriandair, agus dealramh bdellium air. ⁸Ghabhadh an pobal timpeall agus chruinnidís é, agus mheilidís i muilte é, nó bhrúidís le tuairgnín é; dhéanaidís é a bhrúith



ansin i bpotáí, agus dhéanaidís cístí de. Bhí blas air mar a bheadh ar chístí bruite le hola.
⁹Nuair a thiteadh an drúcht ar an gcampa san oíche, thiteadh an manna in éineacht leis.

Guí Mhaois agus an Freagra

¹⁰Chuala Maois an pobal ag lógóireacht, gach clann i mbéal a botha, agus adhnadh fearg an Tiarna go tréan, agus bhí suaitheadh mór ar Mhaois dá bharrsan. ¹¹Dúirt Maois leis an Tiarna: “Cén fáth go bhfuil do shearbhónta agat á chrá? Cén fáth nach bhfuil do ghnaoi orm, ach tú ag cur ualach an phobail seo go léir sa mhullach orm?” ¹²An mise a ghin an mhuintir seo go léir? An mise a thug ar an saol iad a rá is go ndéarfá liom: ‘Beir leat i d’ucht iad mar a dhéanfadh buime le leanbh cíche – chun na tíre a mhionnaigh tú a thabharfá dá n-aithreacha?’ ¹³Cá bhfuil feoil le fáil agamsa le tabhairt don mhuintir seo go léir nuair a thagann siad chugam agus na deora leo á rá: ‘Tabhair dúinn feoil le hithe!’? ¹⁴Ní féidir domsa an pobal seo go léir a iompar liom féin amháin; tá an t-ualach ró-throm dom. ¹⁵Más mar sin is mian leat plé liom, maraigh mé ar an toirt! Uch gan do ghnaoi a bheith orm agus gan mé a fheiceáil truamhéile mar seo le mo shúile cinn!”

¹⁶Dúirt an Tiarna le Maois: “Cruinnigh dom seachtó de sheanóirí Iosrael, daoine is eol duit is sinsir ar an bpobal agus is scríobhaithe acu. Beir leat iad go Both na Teagmhála agus seasaídís ansiúd farat. ¹⁷Tiocfaidh mé anuas chun labhairt leat ansiúd agus tógfaidh mé cuid den spiorad atá ortsa agus cuirfidh mé orthu siúd é. Iompróidh siad mar sin cuid d’ualach na muintire seo in éineacht leat agus ní bheidh ort é a iompar leat féin amháin a thuilleadh. ¹⁸Abair leis an bpobal: ‘Coisricigí sibh féin don lá amárach, agus beidh feoil le



hithe agaibh, óir rinne sibh lógóireacht i gcomhchlos don Tiarna á rá: Cé thabharfaidh feoil le hithe dúinn? Nár bhreá an saol a bhí againn san Éigipt! Uime sin tabharfaidh an Tiarna feoil le hithe daoibh. ¹⁹Ní ar feadh lae amháin, nó dhá lá, nó cúig lá, nó deich lá, nó fiche lá, a íosfaidh sibh í, ²⁰ach ar feadh mí iomlán, go dtí go gcuirfidh sí masmas oraibh agus go mbeidh an ghráin agaibh uirthi, mar gur shéan sibh an Tiarna atá in bhur measc agus go ndearna sibh lógóireacht ina láthair á rá: Cad ab áil linn teacht amach as an Éigipt ar aon chor?”

²¹Dúirt Maois: “Sé líon an phobail i mo thimpeall, sé chéad míle troitheach, agus deir tú: ‘Tabharfaidh mé feoil le hithe dóibh ar feadh mí iomlán!’ ²²Dá marófaí na tréada agus na táinte go léir dóibh, ar leor sin dóibh? Dá mbaileofaí a bhfuil d’iasc san fharraige dóibh, ar leor sin dóibh?” ²³“Ar giorraíodh lámh an Tiarna?” arsa an Tiarna le Maois, “feicfidh tú anois an gcomhlíonfar mo gheallúint duit nó nach ndéanfar.”

²⁴Chuaigh Maois amach dá bhrí sin agus d’inis don phobal cad dúirt an Tiarna; agus chruinnigh sé seachtó de sheanóirí an phobail agus thug leis agus chuir timpeall na Botha iad. ²⁵Ansin tháinig an Tiarna anuas sa néal agus labhair leis agus thóg de cuid den spiorad a bhí air agus chuir ar an seachtó seanóir é. Nuair a luigh an spiorad orthu rinneadar fáidheoireacht. ach ní dhearnadar sin arís.

²⁶D’fhan beirt fhear sa champa – Ealdad a ba ainm do dhuine díobh agus Méadad a ba ainm don duine eile. Luigh an spiorad orthu; cé nach ndeachadar go dtí an Bhoth cláraíodh a n-ainmneacha leis an gcuid eile. Chromadar ar fháidheoireacht sa champa.

²⁷Rith an fear óg leis an scéala go Maois: “Féach! seo Ealdad agus Méadad ag fáidheoireacht sa champa!” ²⁸Ansin dúirt Iósua mac Nún, duine tofa dá chuid a bhíodh ag



fónamh do Mhaois: “A Mhaois, a thiarna, cuir cosc leo!”²⁹ Ach dúirt Maois leis: “An amhlaidh atá formad ort ar mo shonsa? Uch nach fáithe iad pobal an Tiarna ar fad, agus nár chuir an Tiarna a spiorad orthu go léir!”³⁰ Ansin d’fhill Maois, agus seanóirí Iosrael lena chois, ar an gcampa.

³¹Ghabh gaoth amach ón Tiarna agus thiomáin sé gearga isteach ón bhfarráige agus thug anuas iad láimh leis an gcampa. Bhíodar ina luí ansiúd aistear lae, abair, ón gcampa, ina thimpeall ón dá thaobh, agus iad dhá bhanláimh ar airde ar an talamh.³² D’fhan an pobal ar a gcois an lá agus an oíche sin go léir, agus lá arna mhárach chomh maith, ag cruinniú gearg; deich n-ómar an cnuasach is lú a rinne aon duine. Ansin leathadar amach dóibh féin timpeall an champa iad.³³ Bhí an fheoil fós faoina bhfiacra, gan cogaint, nuair a d’adhain fearg an Tiarna in aghaidh an phobail, agus bhuail an Tiarna an pobal le plá rómhór.³⁴ Uime sin tugadh Ciobrót Hatavá (“Uaigheanna an Mhiangais”) ar an áit mar is ansiúd a d’adhacadar an dream a ghéill dá miangas.³⁵ Chuir an pobal chun siúil ó Chiobrót Hatavá go Hazaerót; agus shuíodar a gcampa i Hazaerót.

Gear áin agus Guí

12 Rinne Miriám, agus Árón chomh maith léi, monabhar in aghaidh Mhaois i dtaobh na mná Cuisíteach a phós sé; óir phós sé Cuisíteach mná.² Dúradar: “An trí Mhaois amháin a labhair an Tiarna? Nár labhair sé trínne chomh maith?” Chuala an Tiarna é sin.³ Anois bhí Maois sárumhal, bhí sé ar an duine ba umhla ar talamh.⁴ Labhair an Tiarna de gheit le Maois le hÁrón agus le Miriám: “Tagadh an triúr agaibh amach,” ar



sé, “go Both na Teagmhála.” Chuadar a dtriúr,⁵ agus thuirling an Tiarna ina cholún néil agus sheas ag doras na Botha. Ghlaoiigh sé ar Áróin agus ar Mhiriám agus tháinig siad chun tosaigh.⁶ Dúirt an Tiarna: “Éistigí anois le mo bhriathra:

Más fáidh aon duine in bhur measc,
Cuirim mé féin in aithne dó i bhfis;
Labhraím leis in aisling.

⁷ Ach ní amhlaidh le Maois mo shearbhónta;
Mo theach is baile dó;

⁸ Labhraím leis béal ar bhéal,
Go soiléir gan tomhaiseanna,
Agus feiceann sé cló an Tiarna.

“Conas, más ea, go bhfuil sé de dhánaíocht ionaibh, monabhar a dhéanamh in aghaidh mo shearbhónta Maois?”⁹ Las bladhm feirge an Tiarna ina gcoinne. D’imigh sé leis.¹⁰ Chomh luath agus a d’imigh an néal ón mBoth, ba shin Miriám ina lobhar, chomh geal le sneachta. Chas Áróin agus d’fhéach uirthi; b’shiúd í ina lobhar.

¹¹ Dúirt Áróin le Maois: “Fóir orainn, a thiarna! Ná hagair orainn peaca a rinneamar le baois ach ina bhfuilimid ciontach.”¹² Ná bíodh sí mar árrachtach ag teacht ó bhroinn a mháthar agus leath a chuid feola lofa.”¹³ Ghuigh Maois go hard chun an Tiarna: “A Dhia,” ar sé, “leigheas í le do thoil, impím ort!”¹⁴ Ansin dúirt an Tiarna le Maois: “Mura ndéanfadh a hathair ach seile a chaitheamh san aghaidh uirthi, nach mbeadh sí ina ceap náire ar feadh seacht lá? Cuirtear ar leithrigh amach ón gcampa í ar feadh seacht lá, agus ansin ina dhiaidh sin tugtar isteach arís í.”¹⁵ Cuireadh Miriám ar leithrigh dá bhrí sin



amach ón gcampa ar feadh seacht lá agus níor chuir an pobal chun bealaigh gur tugadh Miriám isteach arís. ¹⁶ Ansin d’imigh na daoine ó Hazaerót agus shuíodar campa i bhfásach Phárán.

Taiscéalaíocht

13 Labhair an Tiarna le Maois agus dúirt: ² “Seol amach fir, fear as gach treibh, chun tír Chanán atá á thabhairt agam do chlann Iosrael a spiúnadh. Seol ceannaire gach treibhe.” ³ Faoi ordú an Tiarna dá bhrí sin sheol Maois iad ó fhásach Phárán; ba cheannairí ar chlann Iosrael na fir seo go léir; ⁴ is iad seo a n-ainmneacha: Thar ceann treibh Reúbaen, Seamua mac Zacúr. ⁵ Thar ceann treibh Shímeon, Seáfát mac Hóraí. ⁶ Thar ceann treibh Iúdá, Cálaeb mac Iafuna. ⁷ Thar ceann treibh Íosácár, Igeal mac Iósaef. ⁸ Thar ceann treibh Eafráim, Hóiséa mac Nún. ⁹ Thar ceann treibh Bhiniáimin, Pailtí mac Ráfú. ¹⁰ Thar ceann treibh Zabúlun, Gaidiéil mac Shóidí. ¹¹ Thar ceann treibh Iósaef, thar ceann treibh Mhanaise, Gaidí mac Shúsaí. ¹² Thar ceann treibh Dhán, Aimíael mac Ghamailí. ¹³ Thar ceann treibh Áiséar, Satúr mac Mhíocáeil. ¹⁴ Thar ceann treibh Naftáilí, Nachbaí mac Vofsaí. ¹⁵ Thar ceann treibh Ghád, Geúeil mac Mhácaí.

¹⁶ Sin iad ainmneacha na ndaoine a sheol Maois uaidh ag taiscéaladh na tíre. Ansin thug Maois an t-ainm Iósua ar Hóiséa mac Nún. ¹⁷ Chuir Maois uaidh iad chun taiscéaladh a dhéanamh ar Chanán. “Téigí suas isteach san Neigib,” ar sé leo, “agus as sin go dtí na hardáin; ¹⁸ faighigí amach cén sórt tíre é, agus cén sórt iad lucht a áitrithe, an tréan nó lag dóibh, an tiubh nó gann dóibh; ¹⁹ an talamh maith nó drochthalamh atá fúthu;



cén sórt bailte atá acu, an bhfuilid gan chosaint nó an caisil iad; ²⁰ an bhfuil an ithir féin saibhir nó bocht, faoi choillte nó a mhalairt. Bíodh misneach agaibh agus tugaigí cuid de thorthaí na tíre ar ais libh.” Ba é séasur na bhfíniúna luatha é.

²¹ Chuadar suas dá bhrí sin, chun an tír a bhrath, ó fhásach Zin go dtí Rachob agus Bealach Hamát. ²² Ghabhadar ó thuaidh fan an Neigib go dtí Heabrón mar a raibh cónaí ar chlann Anac, Aichíomán agus Séisea agus Talmái (bunaíodh Heabrón seacht mbliana roimh Zoan san Éigipt). ²³ Thángadar go dtí Gleann Eisciol agus ghearradar craobh fíniúna ann le crobhaing caor; thug beirt acu leo í ar chuaille eatarthu; thugadar leo chomh maith pomagránaití agus figí. ²⁴ Tugadh Gleann Eisciol (“Crobhaing”) ar an áit ón gcrobhaing a ghearr clann Iosrael anuas ansiúd.

²⁵ Tar éis daichead lá d’fhilleadar óna dtaiscéaladh ar an tír. ²⁶ Thángadar go dtí Maois, Árón agus go comhthionól uile chlann Iosrael i bhfásach Phárán ag Cáidéis. Thugadar a dtuairisc dóibhsean agus don chomhthionól go léir agus thaispeánadar torthaí na tíre dóibh. ²⁷ Mar seo a dúradar: “Ghabhamar isteach sa tír inar sheol tú sinn; tá bainne agus mil ina slaoda ann, go deimhin, agus seo cuid dá thoradh. ²⁸ Dream cumhachtach iad siúd a chónaíonn ann áfach; tá cóir chosanta ar a mbailte agus tá siad an-mhór; agus, sea, chonaiceamar sliocht Anac ann. ²⁹ Tá seilbh ag an Amailéiceach ar dhúiche an Neigib; ag an Hiteach an Amórach agus an Iabúsach ar na hardáin, agus ag an gCanánach ar fheorainn na farraige agus na Iordaine.”

³⁰ Bhí Cálaeb ag gríosú na ndaoine i láthair Mhaois agus dúirt: “Ar aghaidh linn gan mhoill agus gabhaimís seilbh ar an tír seo; is féidir dúinn é a smachtú.” ³¹ Ach dúirt na daoine a chuaigh suas fairis: “Ní féidir dúinn máirseáil i gcoinne na ndaoine seo; is treise



iad ná sinne.”³² Ansin chromadar ar thromaíocht le clann Iosrael ar an tír a bhí braite acu: “An tír a ndeachamar ag taiscéaladh air, is tír é a alpann lucht a áitrithe. Bhí toirt ainspiantha i ngach fear dá bhfacamar ann.”³³ Chonaiceamar, chonaiceamar sin, fathaigh ann (clann Anac, sliocht na bhfathach) agus ba gheall le dreoilíní teaspaigh sinn féin, dar linn, agus bhíodarsan den tuairim gur míoltóga sinn.”

Easumhlaíocht Iosrael - Fearg an Tiarna

14 Ansin thóg an comhthionól uile gáir in ard a gcinn agus bhí na daoine ag lógóireacht ar feadh na hoíche ar fad.² Chrom clann Iosrael go léir ag monabhar in aghaidh Mhaois agus Árón, agus dúirt an comhthionól uile leo: “Uch nach bhfuairamar bás i dtír na hÉigipte! nó ar a laghad nach bhfuairamar bás san fhásach seo!”³ Cad ab áil leis an Tiarna dár dtabhairt isteach sa tír seo d’fhonn go dtitimís de rinn claímh agus go ngabhfaí ár mná agus ár miondaoine mar chreach? Nárbh fhearr dúinn filleadh ar an Éigipt?”⁴ Dúradar le chéile ansin: “Ceapaimís ceannaire agus fillimís ar an Éigipt.”

⁵ Ansin chaith Maois agus Árón iad féin ar a mbéal agus ar a bhfiacra os comhair chruinniú chomhthionól chlann Iosrael go léir.⁶ Iósua mac Nún agus Cálaeb mac Iafuna, beirt de lucht braite na tíre, stróic siad a n-éadaí,⁷ agus dúradar le comhthionól chlann Iosrael go léir: “An tír a ghabhamar á thaiscéaladh, is tír mhaith é, tír fhónta.”⁸ Má bhíonn an Tiarna sásta linn, seolfaidh sé isteach sa tír seo sinn agus tabharfaidh sé dúinn é. Is tír é ina bhfuil bainne agus mil ina slaoda.⁹ Ná déanaigí ceannaire in aghaidh an Tiarna. Ná bíodh eagla oraibh roimh mhuintir na tíre seo; déanfaimid iad a alpadh. Tá scáil a



gcumhdaithe scartha leo, fad tá an Tiarna inár gcoimhdeacht. Na bíodh eagla oraibh rompu.”

¹⁰Ag caint ar ghabháil de chlocha orthu a bhí an comhthionól go léir nuair a thaispeáin glóir an Tiarna í féin ag Both na Teagmhála do chlann Iosrael. ¹¹Dúirt an Tiarna le Maois: “An fada a bheidh an pobal seo do mo mhaslú? An fada a dhiúltóidh siad creideamh ionam d’ainneoin na gcomharthaí go léir a rinne mé ina measc? ¹²Buailfidh mé le plá iad agus fágfaidh mé gan oidhreacht iad; agus déanfaidh mé cine nua díotsa, cine is mó agus is treise ná iad.”

¹³D’fhreagair Maois an Tiarna agus dúirt: “Tá sé cloiste ag na hÉigiptigh cheana féin, go dtug tusa an pobal seo, trí do chumhacht féin, amach óna measc. ¹⁴Tá sin ráite cheana féin acu le muintir na tíre seo. Tá a fhios acu cheana féin go bhfuil tusa, a Thiarna, i lár an phobail seo, agus go dtaispeánann tú thú féin dóibh gnúis le gnúis; gurb é do néalsa, a Thiarna, a stadann os a gcionn, agus go dtéann tú rompu mar cholún néil sa lá agus mar cholún tine san oíche. ¹⁵Má mharaíonn tú an mhuintir seo anois d’aon iarracht, déarfaidh na ciníocha a chuala i do thaobh: ¹⁶Níor fhéad an Tiarna an mhuintir seo a thabhairt isteach sa tír a mhionnaigh sé a thabharfadh sé dóibh, agus dá bhrí sin rinne sé ár orthu san fhásach.’ ¹⁷I bhfad uait anois é, impím ort. Taispeáin do chumhacht anois de réir na mbriathra a labhair tú: ¹⁸Is mall é an Tiarna chun feirge, is lán é de bhuanghrá; maitheann sé coir agus peaca, ach ní fhágann sé aon ní gan díolt, ag agairt cion na n-aithreacha ar an gclann agus ar chlann na clainne go dtí an tríú agus an ceathrú glúin.’ ¹⁹Ó lánmhaire do bhuanghra dá bhrí sin, maith peaca an phobail seo, faoi mar atá maite agat don phobal seo ón Éigipt go dtí seo.”



²⁰ Ansin dúirt an Tiarna: “Maithim dóibh mar a iarrann tú. ²¹ Ach, dar mo bheo agus dar glóir an Tiarna a líonann an domhan uile, ²² an mhuintir seo go léir a chonaic mo ghlóir agus na hiontais a rinne mé san Éigipt agus san fhásach, agus a rinne mé a phromhadh faoi dheich cheana féin gan géilleadh do mo ghlór ²³ ní fheicfidh duine díobh an tír a mhionnaigh mé a thabharfainn dá n-aithreacha; ní fheicfidh duine den dream a chaith drochmheas liom é. ²⁴ Ach tá malairt spioraid i mo shearbhónta Cálaeb. De bhrí go ndearna sé rud orm go beacht, tabharfaidh mé isteach é sa tír ina ndeachaigh sé agus beidh seilbh ag a shliocht air. ²⁵ (Tá an tAmailéiceach agus an Canánach ag cur fúthu sa mhachaire). Casaigí ar bhur sáil amárach agus filligí ar ais ar an bhfásach i dtreo na Mara Súf.”

²⁶ Labhair an Tiarna le Maois agus le hÁrón: ²⁷ “An fada a bheidh an mhuintir chlaon seo ag monabhar i m’aghaidh? Chuala mé na gearáin atá á ndéanamh ag clann Iosrael i m’aghaidh. ²⁸ Abair leo: ‘Dar mo bheo – sé an Tiarna atá ag caint – tabharfaidh mé íde oraibh díreach de réir na bhfocal a dúirt sibh i mo láthair. ²⁹ Titfidh bhur gconablaigh san fhásach seo; sea de líon bhur bhfear go léir a áiríodh sa daonáireamh ó aois fiche bliain agus breis, a rinne gearán i m’aghaidh, ³⁰ mionnaim nach rachaidh duine isteach sa tír a mhionnaigh mé a thabharfainn mar áitreabh daoibh, ³¹ ach Cálaeb mac Iafuna agus Iósua mac Nún. ³² Agus bhur leanaí a dúirt sibh a d’fhuadófaí mar chreach, tabharfaidh mé isteach iad chun aithne a chur ar an talamh ba bheag oraibhse. ³³ Ach maidir libhse, titfidh bhur gconablaigh san fhásach seo agus beidh bhur gclann ina n-aoirí san fhásach ar feadh daichead bliain, ag iompar ualach bhur mídhílseachta go sínfear an duine deireanach díbh marbh san fhásach. ³⁴ Ar feadh daichead lá bhí an tír á bhrath agaibh; seasóidh gach lá do



bhliain; ar feadh daichead bliain déanfaidh sibh ualach bhur bpeacaí a iompar agus beidh a fhios agaibh cad is brí le mé a shéanadh.’³⁵ Mise an Tiarna a labhair. Sin í an íde a thabharfaidh mé go cinnte ar an mhuintir chlaon seo go léir a rinne comhcheilg i m’aghaidh. Anseo san fhásach seo déanfar díth orthu go dtí go dtiteann an duine deireanach marbh ann.”

³⁶Na fir a sheol Maois chun an tír a bhrath, agus a chrom tar éis filleadh dóibh ar mhuintir Iosrael a ghríosú chun cnáimhseála in aghaidh an Tiarna lena ndrochthuirisc ar an tír,³⁷ na fir seo a thug an drochthuirisc ar an tír, bhuail an phlá marbh iad os comhair an Tiarna.³⁸Níor fágadh beo de lucht braite na tíre ach Iósua mac Nún agus Cálaeb mac Iafuna.

³⁹D’inis Maois na focail seo do chlann Iosrael go léir agus ba mhór í a lógóireacht.
⁴⁰Ansin d’éiríodar go moch agus chuireadar chun bealaigh i dtreo arda na sléibhte á rá: “Seo anseo sinn, cuirimís chun bealaigh i dtreo na háite sin ó dúirt an Tiarna linn gur pheacaíomar.”⁴¹D’fhreagair Maois: “Cad ab áil libh ag diúltú d’ordú an Tiarna? Ní bheidh aon ní agaibh dá thairbhe.”⁴²Ná gabhaigí suas mar níl an Tiarna in bhur gcoimhdeacht, agus ná scriosadh bhur naimhde sibh.⁴³Sin é an tAmailéiceach agus an Canánach os bhur gcoinne agus titfidh sibh de rinn a gclaímh mar gur thug sibh droim le lorg an Tiarna agus níl an Tiarna in bhur gcoimhdeacht.”⁴⁴Ach le barr dánaíochta chuireadar chun bealaigh suas chun arda na sléibhte cé nár fhág áirc chonradh an Tiarna ná Maois an campa.⁴⁵Ansin an tAmailéiceach agus an Canánach a bhí ag cur fúthu sna hardáin sin, tháingadar anuas agus bhriseadar orthu agus chuadar sa tóir orthu síos amach go Hormá.



Abhlann leis an íobairt

15 Labhair an Tiarna le Maois agus dúirt: ²“Abair é seo le clann Iosrael: ‘Nuair a shroichfidh sibh an tír mar a bhfuil sibh le cur fúibh, agus atá á thabhairt agam daoibh, ³ agus go ndéanann sibh, mar chumhracht a thaitneoidh leis an Tiarna de rogha an tréada nó na tána, ofráil dhóite don Tiarna mar uileloscadh nó mar íobairt, cibé acu ag fuascailt móide é, nó mar ofráil dheonach, nó ar ócáid féile sollúnta de bhur gcuid, ⁴ ní foláir don ofrálaí, mar bhronntanas uaidh féin don Tiarna, a bhreith leis mar abhlann, deachú éafá de phlúr mín measctha le ceathrú hín ola; ⁵ agus ní foláir duit íobairt dhoirte fíona a dhéanamh, ceathrú hín do gach uan, chomh maith leis an uileloisctheach nó an íobairt. ⁶ I gcás reithe, ní foláir duit dhá dheachú éafá de phlúr mín measctha le trian hín ola a bheith agat mar abhlann, ⁷ agus íobairt dhoirte de thrian hín fíona, le bheith ina bholadh cumhra a thaitneoidh leis an Tiarna. ⁸ Sa chás gur tarbh a bhíonn á ofráil agat mar uileloscadh nó mar íobairt, cibé acu ag fuascailt móide é nó mar íobairt chomaoineach don Tiarna, ⁹ ní foláir, chomh maith leis an tarbh, trí dheachú éafá de phlúr mín measctha le leath hín ola a ofráil mar abhlann, ¹⁰ agus ní foláir duit leath hín fíona a ofráil mar íobairt dhoirte, íobairt dhóite a dtaitneoidh a cumhracht leis an Tiarna. ¹¹ Ní foláir déanamh mar sin le gach tarbh nó reithe, le gach uan nó meannán fireann. ¹² Cibé líon íobarthach a bhíonn agaibh le híobairt, déanaigí mar sin le gach ceann díobh cibé a líon. ¹³ Déantar mar sin ag gach dúchasach nuair a dhéanann sé íobairt dhóite, boladh cumhra a thaitneoidh leis an Tiarna. ¹⁴ Aon duine deoranta a bhíonn ag cur faoi in bhur measc, nó i measc bhur sleachta, más áil leis íobairt dhóite a dhéanamh, boladh cumhra a thaitneoidh



leis an Tiarna, déanadh sé mar a dhéanann sibhse; déanadh ¹⁵an comhthionól amhlaidh chomh maith. Ní bheidh ach an t-aon reacht amháin daoibh féin agus don duine deoranta a chuireann faoi in bhur measc. Reacht síoraí é seo a cheanglóidh bhur sliocht i gcónaí: i láthair an Tiarna, is ionann tusa agus an coimthíoch; ¹⁶ná bíodh ach an t-aon reacht amháin, an t-aon dlí amháin, daoibh féin agus don duine deoranta a chuireann faoi in bhur measc.”“

Céadtorthaí Aráin

¹⁷Labhair an Tiarna le Maois agus dúirt: ¹⁸“Labhair le clann Iosrael agus abair leo: Nuair a rachaidh sibh isteach sa tír a bhfuilim do bhur dtabhairt ann, ¹⁹ní foláir daoibh roinn a ofráil don Tiarna nuair bheidh arán na tíre á chaitheamh agaibh. ²⁰Cuirigí i leataobh bairín mar ofráil de chéadthoradh bhur dtaois; cuirigí i láthair é mar ofráil ó bhur n-urlár buailte. ²¹Ní foláir daoibh cuid de thús bhur dtaois a chur i leataobh don Tiarna; déantar amhlaidh ag sliocht bhur sleachta.

Leorghníomh

²²Má theipeann ort, trí neamhaire, maidir le haon cheann de na haitheanta a thug an Tiarna do Mhaois ²³(sé atá i gceist ná gach aon ordú riamh a leag an Tiarna oraibh trí Mhaois ón lá a thug sé a aitheanta daoibhse agus ar aghaidh go dtí bhur sliocht), ²⁴mar seo atá le déanamh: Más neamhaire an chomhthionóil uile a bhíonn i gceist, déanadh an



comhthionól uile íobairt uileloiscthe de tharbh óg, boladh cumhra a thaitneoidh leis an Tiarna, mar aon lena abhlann agus lena íobairt dhoirte de réir gnáis; agus ofráiltear pocán gabhair mar íobairt pheaca. ²⁵ Déanadh an sagart gnás an leorghnímh a chomhlíonadh do chomhthionól uile chlann Iosrael, agus tabharfar maithiúnas dóibh, mar ba trí neamhaire é. Nuair a bhíonn a n-ofráil tugtha acu mar íobairt dhóite don Tiarna, agus go mbíonn a n-íobairt pheaca curtha i láthair an Tiarna acu chun leorghníomh a dhéanamh ar son a neamhaire, ²⁶ tabharfar maithiúnas do chomhthionól chlann Iosrael ar fad, agus don choimhthíoch ag cur faoi ina measc, óir rinne an pobal go léir peaca trí neamhaire.

²⁷ Más duine aonair a pheacaíonn trí neamhaire, ofráladh sé meannán bainneann bliana mar íobairt pheaca. ²⁸ Ní foláir don sagart gnás an leorghnímh a chomhlíonadh i láthair an Tiarna don duine a chuaigh ar seachrán agus a pheacaigh trí neamhaire; nuair a bhíonn gnás an leorghnímh comhlíonta dó, maithfear dó, ²⁹ cibé acu dúchasach, duine de chlann Iosrael é, nó deoraí ag cur faoi ina measc. Ná bíodh ach an t-aon dlí amháin in bhur measc don té a pheacaíonn le neamhaire.

³⁰ Ach an té a pheacaíonn d'aonghnó, más dúchasach, más coimhthíoch, tugann sé masla don Tiarna féin. Déantar an duine sin a ghearradh amach óna phobal; ³¹ tá briathar an Tiarna tarcaisnithe aige agus a aithne briste aige. Ní foláir an duine sin a ghearradh amach ar fad; leanann a pheaca sa mhullach air.”

An tSabóid

³² Fad a bhí clann Iosrael san fhásach, fuarthas fear ag bailiú broсна ar an tsabóid. ³³ An dream a rug air ag bailiú broсна, thugadar leo é os comhair Mhaois agus Árón agus an



chomhthionóil go léir. ³⁴Coimeádadh i ngéibheann é mar nach raibh sé socair fós cén pionós a bhí le cur air. ³⁵Dúirt an Tiarna le Maois: “Ní foláir an duine seo a chur chun báis; ní foláir don chomhthionól go léir gabháil de chlocha ann lasmuigh den champa.”

³⁶Rug an comhthionól go léir leo é lasmuigh den champa agus ghabhadar de chlocha ann go dtí go raibh sé marbh, faoi mar a d’ordaigh an Tiarna do Mhaois.

Scothóga

³⁷Labhair an Tiarna le Maois agus dúirt: ³⁸“Labhair le clann Iosrael agus abair leo scothóga a chur ar fháithimí a mbrat ó ghlúin go glúin, agus ribín corcra a chur ar an scothóg ag an bhfáithim. ³⁹Bíodh an scothóg agaibh dá bhrí sin le féachaint uirthi le haitheanta uile an Tiarna a chur i gcuimhne daoibh; cuirigí i ngníomh iad más ea agus ná leanaigí mianta bhur gcroí agus bhur súl a thuilleadh, óir sheoladar sibh ar bhealach an striapachais. ⁴⁰Cuirfidh an rud seo m’aitheanta go léir i gcuimhne daoibh; cuirigí i ngníomh iad agus bígí coisricthe do bhur nDia. ⁴¹Mise an Tiarna, bhur nDia, a thug sibh amach as tír na hÉigipte d’fhonn go mbeinn mar Dhia agaibh; mise an Tiarna bhur nDia.”

Ceannairc Chorach, Dhátán agus Aibíorám

16Corach mac Izeár, mac Chohát, mac Léiví, agus Dátán agus Aibíorám mic Eilíáb agus Ón mac Pheilít – mic le Reúbaen a ba ea Eilíáb agus Peilít – ²ghabhadar cabhair fear chucu agus d’eiríodar amach in aghaidh Mhaois, agus mar aon leo dhá chead



caoga de chlann Iosrael, ceannairí sa chomhthionól, fir a bhí oirearc sna féilte sollúnta, lucht dea-cháile. ³Chruinníodar seo le chéile in aghaidh Mhaois agus Áron agus dúradar leo: “Tá sibh dultha thar fóir! Tá an comhthionól go léir coisricthe, gach duine riamh díobh, agus maireann an Tiarna ina gcoimhdeacht. Cad ab áil libh dá bhrí sin do bhur geur féin os cionn chomhthionól an Tiarna?” ⁴Arna chlos sin do Mhaois chaith sé é féin ar a bhéal agus ar a fhiacra ⁵agus dúirt le Corach agus lena lucht leanúna go léir: “Ar maidin amárach, nochtfaidh an Tiarna cé is leis, agus cé hé an duine coisricthe a scaoilfidh sé ina chónagar. An té a scaoilfidh sé ina chónagar, sin é an té a thogh sé. ⁶Sé seo atá le déanamh agaibh: tógaigí túiseoirí Chorach agus a lucht leanúna go léir; ⁷cuirigí tine iontu agus cuirigí túis iontu i láthair an Tiarna amárach. Sé an té atá coisricthe a thoghfaidh an Tiarna. Tá sibh dultha thar fóir, a mhaca Léiví.”

⁸Dúirt Maois le Corach: “Tugaigí cluas dom anois, a mhaca Léiví. ⁹An beag libh é go ndearna Dia Iosrael sibh a dheighilt ó chomhthionól Iosrael do bhur mbreith ina chomharsanacht féin, le seirbhís a dhéanamh i dtaibearnacal an Tiarna, agus le seasamh os comhair an chomhthionóil seo ag comhlíonadh na ngnásanna ar a son?” ¹⁰Ghlaoigh sé ort le bheith taobh leis, tú féin agus do chomhbhráithre, clann Léiví, in éineacht leat, agus seo thú anois ag tnúth leis an tsagartacht chomh maith. ¹¹Uime sin is in aghaidh an Tiarna féin a rinne tú féin agus do lucht leanúna go léir an tóstal; cad é Áron go ndéanfadh sibh monabhar ina aghaidh?”

¹²Ghlaoigh Maois chuige ar Dhátán agus ar Aibíorám clann Eilíáb. D’fhreagraíodar: “Ní thiocfam! ¹³Nár leor sinn a thabhairt ó thír ina raibh bainne agus mil ina slaoda le bás a fháil san fhásach seo, agus gan a bheith ag iarraidh bheith i do thiarna orainn anois?”



¹⁴ Agus tharais sin, níor thug tú sinn isteach in aon tír ina bhfuil bainne agus mil ina slaoda ann, ná níor bhronn tú aon tailte ná fíonghoirt mar oidhreacht orainn. An amhlaidh is dóigh leat gur dall atá na daoine seo? Ní thiocfam.” ¹⁵Tháinig fraoch feirge ar Mhaois agus dúirt sé leis an Tiarna: “Ná tabhair aon aird ar a n-ofráil. Níor ghlac mé fiú le hasal uathu, ní mó ná sin a rinne mé dochar d’aon duine acu.”

¹⁶Dúirt Maois le Corach: “Tar féin agus do lucht leanúna go léir os comhair an Tiarna amárach – tusa agus iadsan agus Árón chomh maith. ¹⁷Tugadh gach duine agaibh a thúiseoir leis, cuireadh sé túis ann, agus beireadh sé a thúiseoir i láthair an Tiarna – dhá chéad caoga túiseoir; tú féin agus Árón chomh maith, beireadh gach duine agaibh a thúiseoir leis.” ¹⁸Thóg gach fear a thúiseoir más ea, chuir tine ann, agus chuir túis ar an tine. Bhíodar ina seasamh ag doras Bhoth na Teagmhála agus Maois agus Árón in éineacht leo. ¹⁹Ansin nuair a bhí an comhthionól go léir cruinnithe ag Corach in aghaidh na beirte ag doras Bhoth na Teagmhála, foilsíodh glóir an Tiarna don chomhthionól go léir.

²⁰Dúirt an Tiarna le Maois agus le hÁrón: ²¹“Scarraigí ón bpobal seo, mar go bhfuilimse chun iad a scrios ar an toirt.” ²²Ach chaitheadarsan iad féin ar an mbéal agus ar a bhfiacra, agus dúradar: “A Dhia, a Dhia na spiorad a chuireann anam i ngach feoil, an mbeidh fearg ort leis an gcomhthionól uile de bharr peaca aon duine amháin?”

²³D’fhreagair an Tiarna: ²⁴“Abair é seo,” ar sé, “leis an gcomhthionól: ‘Druidigí glan amach ó chónagar áitreabh Chorach (agus Dhátán agus Aibíorám).’”

²⁵D’éirigh Maois ina sheasamh ansin agus chuaigh go Dátán agus Aibíorám, agus lean seanóirí Iosrael é. ²⁶Dúirt sé leis an gcomhthionól: “Druidigí amach, impím oraibh, ó



bhothanna na bhfear claon seo, agus ná bainigí le haon ní is leo le heagla go scuabfaí sibhse leis chun siúil lena bpeacaí go léir.”²⁷ Dhruideadar amach dá bhrí sin ó chóngar áitreabh Chorach.

Bhí Dátán agus Aibíorám tagtha amach agus iad ina seasamh i mbéal a mbothanna, agus a mná agus a mic agus a leanaí beaga in éineacht leo.²⁸ Labhair Maois: “Leis seo,” ar sé, “beidh a fhios agaibh gur sheol an Tiarna féin mé chun na hoibreacha seo a dhéanamh, agus nach de mo rogha féin é: ²⁹ má fhaigheann na daoine seo bás de bhás coiteann, nó más í cinniúint gach duine a bhuaileann iad, ansin níor sheol an Tiarna mé.³⁰ Ach má dhéanann an Tiarna rud éigin nua glan, má osclaíonn an talamh a chraos agus iad a shlogadh, iad féin agus gach a mbaineann leo, i dtreo go dtéann siad síos ina mbeatha go Seól, ansin beidh fhios agaibh gur shéan na fir seo an Tiarna.”

³¹Ní raibh ach a dheireadh sin uile ráite aige nuair a scoilt an talamh ar leathadh fúthu, ³²d’oscail an talamh a chraos agus shlog sé iad, agus líon a dtithe mar aon leo, agus lucht Chorach, agus a sealúchas uile.³³ Chuadar síos ina mbeatha go Seól, iad féin agus gach ar bhain leo; dhún an talamh orthu agus bhíodar sciobtha ó lár an chomhthionóil.³⁴ Theith na hIosraelaigh go léir a bhí ina dtimpeall roimh a liú; óir, a dúradar: “Ná slogadh an talamh sinn!”³⁵ Tháinig lasair anuas ón Tiarna agus loisc sé an dá chead caoga fear ag ofráil na túise.

³⁶Ansin labhair an Tiarna le Maois agus dúirt: ³⁷“Abair le Eileázár mac Áron an sagart na túiseoirí a thógáil as an ngríosach agus an tine neamhdhleathach seo a scaipeadh ar fud an bhaill, ³⁸óir tá túiseoirí seo na bpeacach coisricthe in éiric a n-anamacha. Ós rud é gur ofráladar os comhair an Tiarna iad agus gur coisriceadh iad, déantar an miotal iontu



a bhualadh amach ina bhileoga mar chumhdach don altóir. Beidh siad ansin ina sampla do chlann Iosrael.”³⁹ Thóg Eileázár an sagart na túiseoirí cré-umha a d’iompar an dream a loisceadh, agus buaileadh amach ina mbileoga iad mar chumhdach don altóir,⁴⁰ lé bheith ina sampla do chlann Iosrael á chur i gcuimhne dóibh nach ceadmhach d’aon duine nach sagart agus nach de shíol Áron, teacht i ngaobhar an Tiarna le tuis a dhó, le heagla gurb é dála Chorach agus a chomplachta ba chríoch dó, faoi mar a dúirt an Tiarna le hEileázár trí bhéal Mhaois.

⁴¹Lá arna mhárach bhí comhthionól uile chlann Iosrael ag monabhar in aghaidh Mhaois agus in aghaidh Áron, á rá: “Tá an bás tugtha agat sa mhullach ar phobal an Tiarna!”⁴² Agus an comhthionól go léir ag cruinniú le chéile in aghaidh Mhaois agus Áron, d’fhéachadarsan i dtreo Bhoth na Teagmhála, agus b’shiud é an néal á chlúdach agus glóir an Tiarna á thaispeáint.⁴³ Chuaigh Maois agus Áron go doras Bhoth na Teagmhála,⁴⁴ agus labhair an Tiarna le Maois:⁴⁵ “Druid glan amach ón gcomhthionól seo; táim ar tí iad a scrios ar an toirt.” Agus chaitheadar iad féin ar a mbéal agus ar a bhfiacra.⁴⁶ Ansin dúirt Maois le hÁron: “Tóg do thúiseoir, cuir tine ón altóir ann, agus leag tuis air, agus brostaigh leis go dtí an comhthionól chun gnás an leorghnímh a chomhlíonadh dóibh; óir tá fraoch na feirge sceite anuas ón Tiarna agus tá an phlá sa siúl.”⁴⁷ Rinne Áron rud ar Mhaois, agus rith faoin gcomhthionól, agus féach bhí an phlá sa siúl ina measc. Chuir sé an tuis isteach agus chomhlíon sé gnás an leorghnímh ar son an phobail.⁴⁸ Ansin sheas sé idir na beo agus na mairbh, agus stad an plhá.⁴⁹ Ba é líon na ndaoine a mharaigh an phlá sin, ceithre mhíle dhéag agus seacht gcéad seachas iad siúd a fuair bás



de bharr Chorach.⁵⁰ Agus d’fhill Árón ar Mhaois ag doras Bhoth na Teagmhála; bhí an phlá thart.

Craobh Árón

17 Labhair an Tiarna le Maois agus dúirt: ²“Labhair le clann Iosrael agus abair leo craobhacha a thabhairt duit, craobh thar ceann gach teaghlaigh athartha; tugadh na ceannairí le chéile dosaon craobh thar ceann a dteaghlach athartha. Scríobh ainm gach duine ar a chraobh ³agus scríobh ainm Árón ar chraobh Léiví; óir beidh craobh do cheann gach teaghlaigh athartha. ⁴Ansín cuir iad i mBoth na Teagmhála, os comhair na Fianaise, mar a dteagmhaím leat. ⁵An té a dtiocfaidh bláth ar a chraobh, sin é an té atá tofa agam; sin mar a chuirfidh mé deireadh leis na gearáin atá á ndéanamh ag clann Iosrael i d’aghaidh.” ⁶Labhair Maois le hIosrael agus thug a gceannairí go léir craobh an duine dó, dosaon craobh ar fad thar ceann na dteaghlach athartha; bhí craobh Árón i measc na gcraobhacha. ⁷Leag Maois iad i mBoth na Teagmhála i láthair an Tiarna. ⁸Lá arna mhárach ghabh Maois isteach i mBoth na Fianaise agus b’shiúd í craobh Árón, thar ceann theaghlach Léiví, ag péacadh cheana féin. Bhí bachlóga curtha amach aici, agus bláthanna tagtha uirthi, agus almóinní aibí uirthi. ⁹Thug Maois leis na craobhacha go léir ó láthair an Tiarna amach go clann Iosrael go léir; rinneadar iad a spiúnadh agus thóg gach duine a chraobh féin leis. ¹⁰Ansín dúirt an Tiarna le Maois: “Cuir craobh Árón ar ais i láthair na Fianaise mar a mbeidh sí á coimeád ina sampla do na ceannaircigh seo; cuirfidh sí



deireadh go deo lena monabhar i m'aghaidh le nach bhfaighidh siad bás.”¹¹ Rinne Maois mar a d’ordaigh an Tiarna; mar a d’ordaigh an Tiarna is ea a rinne sé.

¹²Dúirt clann Iosrael le Maois: “Tá deireadh linn! Tá an bás chugainn! Tá an bás chugainn go léir!”¹³ Aon duine a théann i ngar do thaibearnacal an Tiarna le hofráil, gheobhaidh sé bás. An é an bás atá i ndán dúinn go léir?”

Sagairt agus Léivítigh

18 Ansin dúirt an Tiarna le hÁrón: “Tusa agus do chlann mhac agus do theaghlach go léir a iompróidh ualach na bpeacaí in aghaidh an tsanctóra; tusa agus do chlann mhac a iompróidh ualach na bpeacaí a bhaineann le bhur sagartacht.”² Tagadh do bhráithre de chraobh Léiví, craobh d’athar, in éineacht leat chomh maith; aontaídís leat agus déanaidís fónamh duit, duit féin agus do do chlann mhac, agus tú os comhair Bhoth na Fianaise.³ Tá siad le fónamh duitse agus do sheirbhís uile na Botha. Ar choinníoll nach dtagann siad i ngar do na soithí naofa ná don altóir, ní baol dóibh an bás ach oiread leat féin.⁴ Aontaídís leat, agus déanaidís cúram Bhoth na Teagmhála i gcomhair sheirbhís uile na Botha; ná tagadh aon duine eile gan údarás in bhur ngaobhar.⁵ Bígí féin i bhfeighil an tsanctóra agus i bhfeighil na haltóra, agus ní thiocfaidh an cuthach go deo arís sa mhullach ar chlann Iosrael.⁶ Agus siúd iad bhur mbráithre, na Léivítigh, tógtha agam as chlann Iosrael mar thabhartas duit; mar thoirbheartaigh, is leis an Tiarna iad le fónamh ag Both na Teagmhála.⁷ Gabhsa agus do chlann mhac mar aon leat na dualgais sagairt a bhaineann leis an altóir agus lena bhfuil laistigh den fhial oraibh féin. Ceiliúrfaidh sibh an



liotúirge; cuirim a dhualgais ar bhur sagartacht. Ach aon duine eile gan údarás a thioctfaidh i ngar, cuirfear chun báis é.”

⁸Dúirt an Tiarna le hÁrón ansin: “Chuir mé féin tú i bhfeighil gach dleacht dá n-ofráiltear dom. Gach ní a choisriceann clann Iosrael tugaim mar chuid ranna duit iad, agus do do mhaca, de réir reachta shíoraí. ⁹Sé seo a bheidh agat de na nithe sárnaofa, den bhia curtha ar leith ón tine: gach ofráil a dhéanann clann Iosrael ar ais dom, cibé acu abhlann í, nó íobairt pheaca, nó íobairt leorghnímh, is rud sárnaofa í; bainfidh sí leatsa agus le de mhaca. ¹⁰Ní miste duit na nithe sárnaofa sin a ithe, agus ní miste do gach fireannach iad a ithe; bídís naofa agat. ¹¹Is leat mar an gcéanna cibé ní a chuirtear i leataobh d’ofráilacha chlann Iosrael a chuirtear i láthair mar dhleacht; tugaim é sin duitse agus do do mhic agus do d’iníonacha, trí reacht síoraí. Ní cás do gach duine glan i do theach é a ithe. ¹²Togha na hola, togha an fhíona agus na cruithneachta, na céadtorthaí a bhronnann siad ar an Tiarna, tugaim duit iad. ¹³Céadfómhar a n-ithreach a thugann siad go dtí an Tiarna, bídís agatsa. Gach duine glan i do theach ní cás dó é a ithe. ¹⁴A mbíonn faoi bhang in Iosrael, bíodh sé agat. ¹⁵Gach céadghin de dhúile beo más fear, más ainmhí, a thabharfar chun an Tiarna, bíodh sé agatsa. Gach céadghin fir, áfach, agus gach céadghin ainmhí neamhghlain, ní foláir duit iad a fhuascailt. ¹⁶In aois míosa a fhuasclóidh tú iad ar chostas cúig sheicil, de réir seicil an tsanctóra, fiche géará is é sin. ¹⁷Ach céadlao bó, céaduan caorach, nó céadmheannán gabhair, ná fuascail; tá siadsan naofa. Ní foláir duit a gcuid fola a chroitheadh ar an altóir agus a saill a dhó mar ofráil dhóite, boladh cumhra a thaitneoidh leis an Tiarna. ¹⁸Leatsa an fheoil, mar aon leis an mbrollach a cuireadh i láthair mar dhleacht ar leith, agus an cheathrú dheas. ¹⁹Gach a gcuireann clann



Iosrael de na nithe naofa i leataobh don Tiarna, tugaim duitse agus do do mhic agus do d'iníonacha de réir reachta shíoraí. Conradh salainn é seo go brách i láthair an Tiarna, duit féin agus do do shliocht i do dhiaidh.”

Cuid Ranna na Léivíteach - Deachúna

²⁰Dúirt an Tiarna le hÁrón: “Ní bheidh aon oidhreacht agat ina bhfearann, ná ní bheidh seilbh agat ar aon chuid de ina measc. Mise do chuid ranna agus d’oidhreacht i measc chlann Iosrael. ²¹Thug mé, thug sin, do chlann Léiví mar oidhreacht na deachúna go léir in Iosrael ar son na seirbhíse lena ndéanann siad seirbhís i mBoth na Teagmhála. ²²Ná tagadh clann Iosrael i ngaobhar Bhoth na Teagmhála feasta; bheadh peaca ina ualach orthu agus gheobhaidís bás. ²³Le Léiví a bhaineann seirbhís Bhoth na Teagmhála, agus iompróidh na Léivítigh ualach a bpeaca. Seo reacht síoraí do bhur sliocht go léir: Ná bíodh aon oidhreacht ag na Léivítigh i measc chlann Iosrael. ²⁴An deachú a chuireann clann Iosrael i leataobh don Tiarna, tá sí á tabhairt agam do na Léivítigh mar oidhreacht. Uime sin a dúirt mé leo go mbeidh siad gan oidhreacht i measc chlann Iosrael.”

²⁵Labhair an Tiarna le Maois agus dúirt: ²⁶“Abair leis na Léivítigh: ‘Nuair a ghlacann sibh an deachú ó chlann Iosrael, an deachú a chaithfidh siad a dhíol libh agus atá á tabhairt agam daoibh ní foláir daoibh cuid de a chur i leataobh don Tiarna, deachú den deachú. ²⁷Beidh sí seo in áit na hofrála is dual uaibh, mar an t-arbhar ón urlár buailte agus an nuafhíon ón gcantaoir. ²⁸Déanfaidh sibhse chomh maith dá bhrí sin roinn a ofráil don Tiarna as gach deachú a ghlacfaidh sibh ó chlann Iosrael. Tugaigí an chuid a ofrálann



sibh i leataobh don Tiarna d'Árón an sagart. ²⁹Cuirigí an chuid is dual de gach tabhartas a gheobhaidh sibh i leataobh don Tiarna. Cuirigí an chuid naofa i leataobh ó thogha na nithe seo go léir.' ³⁰Abair leo: 'Nuair a bhíonn an togha curtha i leataobh, bíodh na tabhartais seo go léir (i gcás na Léivíteach) in áit toradh an urláir bhualte agus an chantaoir fíona. ³¹Ní cás daoibh iad a ithe in aon áit, sibh féin agus bhur muintir; sé seo bhur luach saothair ar son bhur seirbhíse i mBoth na Teagmhála. ³²Ní bheidh ualach aon pheaca oraibh dá bharr seo, a luaithe a bhíonn an chuid is fearr ofrálta agaibh; ní mó ná sin a bheidh na nithe a choisric clann Iosrael á dtruailliú agaibh, agus ní bhfaighidh sibh bás.'”

An Bhó Dhearg

19 Labhair an Tiarna le Maois agus le hÁrón agus dúirt: ²“Seo reacht den dlí a d'aithin an Tiarna. Inis é seo do chlann Iosrael: ní foláir dóibh bó dhearg, gan locht gan mháchail, nár iompair riamh an chuing, a thabhairt chugat. ³Tugaigí d'Eileázár an sagart í, agus tugtar lasmuigh den champa í le marú ina láthair. ⁴Tógadh Eileázár an sagart cuid dá fuil ar a mhéar agus croitheadh sé an fhuil seo seacht n-uaire i dtreo dhoras Bhoth na Teagmhála. ⁵Loisctear an bhó ansin ina láthair, idir sheithe agus fheoil, agus fhuil, sea agus otrach chomh maith. ⁶Ansin faigheadh an sagart adhmaid céadrais, íosóip, agus ábhar craorag agus caitheadh sé iad ar lasair na bó á loscadh. ⁷Ansin níodh an sagart a éide agus déanadh sé a chorp a ionladh in uisce; ní miste dó filleadh ar an gcampa ina dhiaidh sin, ach bíodh sé neamhghlan go nóin. ⁸An té a loisc an bhó, ní mór



dó a éide a ní agus a chorp a ionladh in uisce, agus a bheith neamhghlan go nóin.

⁹Bailíodh duine atá glan luaitheach na bó, agus caitheadh sé in áit ghlan é lasmuigh den champa. Ní foláir é a choimeád i gcomhair chomhthionól chlann Iosrael le huisce na neamhghlaine a dhéanamh; is íobairt scriosta peaca í. ¹⁰An té a bhailigh luaitheach na bó, níodh sé a éide agus bíodh sé neamhghlan go nóin. Bíodh seo ina reacht síoraí do chlann Iosrael agus don choimhthíoch ag cur faoi in bhur measc.

Neamhghlaine - Uisce na Neamhghlaine

¹¹“An té a bhaineann le corpán mairbh ar bith, bíodh sé neamhghlan ar feadh seacht lá. ¹²Déanfaidh sé é féin a ionladh leis na huiscí seo ar an tríú agus ar an seachtú lá, agus beidh sé glan. Ach mura ndéanann sé é féin a íonghlanadh ar an tríú agus an seachtú lá, ní bheidh sé glan. ¹³An té a bhaineann le corpán mairbh, is cuma cé hé, agus nach ndéanann é féin a íonghlanadh, truailíonn sé taibearnacal an Tiarna. Ní foláir an duine sin a ghearradh amach ó Iosrael, mar nár ghabh uiscí na neamhghlaine thairis; bíonn sé neamhghlan; leanann a neamhghlaine de.

¹⁴“Seo é an dlí sa chás go bhfaigheann duine bás i mboth: aon duine a théann isteach sa bhoth, nó aon duine a bhíonn istigh ann cheana, bíodh sé neamhghlan ar feadh seacht lá. ¹⁵Ar an gcuma chéanna, gach soitheach oscailte nár iadh clab ná clúid air, bíodh sé neamhghlan. ¹⁶Aon duine a bhaineann le fear a maraíodh le claíomh lasmuigh sa mhachaire, nó le fear a cailleadh, nó le cnámharlach duine, nó le huaigh, bíodh sé neamhghlan ar feadh seacht lá.



¹⁷“Ar mhaithe leis an té atá neamhghlan ar an gcuma seo, tógtar cuid de luaithreach an íobairt pheaca a loisceadh; cuirtear fíoruisce leis i soitheach. ¹⁸Ansín faigheadh duine íonghlan craobh íosóipe agus tumadh san uisce agus croitheadh ar an mboth é, agus ar na soithí agus ar na daoine go léir atá istigh ann, agus ar an té a bhain leis an gcnámharlach, nó le corp an mhairbh – is cuma an bás de ghoin nó bás uaidh féin a fuair sé – nó leis an uaigh. ¹⁹Agus croitheadh an t-íonghlan ar an neamhghlan an tríú agus an seachtú lá, agus an seachtú lá beidh a ghlanadh curtha i gcrích aigesean. Ní foláir don neamhghlan a chuid éadaigh a ní agus é féin a ionladh in uisce agus beidh sé glan um nóin. ²⁰Mura ndéanann duine neamhghlan é féin a ghlanadh, gearrtar amach ón gcomhthionól é, óir thruaillíodh sé sanctóir an Tiarna. Níor ghabh uiscí na neamhghlaine thairis; tá sé neamhghlan.

²¹“Bíodh seo ina dhlí síoraí acu: an té a chroitheann uisce na neamhghlaine, níodh sé a chuid éadaigh, agus an té a bhainfidh le huisce na neamhghlaine, bíodh sé neamhghlan go nóin. ²²Aon rud a mbainfidh an neamhghlan leis, bíodh sé neamhghlan, agus aon duine a bhainfidh leis sin arís, bíodh sé neamhghlan go nóin.”

Uiscí Mhiríbeá

20 An chéad mhí tháinig clann Iosrael, an comhthionól go léir, isteach i bhfásach Zin. Chuir na daoine fúthu i gCáidéis. Ansiúd a fuair Miriám bás agus a adhlacadh í. ²Ní raibh uisce ann don chomhthionól, agus chuireadar go léir le chéile in aghaidh Mhaois agus Áróin. ³Thug an pobal a ndúshlán faoi Mhaois: “Uch gan sinn a fháil bháis,” ar siad, “mar a fuair ár mbráithre bás i láthair an Tiarna! ⁴Cad ab áil libh ag tabhairt



comhthionól an Tiarna amach san fhásach seo, díreach d’fhonn go bhfaighimís bás anseo – sinn féin agus ár n-eallach? ⁵Cén fáth ar sheol sibh amach as an Éigipt sinn le teacht chun na háite danartha seo? Ní aon áit é d’arbhar, ná do fhighí, do fhíniúna ná do phomagránaití agus níl aon uisce le hól ann.” ⁶Ansin d’imigh Maois agus Áron ón gcomhthionól agus tháinig go doras Bhoth na Teagmhála. Chaitheadar iad féin ar a mbéal agus ar a bhfiacra ar an talamh, agus thaispeáin gloir an Tiarna í féin dóibh.

⁷Labhair an Tiarna le Maois agus dúirt: ⁸“Tóg an tslat agus cruinnigh an pobal, tú féin agus do dheartháir Áron, agus ansin os comhair a súl, ordaígí don charraig a huisce a thabhairt uaithi. Cuirfidh tú uisce ag sní as an gcarraig dóibh agus tabharfaidh tú deoch don chomhthionól agus dá eallach.” ⁹Thóg Maois an chraobh ó láthair an Tiarna mar a d’ordaigh sé dó. ¹⁰Ansin ghair Maois agus Áron an comhthionól le chéile os comhair na carraige agus dúirt leo: “Éistigí anois a lucht na ceannairce! An dtabharfaimid uisce ina shruth as an gcarraig seo daoibh?” ¹¹D’ardaigh Maois a lámh agus bhuail sé an charraig faoi dhó leis an tslat, agus tháinig uisce amach ina thuile agus d’ól an comhthionól agus a n-eallach deoch. ¹²Ansin dúirt an Tiarna le Maois agus le hÁron: “De bhrí nár chreid sibh go bhféadfainn mé féin a naomhú os comhair súile chlann Iosrael, ní threoróidh sibh an pobal seo isteach sa tír atá á thabhairt agam dóibh.” ¹³Sin iad uiscí Mhiríbeá (Conspóide) mar a raibh clann Iosrael ag conspóid leis an Tiarna agus gur thaispeáin sé gur naofa é ina measc.



Eadóm

¹⁴Sheol Maois teachtairí ó Cháidéis: “Do rí Eadóm. Teachtaireacht ó do bhráthair Iosrael. Is maith is eol duit an cruatan go léir a luigh orainn; ¹⁵chuaigh ár sinsir síos go dtí an Éigipt agus d’fhanamar ann tamall fada. Ach thug na hÉigiptigh drochíde orainn mar a thugadar ar ár sinsir. ¹⁶Ghlaomar chun an Tiarna; d’éist sé linn agus chuir sé aingeal chugainn chun sinn a thabhairt amach as an Éigipt. Táimid anois i gCáidéis, cathair ar imeall do chríche. ¹⁷Lig dúinn gabháil trí do thír. Ní rachaimid trí ghort ná trí fhíonghort, ná ní ólfaimid uisce as tobar. Tabharfaimid bóthar an rí orainn féin gan casadh ar dheis ná ar chlé go dtí go mbeimid imithe thar do theorainneacha.” ¹⁸Ach d’fhreagair Eadóm é: “Ná gabh trí mo chríochasa nó tiocfaidh mé amach chun tú a ionsaí.” ¹⁹Dúirt clann Iosrael leis: “An bóthar mór a gheobhfaimid; má ólaimid aon chuid de d’uisce, mise féin nó m’eallach, díolfaidh mé as. Lig dom gabháil tríd an tír de chois, sin uile.” ²⁰D’fhreagair Eadóm: “Ní dhéanfaidh sibh,” agus tháinig Eadóm amach ina n-aghaidh le slua mór agus le tréan-neart. ²¹Dhiúltaigh Eadóm cead slí trína chríocha d’Iosrael, ar an gcuma sin, agus chas Iosrael i leataobh uaidh.

Bás Áron

²²Chuireadar chun bothair ó Cháidéis agus tháinig comhthionól chlann Iosrael go léir go Sliabh Hor. ²³Labhair an Tiarna le Maois agus le hÁron ag Sliabh Hor ar theorainn chríocha Eadóm. ²⁴“Ní foláir,” ar sé, “Áron a chruinniú chun a mhuintire; óir níl sé le dul



isteach sa tír a thug mé do chlann Iosrael, óir rinne sibh ceannairc i m'aghaidh ag uiscí Mhírbeá. ²⁵Beir leat Árón agus a mhac Eileázár agus tabhair suas go Sliabh Hor iad. ²⁶Ansín bain a éidí d'Árón agus cuir ar a mhac Eileázár iad; cruinneofar Árón chun a mhuintire agus gheobhaidh sé bás ansiúd.” ²⁷Rinne Maois mar a d'ordaigh an Tiarna. Chuadar suas go Sliabh Hor i radharc an chomhthionóil uile. ²⁸Bhain Maois a éidí d'Árón agus chuir ar Eileázár a mhac iad. Agus fuair Árón bás ansiúd ar bharr an tsléibhe. Ansin tháinig Maois agus Eileázár anuas ón sliabh. ²⁹Nuair a chonaic an comhthionól go léir go raibh Árón tar éis bháis, chaoin teaghlach Iosrael Árón ar feadh deich lá fichead.

Gabháil Hormá

21 Rí Arád, an Canánach a bhí ag cur faoi sa Neigib, chuala sé go raibh Iosrael ag teacht trí bhealach Atáraím. D'ionsaigh sé Iosrael agus ghabh sé roinnt priosúnach. ²Ansín mhóidigh Iosrael an mhóid seo don Tiarna: “Má thugann tú an mhuintir seo ar láimh dom, cuirfidh mé a gcathracha go léir faoi bhang.” ³D'éist an Tiarna le guth Iosrael agus thug na Canánaigh ar láimh dóibh; chuireadar faoi bhang iad, iad féin agus a gcathracha. Tugadh Hormá (Bang) ar an áit seo.

An Nathair Chré-Umha

⁴D'fhágadar Sliabh Hor ar feadh bhealach Mhuir Shúf, ag gabháil timpeall chríocha Eadóm. Bhris ar an bhfoighne ag an bpobal ar an tslí. ⁵Labhraíodar in aghaidh Dé agus in



aghaidh Mhaois: “Cad ab áil libh dár dtabhairt amach as an Éigipt chun bás a fháil san fhásach? Óir tá an áit seo gan arán, gan uisce, agus is gráin linn an bia gan mhaith seo.”

⁶ Ansin sheol Dia nathracha tintí i measc an phobail, agus chuireadar a gcealg sa phobal, agus fuair a lán in Iosrael bás. ⁷ Tháinig an pobal go Maois agus dúradar: “Pheacaíomar lenár gcaint in aghaidh an Tiarna agus i d’aghaidhse. Guigh chun an Tiarna á iarraidh air na nathracha a thógáil dinn.” Ghuigh Maois ar son an phobail. ⁸ Dúirt an Tiarna le Maois: “Déan nathair thintí agus cuir ar chuaille í, agus gach duine ina gcuirfear cealg, nuair a fhéachfaidh sé uirthi, mairfidh sé.” ⁹ Dhealbhaigh Maois nathair chré-umha dá bhrí sin agus chuir ar chuaille í, agus nuair a chuireadh nathair cealg i nduine, d’fhéachadh sé ar an nathair chré-umha agus mhaireadh.

San Allíordáin

¹⁰ Chuir clann Iosrael chun bealaigh agus shuíodar a gcampa in Obot. ¹¹ Ansin chuadar ó Obot agus shuíodar a gcampa in Ívé Abáraim san fhásach taobh le Móáb i dtreo éirí gréine. ¹² Chuireadar chun bealaigh uaidh sin agus shuíodar a gcampa i nGleann Zeirid.

¹³ Chuireadar chun bealaigh uaidh sin agus shuíodar a gcampa lastall den Arnón.

Tosaíonn an gleann fásaigh seo i gcríocha na nAmórach. Óir sí an Arnón teorainn Mhóáb, idir Móáb agus na hAmóraigh. ¹⁴ Deirtear uime sin i Leabhar Chogaí an Tiarna:

... Váhaeb i Súfá, agus gleannta Arnón,

¹⁵ agus sleasa na ngleannta
a ritheann síos go láthair Ár,



agus a chromann thar teorainn Mhóáb ...

agus ar aghaidh leo as sin go Béar – ¹⁶Is faoin tobar ansiúd a dúirt an Tiarna le Maois: “Cruinnigh an pobal le chéile agus tabharfaidh mé uisce dóibh.” ¹⁷Ansin is ea a chan Iosrael an laoi:

“Sceith, a thobar!

Canaigí dó!

¹⁸Na prionsaí a thochail,
agus ceannairí an phobail a bhain,
lena slat agus lena mbataí.”

... agus ón bhfásach go Matáná. ¹⁹Agus ó Mhatáná go Nachailíéil, agus ó Nachailíéil go Bámót, ²⁰agus ó Bhámót go dtí an gleann a shíneann go críocha Mhóáb i dtreo mullach Phisceá atá ar imeall an fhásaigh.

²¹Ansin chuir Iosrael teachtairí go Síochon rí na nAmórach, á rá: ²²“Lig dom gabháil trí do chríocha; ní rachaimid ar seachrán trí ghort ná trí fhíonghort, ná ní ólfaimid uisce as tobar. Tabharfaimid bóthar an rí orainn féin go dtí go mbeimid imithe thar do theorainneacha.” ²³Ach ní ligfeadh Síochon d’Iosrael gabháil trína chríocha. Thionóil sé a chuid fear ar fad agus amach leis san fhásach in aghaidh Iosrael agus tháinig go Iáhaz, agus chuir cath ar Iosrael. ²⁴Chuir Iosrael chun báis é de ghion claímh agus ghabh seilbh ar a chuid tailte ón Arnón go dtí an Iaboc, chomh fada le clann Amón, óir ba gharbh í teorainn chlann Amón. ²⁵Ghabh Iosrael na cathracha seo go léir agus chuir Iosrael fúthu i gcathracha uile na nAmórach, i Heisbeon agus in gach baile dá chuid. ²⁶Ba é Heisbeon



príomhchathair Shíochon rí na nAmórach, an té a chuir cogadh ar chéad rí Mhóáb, agus a bhain a chríocha uile de chomh fada ó bhaile leis an Arnón.²⁷ Uime sin canann baird:

“[Misneach, a Heisbeon!

Tusa atá dea-thógtha ar bhonn daingean!]

A chathair Shíochon!

²⁸ Óir tháinig tine as Heisbeon,

lasair as chathair Shíochon.

D’alp sí Ár Mhóáb,

agus shlog sí arda Arnón.

²⁹ Liach ortsa, Móáb!

Tá deireadh libh a phobal Chamóis.

Rinne sé teifigh dá mhaca,

agus cimí dá iníonacha,

cimí ag Síochon, rí na nAmórach.

³⁰ Scrios Heisbeon

na leanáí chomh fada le Díobon,

na mná chomh fada le Nofach,

[na fir] chomh fada le Maedabá.”

³¹ Chuir Iosrael fúthu ansin i dtír na nAmórach. ³² Chuir Maois uaidh lucht taiscéalaithe ar Iazaer, agus ghabh Iosrael seilbh air féin agus ar na bailte go léir a bhí faoi, agus chuir sé na hAmóraigh go léir a bhí ann as seilbh. ³³ Ansin chasadar agus ghabhadar an bóthar i dtreo Bháiseán. Tháinig Óg rí Bháiseán amach ina n-aghaidh lena mhuintir go léir chun



cath a chur ag Eidreí. ³⁴ Ach dúirt an Tiarna le Maois: “Ná bíodh eagla ort roimhe, óir tá sé tugtha agam i do lámh, é féin agus a mhuintir agus a thír. Déan leis mar a rinne tú le Síochon, rí na nAmórach, a mhair i Heisbeon.” ³⁵ Bhriseadar air dá bhrí sin, agus ar a mhic agus ar a mhuintir: níor fágadh fear inste scéil díobh. Ghabhadar seilbh ar a chríocha.

Balám

22 Ansin chuir clann Iosrael chun siúil agus shuíodar a gcampa i machairí Mhóáb, lastall den Iordáin, os comhair Ireachó.

² Chonaic Bálac mac Zipeor gach a raibh déanta ag Iosrael leis na hAmóraigh. ³ Agus tháinig scéin ar Mhóáb roimh an bpobal seo ar a líonmhaire; bhí eagla ar Mhóáb roimh chlann Iosrael. ⁴ Dúirt sé le seanóirí Mhidián: “Seo an mathshlua seo ag crinneadh gach ní inár dtimpeall mar a chrinnfeadh damh féar na mbánta.” Ba é Bálac mac Zipeor rí Mhóáb an t-am sin. ⁵ Sheol sé teachtairí ag gairm Balám mac Bheór, i bPatór ar an Abhainn, i dtír chlann Amau, á rá: “Féach tá an dream seo tagtha as an Éigipt agus tá lámh tugtha acu thar chlár na talún; tá curtha fúthu acu ar mo thairseach. ⁶ Tar, le do thoil, agus cuir mallacht ar an dream seo dom, mar tá siad róthréan dom. Ansin b’fhéidir go bhféadfainn an lámh in uachtar a fháil orthu agus iad a thiomáint as an tír. Óir is maith is eol dom gur beannaithe an té ar a gcuireann tú do bheannacht, agus gur mallaithe an té ar a gcuireann tú do mhallacht.”



⁷Chuir seanóirí Mhóáb agus seanoirí Mhidián chun siúil agus na sintiúis don asarlaíocht acu, agus thángadar go Balám agus thug dó teachtaireacht Bhálác. ⁸“Fanaigí anseo thar oíche,” ar sé leo, “agus tabharfaidh mé freagra ar ais chugaibh de réir mar a déarfaidh an Tiarna liom.” D’fhan prionsaí Mhóáb le Balám. ⁹Tháinig Dia go Balám agus dúirt: “Cé hiad na fir seo ag fanúint farat?” ¹⁰D’fhreagair Balám Dia: “Bálác mac Zipeor rí Mhóáb, chuir sé an teachtaireacht seo chugam: ¹¹‘Féach tá an dream seo tagtha as an Éigipt agus tá lámh tugtha acu thar chlár na talún. Tar agus cuir do mhallacht orthu dom; ansin b’fhéidir go bhféadfainn cath a chur orthu agus iad a thiomáint amach.’” ¹²Dúirt Dia le Balám: “Ná téigh leo. Na cuir mallacht ar an muintir seo óir tá siad beannaithe.” ¹³D’éirigh Balám lá arna mhárach agus dúirt leis na taoisigh a chuir Bálác chuige: “Téigí ar ais go dtí bhur dtír féin óir ní ligfeadh an Tiarna dom dul libh.” ¹⁴D’éirigh taoisigh Mhóáb dá bhrí sin agus d’fhilladar go Bálác agus dúradar: “Ní toil le Balám teacht linn.” ¹⁵Sheol Bálác a thuilleadh prionsaí, níos líonmhaire agus níos céimiúla ná an chéad dream. ¹⁶Thángadar go Balám agus dúradar leis: “Seo teachtaireacht ó Bhálác mac Zipeor: ‘Ná diúltaigh, impím ort, teacht chugam. ¹⁷Caithfidh mé onóracha leat agus déanfaidh mé cibé rud a déarfaidh tú liom. Tar agus cuir mallacht ar an muintir seo dom.’” ¹⁸Ach d’fhreagair Balám teachtaí Bhálác: “Dá dtabharfadh Bálác lán a thí d’ór agus d’airgead dom, ní fhéadfainn aithne an Tiarna mo Dhia a shárú in aon ní beag ná mór. ¹⁹Ach fanaigí féin leis anseo thar oíche, le bhur dtoil, agus gheobhaidh mé amach cad eile atá ag an Tiarna le rá liom.” ²⁰Tháinig Dia go Balám i gcaitheamh na hoíche, agus dúirt leis: “Nár tháinig na fir seo ag glaoch ort? Éirigh agus téigh leo. Ach ná déan



aon ní thar mar a déarfaidh mé leat.”²¹ D’éirigh Balám ar maidin agus chuir an diallait ar a láir asail agus chuir chun siúil le taoisigh Mhóáb.

²²Las fearg an Tiarna de bharr a imeachta, agus sheas aingeal sa tslí air ar an mbealach á bhac. Bhí sé ar muin a asail agus a bheirt shearbhónta in éineacht leis.²³ Chonaic an t-asal aingeal an Tiarna ina sheasamh ar an mbóthar, agus claíomh nocht ina láimh, agus d’imigh an t-asal i leataobh ón mbóthar agus seo leis trí na bánta. Ach bhuail Balám an t-asal á chur ar ais ar an mbóthar.²⁴ Ansin sheas aingeal an Tiarna ar chosán cúng idir na fíniúna, le balla ar a dheis agus balla ar a chlé.²⁵ Chonaic an t-asal aingeal an Tiarna agus dhruid sé le balla agus bhrúigh sé cos Bhalám i gcoinne an bhalla agus bhuail Balám arís é.²⁶ Ar aghaidh le haingeal an Tiarna ansin agus sheas in áit a bhí chomh cúng nach raibh aon slí chun gabháil thart ar dheis ná ar chlé.²⁷ Nuair a chonaic an t-asal aingeal an Tiarna, luigh sé síos faoi Bhalám, agus tháinig racht feirge ar Bhalám agus bhuail sé é lena bhata.²⁸ Ansin d’oscail an Tiarna béal an asail agus dúirt sé le Balám: “Cad tá déanta agam ort, a rá is gur bhuail tú mé trí huaire mar seo?”²⁹ Dúirt Balám leis an asal: “Tá tú ag déanamh ceap magaidh díom! Nár bhreá liom claíomh a bheith agam i mo ghlaic, mar go mbeifeá marbh agam faoin am seo!”³⁰ Dúirt an t-asal le Balám: “Nach mise d’asal? Nach orm a rinne tú marcaíocht ó d’óige go dtí seo? I gcaitheamh an ama sin go léir ar theip mé riamh ort ag freastal ort?” “Ní dhearna tú,” ar sé.

³¹Ansin d’oscail an Tiarna súile Bhalám. Chonaic sé aingeal an Tiarna ina sheasamh ar an mbóthar agus claíomh nocht ina láimh, agus chrom sé síos agus thit ar a bhéal agus ar a fhiacra.³² Dúirt aingeal an Tiarna leis: “Cad a b’áil leat ag bualadh d’asail trí huaire mar sin? Seo mise féin tagtha do do chosc mar is claon é do bhealach romham.”³³ Chonaic an



t-asal mé agus chas i leataobh mar sin uaim trí huair. Ba mhaith an mhaise duit gur chas sé i leataobh nó bheifeá marbh agam faoin am seo, fág go scaoilfinn a anam leis.”³⁴ Ansin dúirt Balám le haingeal an Tiarna: “Rinne mé peaca. Ní raibh a fhios agam go raibh tú i do sheasamh sa tslí orm. Anois más ea, má tá tú i bhfearg liom, rachaidh mé ar ais.”

³⁵D’fhreagair aingeal an Tiarna Balám: “Téigh in éineacht leis na fir seo, ach ná habair aon ní ach mar a déarfaidh mé leat.” D’imigh Balám ar aghaidh dá bhrí sin le taoisigh Bhalác.

³⁶Nuair a chuala Bálác go raibh Balám tagtha, chuaigh sé amach ina choinne i dtreo Ár Mhóáb ag teorainn an Arnón, ar an imeall is sia ó bhaile den teorainn.³⁷ Dúirt Bálác le Balám: “Nár chuir mé teachtairí ag glaoch ort? Cén fáth nár tháinig tú chugam? An amhlaidh a mheas tú nach bhféadfainn, b’fhéidir, onóir a chaitheamh leat?”³⁸ D’fhreagair Balám Bálác: “Seo anseo anois agat mé! An bhfuil cead cainte ar bith agam leat anois? An focal a chuireann Dia i mo bhéal, sin é nach foláir dom a labhairt.”³⁹ D’imigh Balám ansin in éineacht le Bálác agus tháingadar go Ciriát Huzót.⁴⁰ Mharaigh Bálác eallach agus caoirigh, agus thug sé codanna do Bhalám agus do na taoisigh a bhí in éineacht leis.⁴¹ Lá ar na mhárach rug Bálác Balám suas go Bámót Bál agus ón áit sin bhí radharc aige ar an gcuid ba chongaraí den phobal.

Céalmhainí Bhalám

23 Dúirt Balám le Bálác: “Tóg seacht n-altóirí anseo dom agus tabhair anseo chugam seacht dtarbh agus seacht reithe.”² Rinne Bálác mar a d’iarr Balám agus d’ofráil



Bálac agus Balám tarbh agus reithe ar gach altóir. ³Dúirt Balám ansin le Bálac: “Seas láimh le d’íobairt uileloiscthe. Rachaidh mé ar aghaidh; b’fhéidir go gceadóidh an Tiarna dom teagmháil leis. Cibé rud a nochtfaidh sé dom, inseoidh mé duit.” Ar aghaidh leis go barr maolchnoic.

⁴Tháinig Dia i gcoinne Bhalám agus dúirt Balám leis: “Dheasaigh mé na seacht n-altoirí agus d’ofráil mé tarbh agus reithe ar gach altóir díobh ina n-íobairt loiscthe.”

⁵Chuir an Tiarna ansin focal ina bhéal agus dúirt leis: “Ar ais leat go Bálac agus sin é a déarfaidh tú leis.” ⁶Chuaigh Balám ar ais chuige agus b’shiúd é ansiúd é ina sheasamh ag a íobairt uileloiscthe agus taoisigh Mhóáb go léir ina thimpeall. ⁷Ansin reac sé a laoi agus dúirt:

“Thug Bálac leis mé ó Arám,
rí Mhóáb ó shléibhte an oirthir.

‘Tar agus cuir mallacht ar Iacób dom,
agus déan aoir ar Iosrael.’

⁸Conas is féidir dom mallacht a chur ar an te nár chuir Dia mallacht air?
Conas is féidir dom aoir a dhéanamh ar an te nach ndearna Dia aoir air?

⁹Feicim é ó bharr na sléibhte,
agus ó mhaoileann na gcnoc a fhairim é:
Pobal ag maireachtáil leo féin,
nach n-áiríonn iad féin ar na ciníocha.

¹⁰Cé d’fhéadfadh luathreach Iacóib a ríomh?
Cé d’fhéadfadh deannach shlua Iosrael a áireamh?



Gurbh é bás an fhíréin mo bhás-sa!

Gurbh í a geríoch siúd mo chríochsa.”

¹¹Dúirt Bálác le Balám: “Cad é seo a rinne tú orm? Thug mé liom thú chun mallacht a chur ar mo naimhde, agus seo tú gan ar siúl agat ach ag cur beannachtaí orthu!”

¹²D’fhreagair Balám: “Nach bhfuil sé de cheangal orm féachaint chuige a gcuireann an Tiarna i mo bhéal a labhairt?” ¹³Dúirt Bálác leis: “Tar liom go láthair eile óna bhféadfaidh tú iad a fheiceáil. Níl radharc agat ón áit seo ach ar imeall an tslua seo, níl radharc agat orthu go léir. Cuir mallacht orthu ón áit sin thall.” ¹⁴Thug sé leis é go Gort na Spiairí i dtreo mhullach Phisceá. Thóg sé seacht n-altóirí ansiúd agus d’ofráil sé tarbh agus reithe ar gach altóir. ¹⁵Dúirt Balám le Bálác: “Seas taobh le d’íobairt uileloiscthe; buailfear liomsa anseo thall.” ¹⁶Tháinig Dia i gcoinne Bhalám agus chuir focal ina bhéal agus dúirt leis: “Ar ais leat go Bálác agus sin é a déarfaidh tú leis.” ¹⁷Chuaigh Balám ar ais chuige agus b’shiúd é ansiúd é ina sheasamh ag a íobairt uileloiscthe agus taoisigh Mhóáb go léir ina thimpeall. Chuir Bálác ceist air: “Cad dúirt an Tiarna?” ¹⁸Ansin reac Balám a laoi agus dúirt:

“Éirigh, a Bhálác, agus éist!

Tabhair cluas dom, a mhic Zipeor.

¹⁹Ní duine é Dia go n-inseodh sé bréag,
ná ní mac le hÁdhamh é go dtiocfadh ar mhalairt aigne.
An dual dó ‘sea’ a rá, gan an beart a dhéanamh,
a bhriathar a thabhairt, ach gan é a chomhlíonadh?



- ²⁰ Seo mise le hordú orm beannacht a thabhairt;
beannacht a thabharfaidh [mé] agus ní dhéanfaidh mé a chur ar ceal.
- ²¹ Ní fhaca mé urchóid in Iacób.
Níor luigh mé súil ar chruatan in Iosrael.
Tá an Tiarna a nDia faru,
- ²² Tugann Dia as an Éigipt amach iad;
is cuma dóibh é nó adharca cama dhamh díleann.
- ²³ Níl briocht in Iacób;
ná tuar asarlaíochta in Iosrael.
Fág go ndeir daoine le Iacób,
agus go ndeir siad le hIosrael: ‘Cén t-iontas a rinne Dia?’
- ²⁴ seo pobal, amhail banleon ag éirí,
ar tinneall mar leon ar tí léim,
agus nach luíonn go n-alpann a chreach,
agus go slogann fuil ar mharaigh sé.”
- ²⁵ Dúirt Bálác le Balám: “Ná cuir mallacht orthu, más sea, ach ná cuir beannacht ach chomh beag.” ²⁶ D’fhreagair Balám Bálác: “Ná dúirt mé leat, cibé rud a deir an Tiarna, go gcaithfidh mé rud a dhéanamh air?” ²⁷ “Téanam más ea,” arsa Bálác le Balám, “béarfaidh mé go láthair eile thú. B’fhéidir gur toil le Dia iad a mhallú ón áit sin.” ²⁸ Rug Bálác Balám go barr Pheór atá go hard os cionn an fhásaigh. ²⁹ Ansin dúirt Balám le Bálác: “Tóg seacht n-altóirí anseo dom, agus tabhair anseo chugam seacht dtarbh agus seacht reithe.” ³⁰ Rinne Bálác mar a d’iarr Balám agus d’ofráil tarbh agus reithe ar gach altóir.



24 Nuair a chonaic Balám gur thoil leis an Tiarna beannacht a chur ar Iosrael, níor imigh sé, faoi mar a rinne roimhe sin, ar thóir tuartha, ach thug a aghaidh ar an bhfásach. ²D'ardaigh Balám a shúile agus chonaic Iosrael suite ina gcampa, treibh ar threibh. Luigh spiorad Dé air ³agus chan sé a laoi, agus dúirt:

“Céalmhaine Bhalám mac Bheór,

céalmhaine an té ar gruama é a radharc,

⁴céalmhaine an té a chluineann briathar Dé.

Feiceann sé a dtugann an tUilechumhachtach dó le feiceáil;

faigheann sé freagra ó Dhia, agus osclaítear a shúile.

⁵Nach álainn iad do bhothanna, a Iacóib!

nach álainn iad d'áitribh, a Iosrael.

⁶Is cuma iad nó gleannta a shíneann i gcéin,

nó luibhghoirt ar insí abhann,

nó crainn aló a chlannaigh an Tiarna,

nó crainn chéadrais láimh leis na huisc!

⁷[Tá laoch ag eascar as a síol

agus ag rialú ar chiníocha gan áireamh.]

Is mó ná Agag a rí,

agus uaisleofar a mhórgacht.

⁸Tugann Dia as an Éigipt amach é;

is cuma dó é nó adharca cama dhamh díleann.



Alpánn sé conablaigh a naimhde,
 agus déanann sé mionramh dá gcnámha
 agus tollann iad lena shaigheada.

⁹ Chúb sé chuige, agus luigh,
 mar leon, mar bhanleon.

Cé leomhfadh é chur ina shuí?

Gura beannaithe lucht bhur mbeannaithe;
 gura mallaithe lucht bhur mallaithe.”

¹⁰ Tháinig reacht feirge ar Bhálác le Balám. Bhuail sé a bhosa ar a chéile agus dúirt le Balám: “Chuir mé fios ort chun mallacht a chur ar mo naimhde, agus seo anois beannacht curtha faoi thrí agat orthu! ¹¹ Imigh ort abhaile. Gheall mé onóir a chaitheamh leat go cinnte, ach tá sin bainte díot ag an Tiarna.” ¹² Thug Balám freagra ar Bhálác: “Ná dúirt mé leis na teachtairí a chuir tú chugam: ¹³ ‘Dá dtabharfadh Bálác lán a thí d’ór agus d’airgead dom, ní fhéadfainn briathar an Tiarna a shárú agus rud a dhéanamh as mo stuaim féin, cibé acu maith nó olc é; a ndeir an Tiarna, sin é a déarfadh mé.’ ¹⁴ Anois ó táim ag filleadh ar mo mhuintir féin, lig dom rabhadh a thabhairt duit faoi cad a dhéanfaidh an mhuintir seo le do mhuintirse anseo amach.” ¹⁵ Ansin chan sé a laoi, agus dúirt:

“Céalmhaine Bhalám mac Bheór,
 céalmhaine an té ar gruama é a radharc,
¹⁶ céalmhaine an té a chluineann briathar Dé,
 agus ar fios dó eolas an Té is Airde.



Feiceann sé a dtugann an tUilechumhachtach dó le feiceáil;
faigheann sé freagra ó Dhia, agus osclaítear a shúile.

¹⁷ Feicim é – ach ní anois é;
faighim radharc air – ach ní láimh liom é:
Faigheann réalta ó Iacób an cheannasaíocht;
Éiríonn slat ríoga as Iosrael.
Bascann sé malaí Mhóáb
agus cloigne uile chlann na geona.

¹⁸ Cuirtear Eadóm as seilbh,
agus a naimhde, Saeír, mar an gcéanna, cuirtear as seilbh iad,
agus cuireann Iosrael a neart i ngníomh.

¹⁹ Ceansaíonn Iacób a naimhde,
agus scriosann sé na teifigh ó Ár.”

²⁰ Ansin d’fhéach Balám ar Amáiléc agus chan a laoi agus dúirt:
“Amáiléc a bhí ar thús na gciníocha,
ach díisceofar a shliocht go brách.”

²¹ Ansin d’fhéach sé ar na Céinigh agus chan a laoi, agus dúirt:
“Ba dhaingean é do theach, a Cháin,
agus do nead suite go hard sa charraig.

²² Ach is le Beór an nead,
agus an fada a bheidh tú sciobtha i do chime ag Aisiúr?”



²³ [Ansin d'fhéach sé ar Óg] agus chan sé a laoi agus dúirt:

“Tá lucht na farraige ag tóstal lastuaidh,

²⁴ longa ó chóstaí Chitím.

Cránn siad Aisiúr, cránn siad Éibir.

Déanfar eisean chomh maith a dhísciú go brách.”

²⁵ Ansin d'éirigh Balám, agus d'imigh leis abhaile. D'imigh Bálac leis chomh maith.

Iosrael i bPeór

25 Chuir Iosrael fúthu i Sitím, agus chrom na daoine ar striapachas a dhéanamh le hógmhná Mhóáb. ² Thugadarsan cuireadh don phobal go féastaí a ndéithe, agus chaith an pobal an bia agus shléachtadar dá ndeithe. ³ Ghabh Iosrael faoi chuing Bhál Peór ar an gcuma sin agus las fraoch feirge an Tiarna ina n-aghaidh. ⁴ Dúirt an Tiarna le Maois: “Tóg ceannairí uile an phobail, agus caith le fail i lár an lae ghéigil ghil i bhfianaise an Tiarna iad; ansin iompóidh cuthach feirge an Tiarna ó Iosrael.” ⁵ Dúirt Maois leis na breithiúna in Iosrael: “Ní foláir do gach duine agaibh iad siúd dá mhuintir a chuaigh faoi chuing Bhál Peór a chur chun báis.”

⁶ Seo fear de chlann Iosrael ag gabháil an treo agus an bhean Mhidiánach á tabhairt isteach ina theaghlach aige, os comhair súile Mhaois agus chomhthionól uile chlann Iosrael agus iad ag lógóireacht ag doras Bhoth na Teagmhála. ⁷ Píneachás mac Eileázár mhic Áron, an sagart, nuair a chonaic sé é sin, d'éirigh sé, d'fhág an comhthionól, agus rug ar shleá, ⁸ agus chuaigh ar tí an Iosraelaigh isteach sa seomra cúil agus sháigh sé an



tsleá go feirc sa bhléin iontu araon, an tIosraelach fir agus an bhean. Stad an phlá a bhuaill clann Iosrael ar an gcaoi sin. ⁹Bhí ceithre mhíle fichead marbh den phlá cheana féin, dá ainneoin sin.

¹⁰Labhair an Tiarna le Maois agus dúirt: ¹¹“Píneachás, sagart, mac Eileázár mhic Áróin, chuir sé mo chuthach de chlann Iosrael, óir is aige amháin a bhí dúthracht mar mo dhúthrachta; uime sin níor scrios mé clann Iosrael de bharr mo dhúthrachta. ¹²Fógair é seo dá bhrí sin: ‘Seo mé ag bronnadh mo chonradh mar chúiteamh airsean; ¹³agus beidh sé in chonradh sagartachta síoraí aigesean agus ag a shliocht dá éis, óir bhí dúthracht aige i mbun a Dhé, agus rinne sé leorghníomh do phobal Iosrael.’” ¹⁴An tIosraelach a maraíodh – an té úd is é sin a maraíodh leis an mbean Mhidiánach – Zimrí mac Sálú a ba ainm dó, ceannaire ar theaghlach sinseartha de chuid Shímeon. ¹⁵An Midiánach mná a maraíodh, Cozbaí iníon Zúr – taoiseach sleachta, teaghlach sinseartha i Midián – a ba ainm di.

¹⁶Labhair an Tiarna le Maois agus dúirt: ¹⁷“Buair na Midiánaigh agus buail iad. ¹⁸Óir bhuaill siad thú lena gcluain i ngnó Pheór, agus i ngnó Chozbaí a siúr, iníon taoisigh i Midián, an bhean a maraíodh an lá a bhuaill an phlá de bharr Pheór.”

Daonáireamh

26 Tar éis na plá labhair an Tiarna le Maois agus le hEileázár mac Áróin, an sagart, agus dúirt: ²“Déan daonáireamh de réir sleachta ar chomhthionól chlann Iosrael go léir – gach fear fiche bliain d’aois agus breis agus é ar a chumas airm a iompar.”



³Labhair Maois agus Eileázár an sagart leis na daoine ar mhachairí Mhóáb i ngar don Iordáin sall ó Ireachó. ⁴Rinneadar an t-áireamh (faoi mar a d'ordaigh an Tiarna do Mhaois agus do chlann Iosrael ag teacht dóibh on Éigipt): Fir fiche bliain d'aois agus breis: ⁵Reúbaen céadghin Iosrael: clann Reúbaen: do Hanóc, sliocht Hanóc; do Phalú, sliocht Phalú; ⁶do Haezron, sliocht Haezron; do Chairmi, sliocht Chairmi. ⁷Sin iad sleachta Reúbaen. Daichead trí mhíle seacht gcéad agus a tríocha fear a líon.

⁸Clann Phalú: Eilíáb. ⁹Clann Eilíáb: Namúael, agus Dátán agus Aibíorám. An bheirt seo Dátán agus Aibíorám, daoine ar a raibh meas ag an bpobal, is iad a thug dúshlán Mhaois agus Árón; bhaineadar le lucht leanúna Chorach a thug dúshlán an Tiarna.

¹⁰D'oscail an talamh a chraos agus shlog sé iad – dithíodh Corach agus a lucht leanúna nuair a d'alp an tine dhá chéad go leith fear. Ba rabhadh iad. ¹¹Níor scriosadh ámh clann Chorach.

¹²Clann Shímeon de réir sleachta: do Namúael, sliocht Namúael; do Iáimín, sliocht Iáimín; do Iáicín, sliocht Iáicín. ¹³Do Zearach, sliocht Zearach; do Sheáúl, sliocht Sheáúl.

¹⁴Sin iad sleachta Shímeon. Dhá mhíle fichead agus dá chéad fear a líon.

¹⁵Clann Ghád de réir sleachta: do Zifeón, sliocht Zifeón; do Haigí, sliocht Haigí; do Shiúiní, sliocht Shiúiní; ¹⁶do Oznaí, sliocht Oznaí; do Éirí, sliocht Éirí; ¹⁷do Aród, sliocht Aród; do Aíríilí, sliocht Aíríilí. ¹⁸Sin iad sleachta chlann Ghád. Daichead míle cúig céad fear a líon.

¹⁹Clann Iúdá: Éar agus Ónán: cailleadh Éar agus Ónán i dtír Chanán. ²⁰Clann Iúdá de réir sleachta; do Shéalá, sliocht Shéalá; do Bhearna, sliocht Bhearnan; do Zearach, sliocht Zearach. ²¹Seo iad clann Bhearnan: do Heazron, sliocht Heazron; do Hámúl,



sliocht Hámúl. ²² Sin iad sleachta chlann Iúdá. Seachtó cúig mhíle agus cúig céad fear a líon.

²³ Clann Íosácár de réir sleachta: do Thólá, sliocht Thóla; do Phuvá, sliocht Phuvá; ²⁴ do Iáisiúb, sliocht Iáisiúb; do Shiomron, sliocht Shiomron. ²⁵ Sin iad sleachta chlann Íosácár. Seasca ceathair míle trí chéad fear a líon.

²⁶ Clann Zabúlun de réir sleachta: do Sheirid, sliocht Sheirid; do Éalón, sliocht Éalon; do Iachlael, sliocht Iachlael. ²⁷ Sin iad sleachta Zabúlun. Trí fichid míle cúig céad fear a líon. ²⁸ Clann Iósaeif de réir sleachta: Manaise agus Eafráim. ²⁹ Clann Mhanaise: do Mháicír, sliocht Mháicír; ba é Máicír athair Ghileád. Do Ghileád, sliocht Ghileád. ³⁰ Seo iad sleachta Ghileád: do Íeizir, sliocht Íeizir; do Héilic, sliocht Héilic; ³¹ do Aisriéil, sliocht Aisriéil; do Sheicim, sliocht Sheicim; ³² do Shimíodá, sliocht Shimíodá; do Héifir, sliocht Héifir. ³³ Ní raibh aon mhac ach iníonacha ag Zalofachád, mac Héifir; seo iad ainmneacha iníonacha Zalofachád – Machlá agus Noá agus Hogleá agus Milceá agus Tirzeá. ³⁴ Sin iad sleachta Mhanaise; caoga dó míle seacht gcéad fear a líon.

³⁵ Seo iad clann Eafráim de réir sleachta: do Shiútala, sliocht Shiútala; do Bheicir, sliocht Bheicir; do Thachan, sliocht Thachan. ³⁶ Seo iad clann Shiútala. Do Éarán, sliocht Éarán. ³⁷ Sin iad sleachta Eafráim. Tríocha dó míle cúig céad fear a líon. Ba iadsan clann Iósaeif de réir sleachta.

³⁸ Clann Bhiniáimin de réir sleachta: do Bheala, sliocht Bheala; do Aisbéal, sliocht Aisbéal; do Aichíorám, sliocht Aichíorám. ³⁹ Do Sheafúfám, sliocht Sheafúfám; do Húfám, sliocht Húfám. ⁴⁰ Ba iad Ard agus Námán clann Bheala; do Ard, sliocht Ard; do



Námán, sliocht Námán. ⁴¹Sin iad clann Bhiniáimin de réir sleachta. Daichead cúig míle sé chéad fear a líon.

⁴²Clann Dhán de réir sleachta: do Shiúchám, sliocht Shiúchám. Sin iad clann Dhán de réir sleachta. ⁴³Seasca ceathair míle ceithre chéad fear líon iomlán sleachta Shiúchám.

⁴⁴Clann Áiséar de réir sleachta: do Imneá, sliocht Imneá; do Isví, sliocht Isví; do Bheiría, sliocht Bheiría. ⁴⁵Do chlann Bheiría: do Héibir, sliocht Héibir; do Mhailcíéil, sliocht Mhailcíéil. ⁴⁶Séarach a ba ainm d'iníon Áiséar. ⁴⁷Sin iad sleachta Áiséar. Caoga trí mhíle ceithre chéad fear a líon.

⁴⁸Clann Naftáilí de réir sleachta: do Iachzael, sliocht Iachzael; do Ghúiní, sliocht Ghúiní. ⁴⁹Do Iéizir, sliocht Iéizir; do Shiléim, sliocht Shiléim. ⁵⁰Sin iad sleachta Naftáilí, de réir sleachta. Daichead cúig mhíle cúig céad fear líon chlann Naftáilí.

⁵¹Deichniúr ar fhichid, ar sheacht gcéad, ar mhíle, ar shé chéad míle, líon iomlán chlann Iosrael.

⁵²Labhair an Tiarna le Maois agus dúirt leis: ⁵³“Tá an talamh le roinnt mar oidhreacht orthu seo de réir líon na ndaoine cláraithe. ⁵⁴Do threabhchas líonmhar, tabhair oidhreacht mhór; do threabhchas beag, oidhreacht bheag; bíodh an oidhreacht a thabharfar do gach treibh de réir a líon cláraithe. ⁵⁵Ní foláir roinnt na talún a dhéanamh áfach ar cranna; faigheadh gach duine a oidhreacht de réir líon na n-ainmneacha i dtreibheanna na bpatarc. ⁵⁶Tá oidhreacht na dtreibheanna le roinnt ar cranna, gach dream le cuid a fháil de réir a lín – beag, nó mór.”



Daonáireamh na Léivíteach

⁵⁷Seo iad de réir fine na Léivítigh a claraíodh: do Ghéirseon, fine Ghéirseon; do Chohát, fine Chohát; do Mharáraí, fine Mharáraí. ⁵⁸Seo iad sleachta na Léivíteach; sliocht Libní, sliocht Haebrón, sliocht Mhailí, sliocht Mhúisí, sliocht Chorach. Ba é Cohát athair Amrám. ⁵⁹Ba é Íoceibid iníon Léiví, a rugadh dó san Éigipt, ainm bhean Amrám; agus rug sí d'Amrám Áron agus Maois agus Miriám a ndeirfiúr. ⁶⁰Ba é Áron athair Nádáb agus Aibíchiú, Eileázár, agus Ítéámár. ⁶¹Cailleadh Nádáb agus Aibíchiú nuair a d'ofráladar tine mhídhleathach i láthair an Tiarna. ⁶²Cláraíodh trí mhíle fichead fireannach ar fad d'aois mí nó breis; níor áiríodh iad le clann Iosrael mar nach bhfuairadar oidhreacht i measc chlann Iosrael.

⁶³Sin iad na fir a ríomhaigh Maois agus Eileázár an sagart a rinne an daonáireamh seo ar chlann Iosrael ar mhachairí Mhóáb láimh leis an Iordáin sall ó Ireachó. ⁶⁴Ní raibh orthu fear díobh siúd a chláraigh Maois agus Áron sagart, nuair d'áiríodar clann Iosrael i bhfásach Shíonáí. ⁶⁵Óir dúirt an Tiarna ina dtaobh-san: “Geobhaidh siad bás san fhásach.” Níor fágadh fear díobh seachas Cálaeb mac Iafuna, agus Iósua mac Nún.

Oidhreacht Iníonacha

27Tháinig chun tosaigh iníonacha Zalofachád mac Héifir, mac Ghileád, mac Mháicír, mac Mhanaise; bhain sé le sleachta Mhanaise, mac Iósaef. Ba iad seo ainmneacha a iníonacha: Machlá agus Noá, agus Hoglá agus Milceá agus Tirzeá. ²Sheasadar i láthair



Mhaois agus Eileázár an sagart, agus i láthair na gceannairí agus an chomhthionóil ag doras Bhoth na Teagmhála, agus dúirt: ³“Fuair ár n-athairne bás san fhásach; níor bhain sé leis an dream a bhí i gcogar ceilge in aghaidh an Tiarna, complacht Chorach; fuair sé bás de bharr a pheaca féin gan clann mhac air. ⁴Cén fáth go gcaillfí ainm ár n-athar ar a fhine? Ó bhí sé gan mhac, tabhair sealúchas éigin dúinne i measc a bhráithre gaoil.”

⁵Chuir Maois a gcúis i láthair an Tiarna. ⁶Dúirt an Tiarna le Maois: ⁷“Tá an ceart ag iníonacha Zalofachád; tabhair seilbh dóibh ar oidhreacht i measc bhráithre gaoil a n-athar, agus fág oidhreacht a n-athar fúthu. ⁸Agus abair le clann Iosrael: ‘Má fhaigheann duine bás gan mhac, ansin téadh a oidhreacht chun a iníne. ⁹Mura mbíonn iníon aige, téadh a oidhreacht chun a dheartháireacha. ¹⁰Mura mbíonn deartháireacha aige, téadh a oidhreacht chun deartháireacha a athar. ¹¹Mura mbíonn deartháireacha ag a athair, téadh a oidhreacht chun an té is goire gaol dó ar a fhine; bíodh sí aige. Bíodh sin mar reacht agus mar dhlí ag clann Iosrael, mar a d’ordaigh an Tiarna do Mhaois.”

Iósua le Bheith i gCeannas

¹²Dúirt an Tiarna le Maois: “Suas leat faoin sliabh seo Abáraím agus féach uait ar an bhfearann atá tugtha agam do chlann Iosrael. ¹³Nuair a bheidh lán do shúl faighte agat de, cruinneofar thú chun do mhuintire, dála Áron do dheartháir. ¹⁴Óir nuair a bhí an pobal ag monabhar i m’aghaidh, rinne sibh araon ceannairc i bhfásach Zin in aghaidh m’ordú daoibh mo naofacht a fhoilsiú os comhair a súl de bhíthin an uisce.” (Uisce Mhiríbeá Cháidéis i bhfásach Zin atá i gceist.)



¹⁵Dúirt Maois leis an Tiarna: ¹⁶“Go gcuire an Tiarna, Dia na spiorad, a chuireann anam san uile dhúil bheo, fear i gceannas an chomhthionóil, ¹⁷fear a rachaidh rompu ag dul amach dóibh agus ag teacht isteach, fear a sheolfaidh amach iad agus a sheolfaidh isteach iad, i dtreo nach mbeadh comhthionól an Tiarna mar chaoirigh gan aoire.” ¹⁸Agus dúirt an Tiarna le Maois: “Tóg Iósua mac Nún, fear ina lonnaíonn an spiorad, agus leag do lámha air; ¹⁹ansin beir leat é i láthair Eileázár, an sagart, agus i láthair an chomhthionóil go léir, agus tabhair d’orduithe dó ina láthair. ²⁰Roinn cuid de d’údarás leis d’fhonn go ngéillfeadh comhthionól uile chlann Iosrael dó. ²¹Seasadh sé i láthair Eileázár an sagart, agus déanadh seisean ceistiú ina thaobh i láthair an Tiarna de réir ghnás an Úirím. De réir a fhocail a rachaidh siad amach, agus de réir a fhocail a thiofoidh siad isteach – sea eisean agus clann Iosrael fairis, an comhthionól go léir.” ²²Rinne Maois mar a d’ordaigh an Tiarna. Rug sé leis Iósua agus chuir é faoi bhráid Eileázár agus an chomhthionóil go léir. ²³Leag sé a lámha air agus thug orduithe dó mar a d’aithin an Tiarna trí Mhaois.

Íobairtí

28 Labhair an Tiarna le Maois agus dúirt: ²“Tabhair an t-ordú seo leanas ó bhéal do chlann Iosrael. ‘An o fráil dom, mo bhia d’íobairt uileloiscthe, an chumhracht a thaitníonn liom, féachaigí chuige go dtugann sibh chugam é in am tratha.’ ³Abair leo:

Seo iad na hÍobairtí loiscthe nach foláir daoibh a o fráil don Tiarna:

Dhá uan bhliana gan mháchail mar íobairt uileloiscthe shíoraí gach lá. ⁴Ní foláir daoibh



an chéad uan a ofráil ar maidin, an dara ceann um eadra nóna,⁵ mar aon le habhlann de dheachú éafá de phlúr mín measctha le ceathrú hín den ola is fíre.⁶ Sin í an íobairt uileloiscthe shíoraí a bunaíodh ar Shliabh Shíonáí, mar chumhracht thaitneamhach, mar íobairt dhóite don Tiarna.⁷ Mar íobairt dí ag gabhail leis, bíodh ceathrú hín an t-uan; ní foláir an íobairt dí de dheoch chrua don Tiarna a dhoirteadh sa sanctóir.⁸ Ní foláir duit an dara huan a ofráil mar íobairt uileloiscthe um eadra nóna; déan dála na maidine maidir le habhlann agus le híobairt dí léi seo, íobairt dhóite, cumhracht thaitneamhach leis an Tiarna.

⁹ Ar an tsabóid ní foláir duit dhá uan bhliana gan mháchail a ofráil, agus dhá dheachú éafá de phlúr mín measctha le hola mar abhlann, mar aon leis an íobairt dí a ghabhann leo.¹⁰ Tá íobairt uileloiscthe na sabóide le hofráil gach sabóid mar aon leis an íobairt uileloiscthe shíoraí agus an íobairt dí a ghabhann léi.

¹¹ I dtús gach míosa de bhur gcuid, ní foláir daoibh íobairt uileloiscthe a ofráil don Tiarna: dhá tharbh óga, reithe agus seacht n-uan bliana gan mháchail.¹² Le gach tarbh bíodh abhlann de thrí dheachú éafá de phlúr mín measctha le hola; le gach reithe, abhlann de dhá dheachú de phlúr mín measctha le hola;¹³ le gach uan, abhlann de dheachú de phlúr mín measctha le hola. Íobairt uileloiscthe í seo, cumhracht thaitneamhach agus íobairt dhóite don Tiarna.¹⁴ Sé a bheidh san íobairt dí a ghabhann léi: leath hín fíona do tharbh, trian hín do reithe, ceathrú hín d’uan. Ní foláir íobairt dhóite mar sin a bheith gach mí ar mhí ar feadh míonna na bliana.¹⁵ Chomh maith leis an íobairt uileloiscthe shíoraí, ní foláir pocán gabhair a ofráil don Tiarna, mar íobairt pheaca, agus a íobairt dí a ghabháil leis.



¹⁶An ceathrú lá déag den chéad mhí Cáisc an Tiarna, ¹⁷ agus is lá féile an cúigiú lá déag den mhí seo; itear arán slim ar feadh seacht lá. ¹⁸Ar an gcéad lá bíodh tionól sollúnta, agus ná déanaigí aon obair throm, ¹⁹ ach ofrálaigí íobairt dhóite mar uileoscadh don Tiarna: dhá tharbh óga, reithe agus seacht n-uan fireann bliana gan mháchail. ²⁰Mar abhlann de phlúr mín measctha le hola, gabhadh leo trí dheachú éafá don tarbh, dhá dheachú don reithe, ²¹ agus deachú an ceann don seacht n-uan. ²²Bíodh pocán gabhair chomh maith don íobairt pheaca, chun gnás an leorghnímh a chomhlíonadh ar bhur son. ²³Ní foláir an meid sin a dhéanamh de bhreis ar íobairt uileloiscthe na maidine, rud is íobairt uileloiscthe shíoraí. ²⁴Ní foláir daoibh íobairt a dhéanamh mar sin gach lá ar feadh na seacht lá; is bia í, íobairt dhóite, agus cumhracht thaitneamhach leis an Tiarna. Tá sí le hofráil de bhreis ar an íobairt uileloiscthe agus ar an íobairt dí a ghabhann léi. ²⁵Ar an seachtú lá bíodh tionól sollúnta agaibh, gan aon obair throm á dhéanamh.

²⁶Lá na gcéadorthaí, nuair a ofrálann sibh bhur n-abhlann de ghrán nua don Tiarna, in bhur bhFéile Seachtainí, bíodh tionól sollúnta agaibh; ná déanaigí aon obair throm. ²⁷Ofrálaigí íobairt uileloiscthe, cumhracht thaitneamhach leis an Tiarna: dhá tharbh óga, reithe agus seacht n-uan fireann bliana; ²⁸ mar abhlann de phlúr mín measctha le hola ag gabháil léi bíodh trí dheachú d'éafá do gach tarbh, ²⁹ dhá dheachú don reithe, agus deachú do gach ceann de na seacht n-uan. ³⁰Bíodh pocán gabhair chomh maith [don íobairt pheaca], chun gnás an leorghnímh a chomhlíonadh ar bhur son. ³¹Ní foláir an meid seo a dhéanamh de bhreis ar an íobairt uileloiscthe shíoraí agus an abhlann a ghabhann léi. Bídís agaibh gan mháchail mar aon lena n-íobairtí dí.



Féile na Stoc agus Féil te Eile

29 Ar an gcéad lá den seachtú mí, bíodh tionól sollúnta agaibh, ná déanaigí aon obair throm. Sé lá séidte na stoc agaibh é. ²Ofrálaigí mar íobairt loiscthe, mar chumhracht thaitneamhach leis an Tiarna: tarbh óg, reithe agus seacht n-uan fireann bliana gan mháchail. ³Mar abhlann de phlúr mín measctha le hola ag gabháil léi bíodh trí dheachú éafá don tarbh, dhá dheachú don reithe, ⁴agus deachú do gach ceann de na seacht n-uan. ⁵Bíodh pocán gabhair chomh maith don íobairt pheaca, chun gnás an leorghnímh a chomhlíonadh ar bhur son. ⁶Ní foláir an méid sin go léir a dhéanamh de bhreis ar íobairt uileloiscthe na ré nua agus a habhlann, an íobairt uileloiscthe shíoraí agus a habhlann, agus na híobairtí dí a ghabhann leo de réir dlí – cumhracht thaitneamhach, ofráil dhóite don Tiarna.

⁷Ar an deichiú lá den seachtú mí seo, bíodh tionól sollúnta agaibh; déanaigí troscadh agus ná déanaigí aon obair throm. ⁸Ní foláir daoibh a ofráil mar íobairt uileloiscthe don Tiarna, mar chumhracht thaitneamhach: tarbh óg, reithe, seacht dtogha uain bhliana fhireanna gan mháchail. ⁹Leo mar abhlann de phlúr mín measctha le hola, bíodh trí dheachú éafá don tarbh, dhá dheachú don reithe, ¹⁰agus deachú an ceann do na seacht n-uain. ¹¹Ní foláir pocán gabhair a ofráil don íobairt pheaca. Tá an méid seo le bheith de bhreis ar an íobairt pheaca d'fhéile an leorghnímh, agus ar an íobairt uileloiscthe lena n-abhlann agus lena n-íobairtí dí.

¹²Ar an gcúigiú lá déag den seachtú mí bíodh tionól sollúnta agaibh; ná déanaigí obair throm agus ceiliúraigí féile don Tiarna ar feadh seacht lá. ¹³Ní foláir daoibh a ofráil mar



íobairt uileloiscthe, ofráil dhóite, agus mar chumhracht thaitneamhach leis an Tiarna: trí tharbh déag óga, dhá reithe, ceithre uan déag fireann bliana gan mháchail. ¹⁴Mar abhlann de phlúr mín meastha le hola ag gabháil leo, bíodh trí dheachú d'éafá an ceann don trí tharbh déag, dhá dheachú an ceann don dá reithe, ¹⁵agus deachú an ceann don cheithre uan déag. ¹⁶Bíodh pocán gabhair chomh maith mar íobairt pheaca. Tá an méid seo le bheith de bhreis ar an íobairt uileloiscthe shíoraí, a habhlann agus a híobairt dí.

¹⁷Ar an dara lá: dhá tharbh déag óga, dhá reithe, ceithre uan déag fireann bliana gan mháchail; ¹⁸na habhlanna agus na híobairtí dí a ghabhann leo mar atá dlite de réir líon na dtarbh, na reithí agus na n-uan. ¹⁹Bíodh pocán gabhair chomh maith don íobairt pheaca. Tá an méid seo le bheith de bhreis ar an íobairt uileloiscthe shíoraí, a habhlann agus a híobairt dí.

²⁰Ar an tríú lá: aon tarbh déag óg, dhá reithe, ceithre uan déag fireann bliana gan mháchail; ²¹na habhlanna agus na híobairtí dí a ghabhann leo mar atá dlite de réir líon na dtarbh, na reithí agus na n-uan. ²²Bíodh pocán gabhair chomh maith don íobairt pheaca. Tá an méid seo le bheith de bhreis ar an íobairt uileloiscthe shíoraí, a habhlann agus a híobairt dí.

²³Ar an gceathrú lá: deich dtarbh, dhá reithe, ceithre uan déag fireann bliana gan mháchail; ²⁴na habhlanna agus na híobairtí doirte a ghabhann leo mar atá dlite de réir líon na dtarbh, na reithí agus na n-uan. ²⁵Bíodh pocán gabhair chomh maith don íobairt pheaca. Tá an méid seo le bheith de bhreis ar an íobairt uileloiscthe shíoraí, a habhlann agus a híobairt dí.



²⁶Ar an gcúigiú lá: naoi dtarbh, dhá reithe, ceithre uan déag fireann bliana gan mháchail; ²⁷na habhlanna agus na híobairtí dí a ghabhann leo mar atá dlite de réir líon na dtarbh, na reithí agus na n-uan. ²⁸Bíodh pocán gabhair chomh maith don íobairt pheaca. Tá an méid seo go léir le bheith de bhreis ar an íobairt uileloiscthe shíoraí, a habhlann agus a híobairt dí.

²⁹Ar an séú lá: ocht dtarbh, dhá reithe, ceithre uan déag fireann bliana gan mháchail; ³⁰na habhlanna agus na híobairtí doirte a ghabhann leo mar atá dlite de réir líon na dtarbh, na reithí agus na n-uan. ³¹Bíodh pocán gabhair chomh maith don íobairt pheaca. Tá an méid seo go léir le bheith de bhreis ar an íobairt uileloiscthe shíoraí, a habhlann agus a híobairt dí.

³²Ar an seachtú lá: seacht dtarbh, dhá reithe, ceithre uan déag fireann bliana, gan mháchail; ³³na habhlanna agus na híobairtí dí a ghabhann leo mar atá dlite de réir líon na dtarbh, na reithí, agus na n-uan. ³⁴Bíodh pocán gabhair chomh maith don íobairt pheaca. Tá an méid seo go léir le bheith de bhreis ar an íobairt uileloiscthe shíoraí, a habhlann agus a híobairt dí.

³⁵Ar an ochtú lá bíodh tionól sollúnta agaibh; ná déanaigí aon obair throm, ³⁶ach ofrálaigí íobairt uileloiscthe, íobairt dhóite, cumhracht thaitneamhach leis an Tiarna: tarbh, reithe, seacht n-uan fireann bliana gan mháchail; ³⁷na habhlanna agus na híobairtí doirte a ghabhann leo mar atá dlite de réir líon na dtarbh, na reithí, agus na n-uan. ³⁸Bíodh pocán gabhair chomh maith don íobairt pheaca. Tá an méid seo go léir le bheith de bhreis ar an íobairt uileloiscthe shíoraí, a habhlann agus a híobairt dí.



³⁹Sin a bhfuil le déanamh agaibh don Tiarna ar bhur bhféilte sollúnta; de bhreis ar bhur n-ofrálacha móide agus deona, bhur n-íobairtí uileloiscthe, bhur n-abhlanna agus bhur n-íobairtí dí agus bhur n-íobairtí comaoineach.”

⁴⁰D’inis Maois do chlann Iosrael go beacht gach ar ordaigh an Tiarna dó.

Móideanna

30 Labhair Maois le ceannairí threibheanna chlann Iosrael agus dúirt: “Seo mar a d’ordaigh an Tiarna:

²Nuair a thugann duine móid, nó nuair a thugann sé geall faoi bhrí na mionn, ná briseadh sé a fhocal; cibé rud a gheall sé le focal béil, comhlíonadh sé é. ³Má thugann bean móid don Tiarna, nó má thugann sí a briathar gill ina hóige agus í fós i dteach a hathar, ⁴agus má chluineann seisean i dtaobh na móide nó an ghill lenar cheangail sí í féin, gan aon ní a rá léi, ansin bíodh an mhóid a thug sí, cibé sórt í, bailí agus bíodh an geall a thug sí, cibé sórt é, bailí. ⁵Ach má chuireann a hathair ina coinne an lá a chluineann sé ina taobh, ní bheidh aon mhóid a thug sí bailí, ná aon gheall lenar cheangail sí í féin.

Maithfidh an Tiarna di mar gur chuir a hathair ina coinne. ⁶Má phósann sí agus í faoi cheangal móide nó focail éaganta gill a thug sí, ⁷agus má chluineann a fear ina thaobh gan aon ní a rá léi an lá a chluineann, ansin bíodh a móideanna bailí agus bíodh na geallta a thug sí bailí. ⁸Ach an lá a chluineann an fear é, má chuireann sé ina choinne os ard, ansin cuirfidh sé an mhóid a thug sí, nó an focal éaganta gill lenar cheangail sí í féin, ar ceal. Maithfidh an Tiarna di é.



⁹Ach móid baintrí, nó mná scartha, nó aon gheall a thug sí, tá siad bailí.

¹⁰Má thug sí móid i dteach a fir, nó má thug sí geall faoi bhrí na mionn, ¹¹agus gur chuala a fear faoi, gan aon ní a rá léi, agus gan cur ina choinne, ansin bíodh a móideanna go léir bailí is bíodh gach geall lenar cheangail sí í féin bailí. ¹²Ach má chuireann a fear ar ceal iad an lá a chluineann sé iad, ní bheidh brí ag focal a béil, móid ná geall. Ó chuir a fear ar ceal iad, maithfidh an Tiarna di iad. ¹³Aon mhóid nó mionn a luíonn ar bhean, is féidir dá fear é a dhaingniú nó é a chealú. ¹⁴Ach mura mbíonn rud éigin ráite aige faoi cheann lae, ciallaíonn seo go bhfuil a móid, cibé sórt í, nó a geall, cibé sórt é, á dhaingniú aige. Tugann sé bailíocht dóibh mura ndeir sé rud éigin an lá a chuala sé fúthu. ¹⁵Ach más níos sia ná sin tar éis iad a chlos a chuireann sé ar ceal iad, ansin bíodh ualach pheaca a mhná air.”

¹⁶Sin iad na reachtanna a d’aithin an Tiarna do Mhaois i dtaobh mar atá idir fear agus a bhean, agus idir athair agus a iníon fad tá sí óg agus ag maireachtáil faoi dhíon a hathar.

An Chreach

31 Labhair an Tiarna le Maois agus dúirt: ²“Déan clann Iosrael a dhíolt ar na Midiánaigh. Ansin cruinneofar chun do mhuintire thú.” ³Dúirt Maois leis an bpobal: “Gabhadh cuid agaibh airm chugaibh, d’fhonn cogadh a chur ar an Midiánach agus díoltas an Tiarna a imirt ar an Midiánach. ⁴Seolaigí míle fear as gach treibh d’Iosrael chun an chatha.” ⁵Ar an gcuma sin fuarthas, ó shluaite Iosrael, dhá mhíle dhéag fear le harm troda, míle ó gach treibh. ⁶Sheol Maois chun cogaidh iad míle as gach treibh agus



Píneachás mac Eileázár an sagart leo ag iompar na soithí naofa agus na dtrumpaí chun an gháir a thógáil. ⁷D’fhearadar cogadh ar Mhidián mar a d’ordaigh an Tiarna agus chuireadar gach mac máthar chun báis. ⁸Mharaíodar chomh maith, de bharr ar an ár, rithe Mhidián – Eiví, Reicim, Zúr, Húr agus Reaba, cúig rí Mhidián. D’imríodar bás de rinn claímh leis ar Bhalám mac Bheór. ⁹Ghabh clann Iosrael mná agus miondaoine Mhidián ina gcimí, agus rugadar leo mar chreach a dtáinte, a dtréada agus a maoin go léir.

¹⁰Chuireadar tine leis na cathracha go léir inar chónaíodar, agus lena n-áitribh go léir.

¹¹Rugadar leo a gcreach go léir, a raibh gafa acu idir dhuine agus bheithíoch, ¹²agus thugadar idir chimí agus bhraid agus chreach, go Maois agus go Eileázár an sagart agus go comhthionól chlann Iosrael go léir sa champa ar mhachairí Mhóáb láimh leis an Iordáin, sall ó Ireachó.

¹³Chuaigh Maois agus Eileázár an sagart, agus ceannairí uile an chomhthionóil amach lasmuigh den champa ina gcoinne. ¹⁴Bhí fearg ar Mhaois le ceannasaithe an airm, ceannairí na mílte, agus ceannairí na gcéadta, a d’fhill ón bhfeachtas míleata sin. ¹⁵Chuir Maois an cheist: “Cén fáth a ndearna sibh anacal anama ar na mná go léir?” ¹⁶“Féach,” ar sé, “is iadsan an dream ceannann céanna a thug ar chlann Iosrael, trí chomhairle Bhalám, dul amú agus an Tiarna a shéanadh i ngnó úd Pheór, agus sin é mar a bhuail an phlá comhthionól an Tiarna. ¹⁷Cuirigí chun báis dá bhrí sin gach leanbh mic ar na miondaoine. Cuirigí chun báis chomh maith gach bean a luigh le fear. ¹⁸Déanaigí anacal anama ar gach ógbhean nár luigh le fear, agus tógai gí chugaibh féin iad. ¹⁹Maidir libh féin, aon duine agaibh a mharaigh fear nó a bhain le corpán, lonnaíodh sé lasmuigh den champa ar feadh seacht lá; déanaigí sibh féin agus bhur gcimí a íonghlanadh ar an tríú agus ar an seachtú



lá; ²⁰ ionghlanaigí chomh maith bhur n-éidí – gach ball éadaigh de leathar nó de rón gabhair, agus gach ní déanta d’adhmaid.” ²¹ Dúirt Eileázár an sagart leis na saighdiúirí a tháinig abhaile ón bhfeachtas seo: “Reacht den dlí,” ar sé, “is ea é seo a d’aithin an Tiarna do Mhaois. ²² Ach an t-ór, an t-airgead, an cré-umha, an t-iarann, an stán agus an luaidhe – ²³ gach rud a sheasann tine, ní foláir é a chur tríd an tine agus beidh sé glan, ach ní foláir é a ghlanadh leis le huisce an ghlanda. Cibé rud nach seasfadh tine, ní foláir daoibh é a chur trí uisce. ²⁴ Nígí bhur gcuid éadaigh ar an seachtú lá agus beidh sibh glan ansin. Ní miste daoibh filleadh ar an gcampa ansin.”

²⁵ Labhair an Tiarna le Maois agus dúirt: ²⁶ “Déan-sa, tú féin agus Eileázár an sagart, agus ceannairí theaghlaigh athartha an chomhthionóil, an chreach a ríomhadh idir dhuine agus ainmhí. ²⁷ Ansin roinn an chreach ina dhá leath idir lucht troda an fheachtais agus an chuid eile den chomhthionól. ²⁸ Cuir i leataobh mar chuid ranna don Tiarna as roinn na muintire a chuaigh amach ag troid san fheachtas, ceann as gach cúig céad cime agus damh agus asal agus caora. ²⁹ Tóg iadsan as an leathroinn is dual dóibh agus tabhair iad do Eileázár an sagart mar íobairt don Tiarna. ³⁰ As an leath atá ag dul do chlann Iosrael tóg ceann as gach caoga cime, agus damh, agus asal agus caora agus ainmhí ar bith eile, agus tabhair iad do na Léivítigh ar a bhfuil cúram thaibearnacal an Tiarna.” ³¹ Rinne Maois agus Eileázár an sagart mar a d’aithin an Tiarna do Mhaois. ³² Anois ba é seo méid na creiche a d’fhan den bhraid a ghabh na saighdiúirí: sé chéad seachtó cúig mhíle de mhionairnéis, ³³ seachtó dó míle eallach, ³⁴ seasca haon míle asal, ³⁵ agus, de chimí, tríocha dó míle bean ar fad nár luigh le fear. ³⁶ Agus an leath ba chion na muintire a ghlac páirt sa chogadh seo é: trí chéad tríocha seacht míle cúig céad de mhionairnéis ³⁷ dar chuid an



Tiarna trí chéad seachtó cúig, ³⁸ tríocha sé mhíle eallach dar chuid an Tiarna seachtó dó, ³⁹ tríocha míle cúig céad asal dar chuid an Tiarna seasca haon, ⁴⁰ sé mhíle dhéag cime dar chuid an Tiarna tríocha dó. ⁴¹ Thug Maois do Eileázár an sagart an chuid a cuireadh i leataobh don Tiarna de réir treoracha an Tiarna do Mhaois.

⁴² Maidir leis an leath ba dhual do chlann Iosrael, rud a chuir Maois ar leithrigh ó chuid na gcogthach, ⁴³ is é seo an méid a bhí sa leath leis an gcomhthionól: trí chéad tríocha seacht mhíle cúig céad de mhionairnéis, ⁴⁴ tríocha sé mhíle eallach, ⁴⁵ tríocha míle cúig céad asal, ⁴⁶ sé mhíle dhéag cime. ⁴⁷ As an leath seo, cion chlann Iosrael, thóg Maois ceann as gach caoga cime agus ainmí, agus thug iad do na Léivítigh ar a raibh cúram thairbearnacal an Tiarna, de réir treoracha an Tiarna do Mhaois.

⁴⁸ Ceannasaithe na sluaite a throid, ceannairí na mílte agus ceannairí na gcéadta, thángadar go Maois ⁴⁹ agus dúradar le Maois: “Chomhairigh do searbhóntaí na saighdiúirí faoina gceannas; níl fear ar iarraidh uainn. ⁵⁰ Thugamar dá bhrí sin mar ofráil don Tiarna na seoda óir a fuaireamar – slabhraí rí agus géag, fáinní, cluasáin, agus dealga – chun go ndéanfaí gnás an leorghnímh a chomhlíonadh ar ár son i láthair an Tiarna.” ⁵¹ Ghlac Maois agus Eileázár an sagart leis an ór seo, leis na seoda seo, uathu. ⁵² Agus an t-ór go léir a d’ofráladar don Tiarna sé méid a bhí ann sé mhíle dhéag, seacht gcéad agus caoga seicil; na ceannairí míle agus na ceannairí céad, is iad a bhronn. ⁵³ Rug gach saighdiúir a chreach féin leis. ⁵⁴ Ach thóg Maois agus Eileázár an sagart an t-ór ó na ceannairí míle agus na ceannairí céad, agus thugadar leo isteach i mBoth na Teagmhála é mar chuimhneachán ar chlann Iosrael i bhfianaise an Tiarna.



An AllIordáin á hAitreabh

32 Bhí táinte móra de bha breátha ag clann Reúbaen agus ag clann Ghád. Chonaiceadar anois gurb an-áit do stoc dúiche Iazaer agus dúiche Ghileád.

²Chuaigh más ea clann Ghád agus clann Reúbaen go dtí Maois agus Eileázár an sagart agus go dtí ceannairí an chomhthionóil agus dúradar leo: ³“Dúiche Atárot agus Díobon agus Iazaer agus Nimreá agus Heisbeon agus Eileálae agus Seabám agus Neabó agus Beon, ⁴an dúiche a ghabh an Tiarna i bhfianaise chomhthionól Iosrael, is breá an talamh é do thógail stoic, agus tá stoc ag do shearbhóntaí. ⁵Más fiú sinn do chairdeas,” ar siad, “tabhair an talamh seo i seilbh do shearbhóntaí; ná cuir d’iallach orainn dul thar Iordáin.”

⁶Dúirt Maois le clann Ghád agus clann Reúbaen: “Tá bhur mbráithre ag dul chun cogaidh – an bhfuil sibh sásta fanacht mar a bhfuil sibh? ⁷Cad ab áil libh ag cur drochmhisneach ar chlann Iosrael dul isteach sa tír a thug an Tiarna dóibh? ⁸Sin é mar a rinne bhur n-aithreacha nuair a sheol mé iad ó Cháidéis Bairnéa d’fhonn an tír a bhrath.

⁹Ghabhadar suas go Gleann Eisciól agus thaiscéaladar an tír, ach d’fhágadar clann Iosrael gan de mhisneach acu dul isteach sa tír a thug an Tiarna dóibh. ¹⁰Uime sin las fraoch feirge an Tiarna an lá sin agus mhionnaigh sé mar leanas: ¹¹‘Ambasa nach bhfaighidh aon fhear den dream a tháinig amach as an Éigipt, atá fiche bliain nó breis, radharc ar an tír a gheallas d’Abrahám, d’Íosác, agus do Iacób. Óir níor leanadar mé go dílis – ¹²seachas Cálaeb mac Iafuna an Cinizeach agus Iósua mac Nún mar leanadar seo an Tiarna go dílis.’ ¹³Las fraoch feirge an Tiarna in aghaidh Iosrael agus chuir sé le fán iad san fhásach ar feadh daichead bliain, go dtí gur díothaíodh an ghlúin a pheacaigh i láthair an Tiarna.



¹⁴Seo sibhse anois ag éirí in áit bhur n-aithreacha, a chraobh de cheap na bpeacaí ag cur le fraoch feirge lasánta an Tiarna in aghaidh Iosrael! ¹⁵Má iompaíonn sibh agus gan é a leanúint, fágfaidh sé níos sia fós san fhásach iad, agus tabharfaidh sibh díth ar an bpobal seo ar fad.”

¹⁶Thángadar ina chónagar agus dúradar: “B’áil linn cróite a thógáil anseo dár dtréada agus cathracha dár miondaoine; ¹⁷ach tógfaimid féin airm inár lámha le dul ar aghaidh roimh chlann Iosrael go dtí go dtabharfaimid iad chun na háite atá in áirithe dóibh; fanfaidh ár miondaoine sna cathracha daingne, slán ó mhuintir na tíre. ¹⁸Ní fhillimid ar ár mbaile go mbeidh gach duine de chlann Iosrael i seilbh a oidhreachta. ¹⁹Óir beimidne gan oidhreacht leosan ar an taobh eile den Iordáin nó níos sia ar aghaidh, mar is anseo, lastoir den Iordáin, a bhaineamar amach ár n-oidhreacht.” ²⁰Dúirt Maois leo ansin: “Má dhéanann sibh de réir bhur mbriathra, agus arm a thógáil in bhur lámha le dul ar aghaidh sa chath roimh an Tiarna, ²¹agus má ghabhann gach duine agaibh a iompraíonn arm thar an Iordáin roimh an Tiarna, nó go dtiomáinfidh sé a naimhde go léir amach roimhe, ²²ansin, nuair a bheidh an tír ar a láimh ag an Tiarna, ní miste sibh a fhilleadh; beidh sibh saor ó bhur ndualgas don Tiarna agus do Iosrael; agus beidh an tír seo mar sheilbh oidhreachta agaibh i láthair an Tiarna. ²³Ach mura ndéanann sibh amhlaidh, beidh peaca á dhéanamh agaibh in aghaidh an Tiarna, agus is deimhin go dtiocfaidh bhur bpeaca oraibh. ²⁴Déanaigí cathracha dá bhrí sin do bhur miondaoine agus cróite do bhur dtréada; ach déanaigí beart leis de réir bhur mbriathra.”

²⁵Dúirt clann Ghád agus clann Reúbaen le Maois: “Déanfaidh do shearbhóntaí mar a ordaíonn tú, a thiarna. ²⁶Fanfaidh ár miondaoine, ár mná, ár dtréada, agus ár dtáinte go



léir ansiúd i gcathracha Ghileád,²⁷ ach do shearbhóntaí, gach fear le harm cogaidh ina lámh, rachaidh siad sall chun catha roimh an Tiarna amach mar a d’ordaigh tú, a thiarna.”

²⁸ Ansin thug Maois treoracha ina dtaobh do Eileázár an sagart, do Iósua mac Nún, agus do cheannairí theaghlaigh athartha threibheanna Iosrael. ²⁹ Dúirt Maois leo: “Má ghabhann gach fear a iompraíonn arm de chlann Ghád agus de chlann Reúbaen thar an Iordáin libh chun troid roimh an Tiarna amach, nuair a bheidh an tír faoi smacht agaibh, ansin tugaigí tír Ghileád ina seilbh. ³⁰ Ach mura dtéann siad anonn faoi airm libh, ansin ní foláir dóibh a n-oidhreacht a bheith in bhur measc i dtír Chanán.” ³¹ D’fhreagair clann Ghád agus clann Reúbaen: “Déanfaimid ar ordaigh an Tiarna do do shearbhóntaí.

³² Rachaimid anonn faoi airm go tír Chanán roimh an Tiarna amach, ach ní foláir daoibh seilbh a fhágáil againn ar ár n-oidhreacht lastall den Iordáin.” ³³ Thug Maois dóibh – do chlann Ghád agus do chlann Reúbaen agus do leath-threibh Mhanaise mac Iósaeif – riocht Shíochón rí na nAmórach, ríocht Óg rí Bháiseán, an fearann agus a chathracha agus a chríocha, agus cathracha na duíche timpeall.

³⁴ Thóg clann Ghád Díobon agus Atárot agus Aróeir, ³⁵ agus Atrot Siófán agus Iazaer agus Iogbahá, ³⁶ agus Béit Nimreá agus Béit Harán, cathracha daingne, agus cróite dá dtréada.

³⁷ Thóg clann Reúbaen Heisbeon agus Eileálae agus Ciriátáim ³⁸ agus Neabó agus Bál Meón (athraíodh a n-ainmneacha seo) agus Sibmeá. Thugadar ainmneacha ar na cathracha a thógadar. ³⁹ Chuaigh clann Mháicír, mac Mhanaise, go Gileád. Ghabhadar seilbh air agus thiomáineadar amach na hAmóraigh a bhí ansiúd. ⁴⁰ Thug Maois Gileád do



Mháicír, mac Mhanaise, agus chuir sé faoi ann. ⁴¹Chuaigh Iáir, mac Mhanaise, agus ghabh Bailte Hám agus thug Bailte Iáir orthu óna ainm féin. ⁴²Chuaigh Nobach agus ghabh Canát agus na bailte ina thimpeall agus thug Nobach, a ainm féin, air.

Céimeanna an Aistir

33 Seo iad céimeanna chlann Iosrael ar mbealach amach as an Éigipt ina sluaite faoi cheannas Mhaois agus Áron. ²Bhreacadh Maois i scríbhinn na háiteanna óna dtosaídís nuair a chuiridís chun bealaigh faoi ordú an Tiarna. Seo iad a gcéimeanna de réir na n-áiteanna ónar thosaíodar. ³D'fhágadar Ramasaes an chéad mhí. Ba ar an gcúigiú lá déag den chéad mhí, an lá tar éis na Cásca, a chuir clann Iosrael chun bealaigh go caithréimeach os comhair súile na nÉigipteach go léir. ⁴Bhí na hÉigiptigh ag adhlacadh ar mharaigh an Tiarna dá muintir féin, gach céadghin leo; bhí breith tugtha ag an Tiarna ar a ndéithe.

⁵Chuir clann Iosrael chun bealaigh ó Ramasaes agus shuíodar a gcampa i Sucót. ⁶Ansin chuireadar chun bealaigh ó Shucót agus shuíodar a gcampa in Éatám ar imeall an fhásaigh ⁷Chuireadar chun bealaigh ó Éatám agus d'fhilladar go Pí Haichíorót atá soir ó Bhálzafón, agus shuíodar a gcampa i Migdeol. ⁸Chuireadar chun bealaigh ó Pí Haichíorót agus ghabhadar thar farraige isteach san fhásach; tar éis aistear trí lá a dhéanamh i bhfásach Éatám, shuíodar a gcampa i Márá. ⁹Chuireadar chun bealaigh ó Mhárá agus shroicheadar Éilím; bhí deich dtobar fíoruisce agus seachtó crann pailme in Éilím agus shuíodar a gcampa ann. ¹⁰Chuireadar chun bealaigh ó Éilím agus shuíodar a



gcampa ag Muir na nGiolcach. ¹¹Chuireadar chun bealaigh ó Mhuir na nGiolcach agus shuíodar a gcampa i bhfásach Shín. ¹²Chuireadar chun bealaigh ó fhásach Shín agus shuíodar a gcampa i nDofcá. ¹³Chuireadar chun bealaigh ó Dhofcá agus shuíodar a gcampa in Álúis. ¹⁴Chuireadar chun bealaigh ó Álúis agus shuíodar a gcampa i Rifídím mar nach raibh aon uisce ag an bpobal le hól ann. ¹⁵Chuireadar chun bealaigh ó Rifídím agus shuíodar a gcampa i bhfásach Shíonáí. ¹⁶Chuireadar chun bealaigh ó fhásach Shíonáí agus shuíodar a gcampa i gCiobrot Hatavá. ¹⁷Chuireadar chun bealaigh ó Chiobrot Hatavá agus shuíodar a gcampa i Hazaerot. ¹⁸Chuireadar chun bealaigh ó Hazaerot agus shuíodar a gcampa i Ritmeá. ¹⁹Chuireadar chun bealaigh ó Ritmeá agus shuíodar a gcampa i Riomon Peiriz. ²⁰Chuireadar chun bealaigh ó Riomon Peiriz agus shuíodar a gcampa i Libneá. ²¹Chuireadar chun bealaigh ó Libneá agus shuíodar a gcampa i Riosá. ²²Chuireadar chun bealaigh ó Riosá agus shuíodar a gcampa i gCahaelátá. ²³Chuireadar chun bealaigh ó Chahaelátá agus shuíodar a gcampa ag Sliabh Sheifir. ²⁴Chuireadar chun bealaigh ó Shliabh Sheifir agus shuíodar a gcampa i Harádá. ²⁵Chuireadar chun bealaigh ó Harádá agus shuíodar a gcampa i Macaelot. ²⁶Chuireadar chun bealaigh ó Mhacaelot agus shuíodar a gcampa i dTáchat. ²⁷Chuireadar chun bealaigh ó Tháchat agus shuíodar a gcampa i dTárach. ²⁸Chuireadar chun bealaigh ó Thárach agus shuíodar a gcampa i Mitceá. ²⁹Chuireadar chun bealaigh ó Mhitceá agus shuíodar a gcampa i Haismioná. ³⁰Chuireadar chun bealaigh ó Haismioná agus shuíodar a gcampa i Mosaerót. ³¹Chuireadar chun bealaigh ó Mhosaerót agus shuíodar a gcampa i mBeiné Iacán. ³²Chuireadar chun bealaigh ó Bheiné Iacán agus shuíodar a gcampa i Hor Haigidgeád. ³³Chuireadar chun bealaigh ó Hor Haigidgeád agus shuíodar a gcampa in Iotbátá.



³⁴Chuireadar chun bealaigh ó Iotbátá agus shuíodar a gcampa in Abroná. ³⁵Chuireadar chun bealaigh ó Abroná agus shuíodar a gcampa in Eizion Geibir. ³⁶Chuireadar chun bealaigh ó Eizion Geibir agus shuíodar a gcampa i bhfásach Zin, Cáidéis is é sin.

³⁷Chuireadar chun bealaigh ó Cháidéis agus shuíodar a gcampa i Sliabh Hor, ar imeall chríoch Eadóm.

³⁸Ghabh Árón an sagart suas Sliabh Hor faoi ordú an Tiarna agus fuair sé bás ansiúd sa daicheadú bliain tar éis d'Iosrael teacht as an Éigipt, sa chúigiú mí agus ar an gcéad lá den chúigiú mí sin. ³⁹Bhí Árón céad agus a fiche trí bliain d'aois nuair a d'éag sé ar Shliabh Hor. ⁴⁰An Canánach, rí Arád, a chónaigh sa Neigib i dtír Chanán, chuala sé i dtaobh clann Iosrael a theacht. ⁴¹Chuireadar chun bealaigh ó Shliabh Hor agus shuíodar a gcampa i Zalmoná. ⁴²Chuireadar chun bealaigh ó Zalmoná agus shuíodar a gcampa i bPúnón. ⁴³Chuireadar chun bealaigh ó Phúnón agus shuíodar a gcampa in Obot.

⁴⁴Chuireadar chun bealaigh ó Obot agus shuíodar a gcampa in Ié Abáraím i gcríocha Mhóáb. ⁴⁵Chuireadar chun bealaigh ó Iím agus shuíodar a gcampa i nDíobon Gád.

⁴⁶Chuireadar chun bealaigh ó Dhíobon Gád agus shuíodar a gcampa in Almon Dibleátáim. ⁴⁷Chuireadar chun bealaigh ó Almon Dibleátáim agus shuíodar a gcampa i Sléibhte Abáraím, sall ó Neabó. ⁴⁸Chuireadar chun bealaigh ó Shléibhte Abáraím agus shuíodar a gcampa i machairí Mhóáb láimh leis an Iordáin os comhair Ireachó sall.

⁴⁹Shuíodar a gcampa láimh leis an Iordáin idir Béit-ha-Isimiot agus Ábael-ha-Sitím ar mhachairí Mhóáb.



Roinnt Chanán

⁵⁰Labhair an Tiarna le Maois ar mhachairí Mhóab láimh leis an Iordáin sall ó Ireachó, agus dúirt: ⁵¹“Abair le clann Iosrael: ‘Nuair a ghabhann sibh thar an Iordáin isteach i dtír Chanán, ⁵²ansin ní foláir daoibh an mhuintir go léir atá ina gcónaí sa tír a thiomáint amach romhaibh, agus a gclocha greanta go léir a scrios, agus a ndealbha leáite a scrios, agus a n-áiteanna arda go léir a scartáil. ⁵³Gabhaigí seilbh ar an tír agus cuirigí fúibh ann, óir thug mé an tír daoibh mar shealúchas. ⁵⁴Ní foláir daoibh é a roinnt ar cranna idir bhur bhfiní. D’fhine mór tugaigí oidhreacht bhreise, agus d’fhine beag oidhreacht níos lú. Mar a dtitfidh an crann, do gach duine, sin é a bheidh aige. Bíodh bhur n-oidhreacht agaibh de réir na dtreibheanna sinseartha. ⁵⁵Mura dtiomáineann sibh dúchasaigh na tíre amach romhaibh, ansin iad siúd a fhágfaidh sibh ann, beidh siad mar dhealga in bhur súile agus mar bhioranna in bhur gcliatháin; ciapfaidh siad sibh sa tír ina mbeidh cónaí oraibh, ⁵⁶agus tabharfaidh mé oraibhse an íde a mheasas a thabhairt orthusan.’”

34 Labhair an Tiarna le Maois agus dúirt: ²“Tabhair an t-ordú seo leanas do chlann Iosrael: ‘Nuair a rachaidh sibh isteach i dtír Chanán, seo iad na críocha a bheidh mar oidhreacht agaibh; seo é tír Chanán á rianú ag a theorainneacha: ³Sínfidh deisceart bhur gcríoch ó fhásach Zin ar theorainn Eadóm. Tosóidh teorainn theas bhur dtíre ag imeall Mhuir an tSalainn thoir ⁴agus casfaidh sí ó dheas i dtreo Ard na Scairpeanna agus trasna go Zin agus ag stad laistea de Cháidéis Bairnéa; rachaidh sí as sin i dtreo Hazar Adár agus ar aghaidh go Azmon. ⁵Casfaidh an teorainn ó Azmon i dtreo Shileán na hÉigipte agus stadfaidh sí ag an Muir. ⁶Beidh an Mhuir Mhór ar bhur bhfeorainn agus is í



a bheidh mar theorainn thiar agaibh. ⁷Sé seo a bheidh mar theorainn thuaidh agaibh: tarraing líne duit féin ón Muir Mhór go Sliabh Hor; ⁸ansin ó Shliabh Hor tarraing líne go Bealach Hamát, agus beidh deireadh na teorann ag Zadád. ⁹As sin sínfidh an teorainn ar aghaidh go Ziofron agus beidh deireadh léi ag Hazar Éarnán. Sin í bhur dteorainn thuaidh. ¹⁰Ansinn cinntígí bhur dteorainn thoir ó Hazar Éanan go Seafám. ¹¹Rachaidh an teorainn ó dheas ó Sheafám go Ribleá lastoir de Áin. Níos sia ó dheas fanfaidh sí lastoir de Mhuir Chinirit. ¹²Ansinn leanfaidh an teorainn an Iordáin agus beidh deireadh léi ag Muir an tSalainn. Sin é agaibh bhur dtír lena theorainneacha mórthimpeall.”

¹³Ansinn thug Maois ordú do chlann Iosrael á rá: “Sin é an tír atá le roinnt ar cranna agaibh, an tír a d’aithin an Tiarna a thabhairt do na naoi dtreibheanna go leith; ¹⁴óir treibh chlann Reúbaen gona bhfiní sinseartha, agus treibh chlann Ghád gona bhfiní sinseartha, tá a n-oidhreacht faighte acu cheana féin; mar an gcéanna le leath threibh Mhanaise. ¹⁵Tá a n-oidhreacht faighte ag an dá threibh go leith sin cheana féin lastall den Iordáin ar aghaidh Ireachó sall, soir i dtreo éirí gréine.”

Na Taoisigh a Roinnfidh

¹⁶Labhair an Tiarna le Maois agus dúirt: ¹⁷“Seo iad ainmneacha na dtaoiseach a roinnfidh an fearann oraibh mar oidhreacht: Eileázár an sagart agus Iósua mac Nún; ¹⁸tógai gí taoiseach as gach treibh chun an fearann a roinnt mar oidhreacht. ¹⁹Seo iad ainmneacha na bhfear sin:

Do threibh Iúdá, Cálaeb mac Iafuna.



²⁰ Do threibh chlann Shímeon, Seamúéil mac Aimíohúd.

²¹ Do threibh Bhiniáimin, Eilídeád mac Chisleon.

²² Do threibh chlann Dhán, mar thaoiseach, Bucaí mac Ioglaí.

²³ Do chlann Iósaf: do threibh chlann Mhanaise, mar thaoiseach, Hainíéil mac Éafod.

²⁴ Do threibh chlann Eafráim, mar thaoiseach, Camúéil mac Shifteán.

²⁵ Do threibh chlann Zabúlun, mar thaoiseach, Eilíozáfán mac Pharnác.

²⁶ Do threibh chlann Íosácár, mar thaoiseach, Pailtíéil mac Azán.

²⁷ Do threibh chlann Áiséar, mar thaoiseach, Aichíhiúd mac Shealomaí.

²⁸ Do threibh chlann Naftáilí, mar thaoiseach, Padahael mac Aimíohúd.”

²⁹ Sin iad na fir dár ordaigh an Tiarna tír Chanán a roinnt mar oidhreacht ar chlann Iosrael.

Cion na Léivíteach

35 Labhair an Tiarna le Maois ar bhánta Mhóáb láimh leis an Iordáin os comhair Ireachó sall agus dúirt: ²“Ordaigh do chlann Iosrael cathracha le cónaí iontu, agus talamh féaraigh timpeall na gcathracha, a thabhairt do na Léivítigh as an oidhreacht ina seilbh; tugaigí an méid sin do na Léivítigh. ³Bíodh na cathracha mar bhaile acu agus an féarach máguaird acu dá n-eallach, dá stoc, agus dá n-ainmhithe go léir. ⁴Féarach na gcathracha máguaird a thabharfaidh sibh do na Léivítigh, síneadh sé míle banlámh ó bhallaí na cathrach amach ar gach taobh. ⁵Lasmuigh den chathair déanaigí dhá mhíle banlámh a thomhas lastoir, agus dhá mhíle banlámh laistean, agus dhá mhíle banlámh



laistiar, agus dhá mhíle banlámh lastuaidh, agus an baile i lár baill; bíodh sin ina thalamh féaraigh ag na cathracha seo. ⁶Ar na cathracha a thabharfaidh sibh do na Léivítigh, beidh sé chathair thearmainn, mar a gceadóidh sibh don lámh dhearg teitheadh; agus ina dteannta tugaigí dhá chathair agus daichead eile. ⁷Tugaigí ocht gcathair agus daichead ar fad do na Léivítigh mar aon lena dtalamh féaraigh. ⁸Maidir leis na cathracha a thabharfaidh sibh do na Léivítigh as sealúchas chlann Iosrael, ón muintir ag a bhfuil breis tugaigí breis, agus ón muintir ag a bhfuil níos lú, tugaigí níos lú. Tugadh gach duine cathracha dá chuid do na Léivítigh de réir méid na hoidhreachta a fuair sé féin.”

Cathracha Tearmainn

⁹Labhair an Tiarna le Maois agus dúirt: ¹⁰“Abair é seo le clann Iosrael:

Nuair rachaidh sibh thar Iordáin trasna go tír Chanán, ¹¹ansin roghnaigí cathracha le bheith ina gcathracha seo mar thearmainn agaibh ón díoltach fola i dhéanann marú gan bheartú dídean. ¹²Bíodh na cathracha seo mar thearmannn agaibh ón díoltach fola i dtreo nach mbásófaí an marfóir gan é thabhairt chun breithe os comhair an chomhthionóil. ¹³Na cathracha seo a thabharfaidh sibh, bídis ina sé cathracha tearmainn. ¹⁴Tabharfaidh sibh trí chathair lastall den Iordáin agus trí chathair i dtír Chanán le bheith ina gcathracha tearmainn. ¹⁵Beidh na sé cathracha seo mar thearmann ag clann Iosrael agus ag an gcoimhthíoch agus ag an deoraí atá ag cur faoi ina measc, i dtreo gur féidir don té a dhéanann marú cinniúnach teitheadh iontu.



¹⁶Ach más amhlaidh a bhuail sé an duine le huirlis iarainn agus gur mharaigh; is dúnmharfóir é. Ní foláir an dúnmharfóir a chur chun báis. ¹⁷Má bhuail sé é le cloch, sás a mharaithe, ina láimh agus gur mharaigh, is dúnmharfóir é; ní foláir an dúnmharfóir a chur chun báis. ¹⁸Nó más amhlaidh a bhuail sé é le harm maide, sás a mharaithe, agus gur mharaigh, is dúnmharfóir é. Ní foláir an dúnmharfóir a chur chun báis. ¹⁹Cuireadh an díoltach fola féin an dúnmharfóir chun báis. Nuair a bhuaileann sé leis, cuireadh sé chun báis é.

²⁰Má thug an marfóir drochíde le barr fuatha ar an duine, nó má chaith sé urchar marfach gan choinne leis chun é a leagan ar lár, ²¹nó má bhuail sé buille dhorn marfach air le holc, ansin ní foláir an té a bhuail an buille a chur chun báis; is dúnmharfóir é; ní foláir don díoltach fola é a chur chun báis nuair a bhuaileann sé leis. ²²Ach más trí chinniúint a thug sé drochíde ar an duine, gan mhailís, nó má chaith sé urchar leis agus gan a bheith i luíochán air, ²³nó má scaoil sé cloch sás a mharaithe anuas air gan é a fheiceáil agus gur mharaigh sé é amhlaidh sin, chomh fada is nach raibh olc aige dó nó drochrún aige chuige, ²⁴ansin ní foláir don chomhthionól breith a thabhairt de réir na rialacha seo idir an té a rinne an marú agus an díoltach fola, ²⁵agus an marfóir a shaoradh ar an gcuma sin ó láimh an díoltach fola. Cuirfidh an comhthionól ar ais é go dtí an chathair thearmainn mar ar theith sé; fanadh sé ansiúd go bhfaighe an t-ardsagart a ungadh leis an ola choisricthe bás. ²⁶Má théann an marfóir aon uair thar teorainneacha na cathrach tearmainn dár theith sé, ²⁷agus go bhfaigheann an díoltach fola greim air lasmuigh de theorainneacha a chathrach tearmainn, ní cás don díoltach é a mharú gan cion a fhola air. ²⁸Óir ní foláir don mharfóir fanacht ina chathair thearmainn go bhfaighe



an t-ardsagart bás; tar éis bhás an ardsagairt tá cead ag an marfóir filleadh ar an áit ina bhfuil a mhaoín. ²⁹Bíodh feidhm dlí agus reachta ag na treoracha sin agaibhse agus ag bhur sliocht cibé áit ina mbíonn cónaí oraibh. ³⁰i gcás gach marú is ar fhianaise finnéithe nach foláir an marfóir a chur chun báis; ní chuirfear aon duine chun báis ar fhianaise duine aonair. ³¹Ná glacaigí éiric ar son anam marfóra a daoradh chun báis; ní foláir é a chur chun báis. ³²Agus ná glacaigí éiric ar son duine a theith chun cathrach tearmainn ach ar mian leis filleadh agus maireachtáil sa bhaile roimh bhás don ardsagart. ³³Ná truailligí an talamh ina gcónaíonn sibh. Truaillíonn fuil an talamh agus níl leorghníomh ann don talamh ar son na fola a dhoirtear ann ach fuil an té a dhoirt é. ³⁴Na truailligí an talamh ina gcónaíonn sibh, a mairimse ina chrioslach; óir mairimse, an Tiarna, i measc chlann Iosrael.”

Oidhreacht Mhná

36 Ansin tháinig cinn finí shliocht chlann Ghileád mac Mháicír mac Mhanaise, sliocht de chlann Iósaef, chun tosaigh agus labhraíodar le Maois agus leis na taoisigh, cinn finí chlann Iosrael, agus dúradar: ²“D’ordaigh an Tiarna duit, a uasail, an talamh a roinnt ar cranna ar chlann Iosrael. Agus d’ordaigh an Tiarna duit, a uasail, oidhreacht ar ndearthár Zalofachád a thabhairt dá iníonacha. ³Anois má phósann siadsan duine as treibh eile de chlann Iosrael bainfear a maoin d’oidhreacht ár n-aithreacha. Cuirfear breis le maoin na treibhe lena mbainfidh siad, agus laghdófar ar an maoin a roinneadh orainne.



⁴Nuair a thiocfaidh iubhaile chlann Iosrael ansin cuirfear a n-oidhreacht sin le hoidhreacht na treibhe lena mbainfidh siad ansin, agus bainfear í d’oidhreacht threibh ár n-aithreacha.”

⁵Ar ordú an Tiarna thug Maois an bhreith seo do chlann Iosrael; dúirt sé: “Tá an ceart ag treibh chlann Iósaeaf. ⁶Seo é breith an Tiarna i gcás iníonacha Zalofachád: ‘Pósaidís a rogha, ach pósaidís laistigh de shliocht threibh a n-athar. ⁷Níl oidhreacht chlann Iosrael le hathrú ó threibh go treibh, óir tá gach fear ar chlann Iosrael le cloí le hoidhreacht threibh a aithreacha. ⁸Agus gach iníon ag a bhfuil oidhreacht i dtreibh de chlann Iosrael, ní foláir di pósadh i bhfine de threibh a hathar, i dtreo go mbeidh oidhreacht a aithreacha ag gach duine de chlann Iosrael. ⁹Ná hathraítear aon oidhreacht ó threibh go treibh eile; cloíodh gach treibh de chlann Iosrael lena n-oidhreacht féin.’”

¹⁰Rinne iníonacha Zalofachád mar a d’aithin an Tiarna do Mhaois. ¹¹Phós Machlá, Tirzeá, agus Hoglá, agus Milceá, agus Noá, iníonacha Zalofachád, mic deartháireacha a n-athar. ¹²Ós rud é gur phósadar i bhfiní chlann Mhanaise mhic Iósaeaf, d’fhill a n-oidhreacht ar threibh fhine a n-athar.

Dúnadh

¹³Sin iad na haitheanta agus na dlithe a d’aithin an Tiarna do chlann Iosrael trí Mhaois ar bhánta Mhóáb láimh leis an Iordáin sall ó Ireachó.

